

ዮሃንስ ጳፌዳ ምሽራቹዋ ቃላ ገሉዋ

ዮሃንስ ጳፌዳ ምሽራቹ፣ የሱስ አሹዋ ማዪደ አሳ ግዲዋን ቤቴዳ ደኡዋ ጸሳ ቃላ ግድያዋ ቆንጭሴ። ሀ ማጻፋይ ባረ ሁጸዉ ቆንጭሰያዋዳን ሀ ምሽራቹዋ ቃላይ ጸፈቴዳዌ፣ አ ናባብያ አሳይ የሱስ አሳ አሸያ ጳልያ ግዲደ ያናዋ ጌተቴዳ ጸሳ ናኣ ግድያዋ አማናና ማላነ አን አማኖ ጋሱዋን መድና ደኡ ኡንቱንቶ ደአናዋ ኡንቱንቱ ኤራና ማላ ጸፈቴዳ (20:31)።

ምሽራቹዋ ቃላዉ ኮይሮ ሻኩ መድና ጸሳ ቃላይነ የሱሰነ አቱዋ ግድያዋ ኦድ ሰሚደ፣ የሱስ አሸያዋ ግዲደ ያና ጌተቴዳ ጸሳ ናኣ ግድያዋ በሰያ ዲማ ዲማ ማላታቱዋ ሺሼ። ሄዋፕ ካሊደ ቃይ ሀ ማላታቱዋፕ ቤቴዳ አይፍያ ኦድያ ታርካቱ ካሊና። ሀ ክፍሊ እት እት አሳይ የሱሳን አማኒደ፣ አ ካልያዋንታ ግዴዳዋ ኦዴ፤ ሀራቱ ቃይ አ አያዉ እጾደንቶነ አን አያዉ አማናኮ ጌደንቶ ኦዲና። (ሸምቸዋ 13-17) የሱስ ኦይቀቴዳ ኦማርሰ አዉ አ ካልያዋንቱና አይ ኬና ምኖ እትፕተላይ ደአንቶነ፣ ቃይ እ ካቀታናዉ ማቴዳ ዋንተላ ጋላስ ኡንቱንቶ ገገታና ማላነ ምናና ማላ እ ሃሳዬዳ ቃላ ኦዲና። ዉርሰላ ሸምፓቱ የሱስ ኦይቀቴዳዋነ ፕርዳዉ ሺቄዳዋ፣ አ ካቄዋነ አ ደንዲዋ፣ ቃይካ ደንዲዋፕ ጉይያን ባረና ካልያዋንቶ አ ቆንጩዳ ሀናታ ኦዲና።

ዮሃንስ ጎዳ የሱስ ክርሰቶሳ ባጋና ቤትያ መድና ደኡዋ ቆንጭያን በሰያ ሀ እቶ ኬካተላይ ሀአፕ ደሚደ የሱስ አገ፣ ቱማነ ደኡ ግድያዋ አማንያዋንቱሳ። ዮሃንስ ጳፌዳ ምሽራቹዋ ቃላ ሀራቱዋፕ ዲማይያዌ፣ አያና ቱማተላቱዋ ታማርሳናዉ ደኡዋ ኡባን አሳይ ሜዘቴዳ ቃላቱዋ ጎኤትያ ድራሳ። ሄዋንቱካ፣ ሃላ፣ ሶሉዋ፣ ፖኡዋ፣ ሄንላንቻ፣ ዶርሳ፣ ዋይንያ ሞላ፣ ዋይንያ አይፍያነ ሄዋንታ ማላትያዋንታ።

ዋሹማደ ኦይቀቴዳ ምሽራት ታርክያ 7:53—8:11 ጮራ ብለላቱነ በን ማጻፋቱ ባረንቱን ጉጅክና፤ ሀራቱ ዮሃንሳ ምሽራቹዋን 21:24ፕ ጉይያን ገልሲና፤ ሀራንቱ ቃይ ሉቃሳ ምሽራቹዋ ሉቃሳ 21:38ፕ ጉይያን ገልሲና፤ እት በን ጸፈቴዳ ብለላይ ዮሃንሳ ምሽራቹዋ 7:36ፕ ጉይያን ገልሴዳ።

ሸምፓቱዎ ኡባቶ እመቴዳ ቃንሳ ቆፋቱዎ

ሀ ማጻፋ ጻፊዳዎ ቆፋ 1:1-18

ጸማቅያ የሃንሳን የሱሳ ኮይሮ ካሌዳዎንታ 1:19-51

የሱሳ ኡሱዎ ዶመላ 2:1—12:50

የሩሳላመንን እዝ ዩሹዋን ዉርሰላ ጋላሳቱዋን ሀኔዳ የሱሳ ኡሱዎ 13:1—19:42

ጎዳ የሱሳ ደንዱዋን ቆንጨላ 20:1-31

ዉርሰላ ቁትያ፣ ጋሊላን ዛሪደ ባረና ካልያዎንቶ የሱሰ ቆንጨዳዎ 21:1-25

ደኡዎ ቃላ

- 1 ቃላይ ኮይሮ ደኡ፤ ቃላይካ ጸሳና እትፕ ደኡ፤ ቃላይካ ጸሳ።
- 2 እ ኮይሮፕካ ጸሳና ደኡ።
- 3 ኡባባይ ቃላ ባጋና መፍቱዳ። መፍቱዳባን ኡባባን እ ባይናን እትባይን መፍቱቤና።
- 4 እን ደኡ ደኡ፤ ደኡ አሳዉ ፖኡዎ።
- 5 ፖኡ ጳማን ፖኡ፤ ጳማይ ፖኡዎ ጸንቤና።
- 6 ጸሳፕ ኪተት ዬዳ አ ሱንላይ የሃንሳ ጌተትያ እት ብታኒ ደኡ።
- 7 አሳይ ኡባይ አ ባጋና አማናና ማላ፣ ፖኡዋባ ማርካታናዉ ዬዳ።
- 8 ፖኡዋባ ማርካታናዉ ዬዳፕ አትን፣ እ ባረ ሁጸዉ ፖኡዎ ግደና።
- 9 እካ ቱሙ ፖኡዎ ግዴዳዌ አሳዉ ፖእሳናዉ ሀ ሳኦ ይያዎ።
- 10 ቃላይ አላምያን ደኡ፤ ጸሳይ ቃላን አላምያ መጴዳ፤ ሸን አላሚ አ ኤርቤና።
- 11 እ ባረ ባጋቱዋኮ ዬዳ፤ ሸን ኡንቱንቱ አ ሺሸ እክበይክና።
- 12 ግደፕ አትን እ ባረና ሺሸ አኬዳ ኡባቶ፣ ባረ ሱንላን አማኔዳዎንቶ፣ ጸሳ ናና ግደና ማላ፣ ማታ እሚዳ።
- 13 ኡንቱንቱ ጸሳፕ የለቴድናፕ አትን፣ አሳይ የልያ ማራን ዎይ አሹዎ ሸንያን ዎይ አቱማ አሳ ሸንያ ጸላላን የለትበይክና።
- 14 ቃላይ አሳ ግዲደ፣ አጴ ከካተላንን ቱማተላን ኩሚደ ኑ ግዲዎን ደኡዳ። ኑን፣ እ ባረ አቦ እት ናኦ ግዲደ አኬዳ አዉ ደእያ ባረ አዉዎ ቦንቹዎ በኤደ።

1:6 ማቶሳ 3:1፤ ማር. 1:4፤ ሉቃሳ 3:1-2

15 ዮሃንስ አባ ባረ ኮሻ ቆቁ አሏደ፤ “ታን፣ ታፕ ካላ ይያዌ ታፕ ቦላ፤ እያዉ ጎፕ፣ ታ የለታናፕ ካሰና እ ደእያዋ” ጋደ ህንተንቶ ኦደዌ ሀዋ” ያግ ማርካቴዳ።

16 ኑን ኡባይ አ ኩመንላ አቶ ኬካተላን ፓላሄዳ አንጂዋ አኬዶ።

17 ጸሳይ ህግያ ሙሴ ባጋና እሜዳ፤ ሸን አቶ ኬካተላይነ ቱማተላይ የሱስ ክርስቶሳ ባጋና ዬዳ።

18 ጸሳ በኤዳ አሳይ ኦንነ ባዋ፤ ባረ አዉዋ ማታን ደእያ ባረ ሀደዉ ጸሳ ግዴዳዌ እት ናኦ ጸላላይ አባ ማርካቴዳ።

ጸማቅያ ዮሃንሳ ማርካተላ
(ማቶሳ 3:1-12፤ ማር. 1:1-8፤ ሉቃሳ 3:1-18)

19 የሩሳላመን ደእያ አይሁዳቱዋ አይስያዋንቱ ቄሳቱዋን ሌዋቱዋ ዮሃንሳኮ፣ “ኔን ኦኔ?” ገደ አ ኦቻና ማላ ኪትና፣ ዮሃንስ ኡንቱንቶ ማርካቴዳ ማርካተላይ ሀዋ።

20 ዮሃንስ፣ “ታን ክርስቶሳ ግድከ” ያገደ ጌሽ ማርካቴዳዋፕ አትን፣ ማርካቴሳ እጽቤና።

21 ኡንቱንቱ፣ “ያትና፣ ኔን ኦኔ? ኔን ኤላሴ?” ያገደ አቼድኖ።

ዮሃንስ፣ “አ ግድከ” ያገደ።

ቃይካ ኡንቱንቱ፣ “ኔን ናቤ?” ያገደ አቼድኖ።

ዮሃንስ፣ “ግድከ” ያግ ዛሬዳ።

22 ኡንቱንቱ፣ “ያትና ኔን ኦኔ? ኔን ኑና ኪቱዳዋንቶ ኑዳና ማላ፣ ኔን ኔና ኦና ጋይ?” ያገደ።

23 ዮሃንስ ዛሬደ፣ “ናብያ እሳያስ ጌዳዋዳን፣ ዋራን ባረ ቃላ ቆቁ አሏደ፤

“ ሳዳ ኦግያ ሰት አሐተ!”

ግያ ኮሻይ ታዋ”

ያገደ።

24 ቃይ ፓርሳዋቱ ኪቱዳ አሳቱ

25 ዮሃንሳ፣ “ኔን ክርስቶሳ ዋይ፣ ኤላሳ ዋይ ናብያ ግዳና ጳዮፕ፣ ያትና እያዉ ጸማቃይ?” ያገደ አቼድኖ።

26 ዮሃንስ፣ “ታን ሃላን ጸማቃይ፤ ሸን ህንተንቱ ኤረናዌ እቱ ሀዋን ህንተንቱ ግዴዋን ደኤ።

27 እ ታፕ ካላ ዬ። ታን አ ጫማ ቃሹዋ ብላናዉካ በሰከ” ያግ ዛሬዳ።

28 ሀዌ ኡባይ ዮርዳኖሳ ሻፋፕ ሄፍንላ ባጋ ዮሃንስ ጸማቅያሳ ቢታንያን ሀኔዳ።

ጸሓ ኦርገ ደርሳ

29 ዮሃንስ ዎንተላ ጋላስ የሱስ ባረኮ ይያዎ በኢደ፡ “ጸሓ ኦርገ ደርሳ፡ * አላምያ አሳ ናጋራ ጳይሰያዌ፡ ሀዌሽ!

30 ታን፡ ታፕ ካላ እቱ ያናዎ፤ እ ታፕ ቦላ፤ አያው ጎፕ፡ ታ የለታናፕ ካሳ እ ደእያዎ፣ ጋደ ኦዴዳዌ ሀዎ።

31 እ ኦንንቶ ታን ኤርከ፤ ሽን እስራኤልያ አሳው አ ቆንጭሳናው ሃላን ጸማቃደ ያድ” ያጌዳ።

32 ዮሃንስ ማርካቲደ፡ “ጌሻ አያናይ ሳሉዋፕ ሀራጵያዳን ዎድሽናን አ ቦላን ኡትሽን፡ ታን በኣድ።

33 ታን አ ኤርከ፤ ሽን ሃላን ጸማቃና ማላ ታና ኪቴዳ ጸሳይ፡ ጌሻ አያናይ ዎዲደ፡ እት አሳ ቦላ ሸምፕሽን፡ ኔን በአና፤ እካ ጌሻ አያናን ጸማቅ፣ ያጌደ ታው ኦዴዳ።

34 ታን ሄዎ በኣድ፤ እ ጸሓ ናኣ ግድያዎካ ማርካታይ” ያጌዳ።

የሱስ ኮይሮ ባረና ካልያዎንታ ዶሬዳ

35 ዎንተላ ጋላስ ዮሃንስ ሽረቲደካ ባረና ካልያዎንቱፕ ላእቱዋና እትፕ ኤቄዳ፤

36 እ የሱስ እድሽን በኢደ፡ “ጸሓ ደርሳይ ሀዌሽ!” ያጌዳ።

37 ዮሃንሳ ካልያ ላእቱ ዮሃንስ ግያዎ ሰሲደ፡ የሱሳ ካሌድኖ።

38 የሱስ ባረና ካልያዎንታ ጉየ ሰም በኢደ፡ “አያ ኮዪቱ?” ያግ ኦቹዳ።

ኡንቱንቱ ዛሪደ፡ “ረቢ፡ ኔን ሀቃን ደአይ?” ያጌድኖ። “ረቢ” ጉሳይ “ታማርሰያዎ” ግያዎ።

39 የሱስ ኡንቱንታ፡ “ሃ ዪደ በእተ” ያጌዳ። ኡንቱንቱ ቢደ፡ እ ደኢያሳ በኤድኖ፤ ሄ ጋላስ ሳአይ ታሙ ሳተ ሄራ ግድያ ድራው፡ ኡንቱንቱ አናና ፔሼድኖ።

40 ዮሃንስ ጌደዋ ሰሲደ፡ የሱሳ ካሌዳ ላኡ አሳቱዋፕ እቱ፡ ሰሞና ጳጵርሳ እሻ እንድራሳ።

* 1:29 ጸሓ ኦርገ ደርሳ፡ ፓሰጋ (ከሱዋ)፡ አይሁደ አሳቱዋ ፓይዳዎን ኒሳን ጌተትያ አገና ግዳደ ቶጵያ አሳ ፓይዳዎን ላፑንያ ሆሰፑንያ አገናቱዋ። አይሁደ አሳን ፓሰጋ ጌተቶዌ፡ ጸሳይ እስራኤልያ አሳቱዋ ግብጾፕ ዎልቃማ ማላታን ከሴዳ ዎድያ ግድያ ድራሳ። ዎጋ 23:5-8 ጴጳተ። ጸሓ ኦርገ ደርሳ፡ ኦራሳ ጫቁዋን ክርሰቶሳን ጴሴቶ ጋሱ፡ እ ሀ አላምያ አሳ ሀይቆ ባረና አል አሚደ መድና ሙራፕ ከሰ እኮ ድራሳ። 1 ቆር. 5:7፤ 1 ጳጵ. 1:18-19 ጴጳተ።

41 እንድራስ ኮይሮ ባረ እሻ ሰሞና ደሚደ፡ “ኑን ጸሳይ ከቴዳዋና ጋከቲደ” ያጌዳ። ሄዋ ጉሳይ “ክርስቶስ” ግያዋ።

42 እንድራስ ሰሞና የሱሳኮ አሄዳ።

የሱስ ሰሞና በኢደ፡ “ኔን ዮሃንሳ ናኦ ሰሞና፤ ነ ሱንላይ ኬፋ ጌተታናዋ” ያጌዳ። “ኬፋ” ግያዋ ብለላይ “ጸጽሮሳ” ዋይ “ዛላ” ግያዋ።

የሱስ ፕልጶሳን ናትናኤላ ጾጌዳ

43 ዋንተላ ጋላስ የሱስ ጋሊላ ባናዉ ቆፋ ቃቹዳ፤ እ ፕልጶሳና ጋከቲደ፡ “ታና ካላ!” ያጌዳ።

44 ፕልጶስ፡ እንድራስን ጸጽሮስ ደኤዳ ቤተሳይዳ ጌተትያ ካታማፕ ዬዳ አሳ።

45 ፕልጶስ ናትናኤላና ጋከቲደ፡ “ሙሴ ማጻፋቱዋንን ናባቱዋ ማጻፋቱዋን † አባይ ጸፈቲዳዋዳን፤ ዮሴፎ ናኦ የሱስ ናዝሬተ ካታማን ደእያዋና ኑን ጋከቲደ” ያግ ኦይዳ።

46 ናትናኤል ዛሪደ፡ “ናዝሬተ ካታማፕ ሎኮባይ ከሳናዉ ዳንዳዪ?” ያጌዳ።

ፕልጶስ፡ “ያደ በኦ” ያጌዳ።

47 ናትናኤል ባረኮይያዋ የሱስ በኢደ፡ “ማካላይ ባይና ቱሙ እስራኤልያ አሳይ ሀዋ!” ያጌዳ።

48 ናትናኤል የሱሳ፡ “ኔን ታና ሀቃን ኤራይ?” ያግ ኦቹዳ።

የሱስ ዛሪደ፡ “ፕልጶስ ኔና ጸሳናፕ ካስ፡ ኔን ባላሰያ ጌተትያ ሞላፕ ሀርክና ደእሸን፤ ታን ኔና በኦድ” ያጌዳ።

49 ናትናኤል ዛሪደ፡ “ታማርሰያዎ፡ ኔን ጸሳ ናኦ! ኔን እስራኤልያ ካትያ!” ያጌዳ።

50 የሱስ፡ “ታን ኔና ባላሰያ ጌተትያ ሞላፕ ሀርክና በኦድ ጌዳ ድራዉ አማናይ? ኔን ሀዋፕ አቲያዋ በኦና!” ያጌዳ።

51 ቃይካ የሱስ፡ “ታን ሀንተንቶ ቱሙዋ ኦዳይ፤ ሳሉ ደየትና፤ ጸሳ ኪታንቻቱ ታ ቦላ፤ አሳ ናኦ ቦላ፤ ፑደ ከሰሺናን ዱገ ዋድሺን፤ ሀንተንቱ በኦና” ያጌዳ።

2

የሱስ ቃና ካታማ ቡላቻሳ ቤዳ

1 ሄዘንሉ ጋላስ ጋሊላ ጋድያን ቃና ጌተትያ ካታማን ቡላቻይ ቡላቹቴዳ፤ የሱሳ ዳያ ሄ ቡላቻን ደኦዉ።

† 1:45 ሙሴ ማጻፋቱዋንን ናባቱዋ ማጻፋቱዋን፡- አይሁዳቱዋ ማጻፋ፡ ኤጫ ጫቁዋ።
1:51 ደመላ 28:12

- 2 የሱሰካ ባረና ካልያዋንቱና እትጥ ሄ ቡላቻ ጸሐፊዳ።
- 3 ዎይንያ ኡሻይ ወር ድግና፣ የሱሳ ዳያ አ፣ “ኡንቱንቶ ዎይንያ ኡሻይ ወር ድግዳ” ያጋ ኦቻዲ።
- 4 የሱሰ ካሪድ፣ “ታ ዳዬ፣ ሀዌ ታ ኦሱዋ ግድያ ድራወ፣ ነ ያያና ኮሸና። ታ ዎዲ * ብሮ ጋክቤና” ያጌዳ።
- 5 የሱሳ ዳያ ኪተትያዋንቶ፣ “እ ሀንተንቶ ኦድያዎ አያ ግደጥነ አሰተ” ያጋ ኦዳዲ።
- 6 አይሁዳቱ ካሰ አሳያ ደያዳን፣ ማቻ ዎጋወ እቱ እቱ ጸቱ ጸረሙሰያ ኦይቂያ ኡሱፑን ሹቻ ባላቱ ሄዋን ደኢኖ።
- 7 የሱሰ ኪተትያዋንታ፣ “ባላቱዋን ሃላ ኩንሰተ” ያጌዳ፤ ጌተቶዋዳንካ ኡንቱንቱ ባላቱዋን ደና ጋካናወ ሃላ ኩንሴድኖ።
- 8 የሱሰ ኡንቱንታ፣ “ሀእ ዲቂድ፣ ቡላቻ ካፖ እምተ” ያጌዳ፤ ኡንቱንቱ አወ አፊደ እማድኖ።
- 9 ቡላቻ ካፑ ዎይንያ ኡሻ ግዴዳ ሃላ ጋንጽ ጸሊደ፣ ሀቃጥ ዬደንቶ ኤርቤና፤ ሸን ሃላ ኩንሴዳ ኦሳንቻቱ ኤሪኖ። ቡላቻ ካፑ ማቻቶ አክያዎ ጸሲደ።
- 10 “ኡንነ አይፈ ግዴዳ ዎይንያ ኡሻ እማላ አሳ ካሰቲደ ኡሼ፤ ያቲደ አሳይ ዳርሰ ኡሼዳዋጥ ጉይያን፣ ቅርርያ ኡሼ። ሸን ኔን አይፈ ግዴዳ ዎይንያ ኡሻ ሀኖ ጋካናወ ናጋዳ!” ያጌዳ።
- 11 የሱሰ ባረ ኡሴዳ ዎልቃማ ማላታቱዋጥ ሀዋ ኮይሩዋ ጋሊላ ጋድያን ቃና ጌተትያ ሄራን ኡሴዳ፤ ሄዋን ባረ ቦንቹዋ እ ቆንጭሰና፣ አ ካልያዋንቱ አን አማኔድኖ።
- 12 ሄዋጥ ጉይያን፣ የሱሰ ባረ ዳይና፣ ባረ እሻቱዋናን ባረና ካልያዋንቱና እትጥ ቅፍርናሆማ ጌተትያ ካታማ ቢደ አማራዳ ጋላሳ ታኬድኖ።

የሱሰ ጌሻ ጎልያ ግቢያጥ ዛልእያዋንታ ከሴዳ
 (ማቶሳ 21:12-13፤ ማር. 11:15-17፤ ሉቃሳ 19:45-46)

- 13 አይሁዳቱ ቦንቶያ ፓሰጋ ባላ ጋላሳይ ማታትና፣ የሱሰ የሩሳላሙ ቤዳ።
- 14 ጌሻ ጎልያ ግቢያን ሚዛ፣ ደርሳን ደጎማቱዋ ዛልእያ አሳ ደሜዳ፤ ቃይ ሀራቱ ባረንቱ ኦይድያን ኡቲደ፣ ሚሻ ላምያዋንታ ደሜዳ።

* 2:4 ታ ዎዲ፡- ሀዋ ጉሳይ የሱሳ ቱሙ ቦንቹ በኤታናወ በሴነ አ ጸሳ ናአ ግደዌ ኤሪታናወ በሴ ግያዋ።

15 እ ጎላ ጅራፍያ ደቂደ፡ አሳ ኡባ ደርሳናነ ምያና ጌሻ ጎልያ ግቢያፕ ካረገ ከሲደ የደርሴዳ። ሚሻ ላምያዋንቱ ኦይድያካ አላ የጊደ፡ ኡንቱንቱ ሚሻ ላሌዳ።

16 ደጎሙዋ ዛልእያዋንታ እ፡ “ሀ ደጎማቱዋ ሀዋፕ ከሰተ፤ ታ አቡ ጎልያ ገያ አላፕተ!” ያጌዳ።

17 የሱሳ ካልያዋንቱ ጸሳ ማጻፋን፡ “ታን ነ ጎለጌ ሴለትያ ሴላይ ታና ታማዳን ጉዳ” ጌተቲደ ጸፈቱዳዋ ሀሳዬድኖ።

18 ሄዋፕ ጉየ፡ አይሁደ አሳ አይሰያዋንቱ ዛሪደ፡ “ነጌ ሀዋ አላናጌ ዳንዳይያ ማታይ ደእያዋ ኑና እያ ማላታ በሳኒ?” ያጌድኖ።

19 የሱሰ፡ “ሀ ጌሻ ጎልያ ኮልተ፤ ታን ሄዙ ጋላሳን ዛራደ ኬጻና” ያጌዳ።

20 ቃይካ አይሁደ አሳ አይሰያዋንቱ፡ “ሀ ጌሻ ጎልያ ኬጻናጌ አይታማነ ኡሱፕን ላይላ አኬዳ፤ ሽን ኔን ሄዙ ጋላሳን ኬጻኒ?” ያጌድኖ።

21 ሽን እ ሃሳዬዳ ጌሻ ጎሊ ባረ አሳተላባ።

22 ሄዋ ድራጌ፡ የሱሰ ሀይቆዋፕ ደንዴዳዋፕ ጉይያን፡ የሱሳ ካልያዋንቱ እ ሄዋ ጌዳዋ ሀሳዬድኖ። ቃይ ኡንቱንቱ ጸሳ ማጻፋይ ጌዳዋን የሱሰ ሃሳዬዳዋ አማኔድኖ።

23 ፓሰጋ ባላ ቦንቶያ ዎደ፡ የሱሰ የሩሳላሙን ደእሽን፡ እ አሌዳ ማላታ በኢደ፡ ጮራ አሳይ እ አማኔድኖ።

24 ሽን የሱሰ አሳ ኡባ ኤርያ ድራጌ፡ ሄዋንታ አማንቤና።

25 አሳባ ኦንነ እጌ ማርካታና ማላ ኮይቤና፤ አያጌ ጎፕ፡ አሳ ዎዛናን አይ ደእንቶ፡ እ ባረ ሁጳጌ ኤርያ ድራሳ።

3

የሱሳን ንቆድሞሳ

1 ፓርሳዋቱዋፕ ግዴዳ ካፑዋ ንቆድሞሳ ጌተትያ እት ብታኒ ደኤ።

2 ንቆድሞሰ ቃማ የሱሳኮ ዪደ፡ “ታማርሰያዎ፡ ኔን ኑና ታማርሳና ማላ ጸሳይ ከቱዳ ግድያዋ ኑን ኤሬቶ፤ አያጌ ጎፕ፡ ጸሳይ እናና ደእያ አሳፕ አትን፡ ሀ ኔን አላያ ዎልቃማ ማላታቱዋ አላናጌ ዳንዳይያ አሳይ ባዎ” ያጌዳ።

3 የሱሰ ዛሪደ፡ “ታን ነጌ ቱሙዋ ኦዳይ፤ አሳይ ላኤንሱዋ የለታና ቆዮፕ፡ ጸሳ ካጌተላ በአናጌ ዳንዳየና” ያጌዳ።

4 ንቆድሞስ፡ “ጭማ አሳይ ዋኒደ ላኤንሉዋ የለታናዉ ዳንዳዪ? ባረ ዳይ ኡሉዋ ሰሞ ገሊደ፡ ላኤንሉዋ የለታናዉ አሳይ ዳንዳዪ?” ያጌዳ።

5 የሱስ ዛሪደ፡ “ታን ነዉ ቱሙዋ ኦዳይ፤ አሳይ ሃላጥነ ጌሻ አያናጥ የለታና ጳዮጥ፡ ጸሳ ካዉተላ ገላናዉ ዳንዳዪና።

6 አሳይ አሹዋን አሳጥ የለቲ፤ ሽን አሳይ አያናን ጌሻ አያናጥ የለቲ፤

7 ሳንተንቲ ላኤንሉዋ የለታናዉ በሴ፣ ጋደ ታን ኦዳዳ ድራዉ፡ ማለለቶጋ።

8 ጫርኩ ባረ ኮዬዳሳ ጫርኬ። ኔን እ ኮሹንቻ ሰሳሳ፤ ሽን እ ሀቃጥ ይንቶ ዋይ ሀቃ ብንቶ ኤራካ። ጌሻ አያናጥ የለቲዳ ኡባይ ሄዋ ማለ” ያጌዳ።

9 ንቆድሞስ፡ “ሀዌ ዋኒደ ሀናናዉ ዳንዳዪ?” ያጌደ ኦቼዳ።

10 የሱስ ዛሪደ፡ “ኔን እሰራኤላቱዋ ታማርሰያዋ ግዳደ ሀዋ ኤርኪ?

11 ታን ነዉ ቱሙዋ ኦዳይ፤ ኩን ኤርያዋ ሃሳዬቶን በኤዳዋ ማርካቲቶ፤ ሽን ኩን ማርካትያዋ ሀንተንቲ እክክታ።

12 ታን ሀንተንቲ ሳኣባ ኦድና፡ አማነናዋንታ ግደጥ፡ ሳሉዋባ ኦድና ዋን አማናንቲ?

13 ሳሉዋጥ ዋዴዳ ታጥ አትን፡ ሳሉዋ ከሴዳዌ ኦንነ ባዋ፤ ሳሉዋን ደእያ አሳ ናኣይ ታና።

14-15 “ሙሴ ዋራን ጸንቆማሉዋ ሾሻ ሱሌዳዋዳን፡ ታና አማኔዳ ኡባይ መድና ደኡዋ አካና ማላ፡ ታን አሳ ናኣይ ማሰቃልያ ቦላ ፑደ ደንዳና በሴ።

16 “ጸሳ ናኣ አማንያ ኡባይ መድና ደኡዋ አካናጥ አትን፡ ጳየና ማላ፡ ጸሳይ ሀ አላምያ አሳ ሎይሰ ሲቄዳ ድራዉ፡ ባረ መጽ እት ናኣ እማዳ።

17 አያዉ ሳጥ፡ ጸሳይ ባረ ናኣ ሀ አላምያ አሳ ፕርዳናዉ ከትቤና፤ ሽን ኡንቲንታ አ ባጋና አሻናዉ ከቲዳ።

18 “እ ናኣ አማንያ ኦንነ ፕርደተና፤ ሽን ናኣን አማነና ኦንነ፡ ጸሳ ናኣ እቱዋ አማንቤና ድራዉ፡ ሀእካ ፕርደት ኡቲዳ።

19 አሳ ቦላ ይያ ፕርዳይ ሀዋ፡ ፖኡ ሀ አላምያ ዬዳ፤ ሽን አሳ ከታይ ኢታ ግድያ ድራዉ፡ ፖኡዋጥ አሊደ፡ ጳማ ሲቄዳ።

20 ኢታባ ኦልያ ኦንነ ፖኡዋ እጹ፤ አያዉ ሳጥ፡ ባረ ከታይ ቆንጨና ማላ፡ ፖኡዋኮ ሺቀና።

21 ሽን ቱሙዋ ኦልያ ኦንነ ጸሳይ አዛዜዳዋዳን፣ እ ኦሌዳዋ ፖኡ ቆንጭሳና ማላ፣ ፖኡዋኮ ሺቄ” ያጌዳ።

የሱሳነ ጸማቅያ ዮሃንሳ

22 ሄዋፕ ጉይያን፣ የሱሳነ አ ካልያዋንቱ ይሁዳ ጋድያ ቤድኖ፤ የሱሳ ሄ ጋድያን ኡንቱንቱና አማራዳ ዋድያ ኡቲደ፣ አሳ ጸማቂደ ደኤ።

23 ቃይ ዮሃንሳ ሳሌመ ማታን ደእያ ሄኖና ግያ ሳን ዋጋ ሃላይ ደእያ ድራዉ፣ አሳይ እኮ ዪና ጸማቄ።

24 ሄዌ ሀኔዳዌ ዮሃንሳ ቃሽታናፕ ካሰና።

25 ሄዋፕ ጉይያን፣ ዮሃንሳ ካልያዋንቱና አማራዳ አይሁዳቱዋ ሜቻ ዋጋባ * ፓሉመቲድኖ።

26 ኡንቱንቱ ዮሃንሳኮ ቢደ፣ “ታማርሰያዎ፣ ዮርዳኖሳ ሻፋፕ ሄፍንላን ኔናና ደእያዌ፣ ኔን አባ ማርካቶዌ፣ በእ ሀእ ጸማቄ፤ አሳይ ኡባይካ እኮ ቤ” ያጌድኖ።

27 ዮሃንሳ ዛሪደ፣ “ጸሳይ እማና ቆዮፕ፣ አሳይ አይነ አካናዉ ዳንዳየና።

28 ታን ክርሰቶሳ ግድከ፤ ሽን ታን አፕ ሰንላዉ ከተታድ’ ጌዳዋ ህንተ ህንተንቱ ሁጳዉ ማርካ።

29 ሞሽራ ማጫዉና ደእያ ኡራይ እካ ሞሽራ፤ ሄ ሞሽራ ምያታይ ኡቁደ፣ እ ግያዋ ሰሰያዌ አ ሃሳያን ዳር ናሽቴ። ሄዋ ድራዉ፣ ሀዌ ታ ናሽቻይ ፖለቲዳ።

30 እ ዳርና ታ ጉጸና በሴ” ያጌዳ።

31 ቦላፕ ይያዌ ኡባፕ ቦላ። ሳኦፕ ቤቴዳዌ ሳኦሳ። እካ ሳኦባ ሃሳዬ። ሳሉዋፕ ይያዌ ኡባፕ ቦላ።

32 እ ባረ በኤዳባነ ሰሴዳባ ማርካቴ፤ ሽን አ ማርካተላ አክያዌ ባዋ።

33 አ ማርካተላ አክያ ኦንነ ጸሳይ ቱማንቻ ግድያዋ ሄዋን ማርካቴ።

34 ጸሳይ ከቴዳዌ ጸሳ ቃላ ኦዴ፤ አያዉ ጎፕ፣ ጸሳይ ባረ ጌሻ አያና ፓላህሲደ አሜ።

35 ጸሳይ ባረ ናኦ ሲቁደ ኡባባ አ ኩሽያን ዋሌዳ።

36 ናኦ አማንያ ኡራዉ መድና ደኤ ደኤ፤ ሽን ናኦ አማንናዋ ቦላ ጸሳ ሀንቁ ደአናዋፕ አትን፣ እ ደኡዋ በኤና።

* 3:25 አይሁዳቱዋ ሜቻ ዋጋባ- ሀዋ ጉሳይ አይሁዳቱ ባረንቱ ጎይናና ጋላናዉ ኦልያ ዲማ ዲማ ባረንታ ሜቻባይነ ባረንቱ ሳንያ ሜጭያ ዋጋቱ ደእያዋ በሴ።

4

የሱሳን ሳማርያ ሞሽራቶ

1-3 የሱሳን የሃገሳዎፕ ዲርያ ባረና ካልያዎንታ ባረኮ ሺሼነ ጸማቄ ግያዎ ፓርሳዎቱ ሰሴዳዎ የሱሳን ኤሬዳ ዎደ፣ ይሁዳ አገደ፣ ጋሊላ ቤዳ፤ ግድግዳ፣ የሱሳን ካልያዎንቱ ጸማቄዎፕ አትን፣ የሱሳን ባረ ሁጳው ኦናን ጸማቅቤና።

4 ጋሊላ ቤዳ፣ ሳማርያና አጳናዌ አ አሸናባ ግዴዳ።

5 ሄዎ ድራው፣ ያቆብ ባረ ናኦ የሴፎ እሜዳ ጋድያ ማታን ደእያ ሰካሮ ጌተትያ ሳማርያ ካታማ ቤዳ።

6 ሄ ሳኦን ያቆባ ሃላ ኦላይ ደኤ፤ የሱሳን ሀመታን ደቡሪደ፣ ሄ ሃላ ኦላ ማታን ኡቴዳ። ሄ ዎደ ሳኦይ ኡሱፑን ሳትያ ሄራ።

7 ሳማርያ ሞሽራታ ሃላ ዲቃናው ዬዳውኖ የሱሳን፣ “ታና ሃላ ኡሻርኪ!” ያጌዳ።

8 የሱሳን ካልያዎንቱ ቁማ ሻማናው ካታማ ቤድኖ።

9 ሄ ሞሽራታ ዛራደ አ፣ “ኔን አይሁዳ አሳ ግዳደ፣ ሳማርያ ማጫ አሳ ግዴዳ ታና፣ ዎታ ደኡዎ እምያ ሃላ ኡሻ ጋይ?” ያጋዲ፤ አያው ጎፕ፣ አይሁዳቶን ሳማርያ አሳው እትፕተላይ ባይና ድራሳ።

10 የሱሳን ዛራደ እዞ፣ “ኔን ጸሳ እሞታን ቃይ ኔና ታና ሃላ ኡሻ፣ ግያዌ ኦንንቶ ኤርያዎ ግድንቶ፣ አ ዎሳናሳ፤ እካ ነው ደኡዎ እምያ ሃላ እማና” ያጌዳ።

11 ሞሽራታ ዛራደ፣ “ሳዳው፣ ነው ዲቁያባይ ባዎ፤ ኦላይካ ጨሙዎ። ያትና፣ ደኡዎ እምያ ሃላ ሀቃፕ አካኒ?”

12 ኑው ሀ ሃላ ኦላ እሜዳ ኑ አውዎ ያቆባፕ ኔን ዳራይ? እ፣ አ ናናይነ አ መሂ ሀዎፕ ኡሼድኖ” ያጋዲ።

13 የሱሳን ዛራደ፣ “ሀ ሃላፕ ኡሽያ ኦንነ ላኤንሉዎ ሳመታናዎ።

14 ሽን ታን እምያ ሃላ ኡሽያ ኦንነ ላኤንሉዎ ሳመተና። ታን እምያ ሃላይ ሄ አ ግድን መድና ደኡዎሰ ፑልትያ ፑልቱዎ ግዳናዎ” ያጌዳ።

15 ሞሽራታ፣ “ሳዳው፣ ታን ሳመተና ማላነ ሃላ ትካናውካ ሃ ዬና ማላ፣ ታው ሄ ሃላ እማ!” ያጋዲ።

16 የሱሳን እዞ፣ “ባደ ነ አሰና ጾሳደ ሃ ሰማ” ያጌዳ።

17 ሞሽራታ ዛራደ፣ “ታው አሰናይ ባዎ” ያጋዲ።

የሱሳን፣ “ታው አሰናይ ባዎ ግያዎን ቱሙዎ ጋዲ።

18 ኔን እቼሹ አሰና ገላዳ፤ ሀእ ኔናና ደእያ ብታኒ ነ አሰና ግደና። ኔን ሀእ ታዉ ኦዴዳዌ ቱማ” ያጌዳ።

19 ሞሽራታ ቃይ፡ “ጎዳዉ፡ ኔን ሩብያ ግድያዋ ታ ሀእ ኤራድ፤

20 ኑ ሳማርያ አሳ አዎቱ ሀ ደርያን * ጎይኔድኖ፤ ሽን አይሁዳቱ ሀንተንቱ አሳይ ጸሳዉ ጎይናናዉ በሰያ ሳአይ የሩሳላመና ያጌታ” ያጌዳ።

21 የሱሰ፡ “ሀ ሞሽራቱ፡ ታና አማና፤ ሀ ደርያን ዎይ የሩሳላመን አዉዋ ጸሳዉ ሀንተንቱ ጎይነና ዎዲ ያናዋ።

22 ሀንተንቱ ሳማርያ አሳይ ሀንተ ኤረናባዉ ጎይኒታ፤ ጸሳይ ኑና አይሁዳቱዋ ጎኤቲደ አቶተላ አሀያ ድራዉ፡ ኑን ኑ ኤርያዎ ጎይኔቶ።

23 ሽን አዉዋ ጸሳዉ ቱሙዋፕ ጎይንያዋንቱ አ፡ ጌሻ አያና ዎልቃንነ ጸሳ ጸሳተላዳን ጎይንያ ዎዲ ማታቱዳ፤ ኡባ ሀእካ ጋኬዳ። አያዉ ጎፕ፡ አሳ ባረዉ ጎይናና ማላ፡ አዉ ጸሳይካ ሀ ኡግያን ጎይንያዋንታ ኮዬ።

24 ጸሳይ አያና፤ አዉ ጎይንያዋንቱካ ጌሻ አያና ዎልቃን ጸሳ ጸሳተላዳን ጎይናናዉ በሴ” ያጌዳ።

25 ሞሽራታ፡ “ማሰሀያ ጌተትያ ኦከቶዌ ያናዋ ታን ኤራይ። እ ይያ ዎደ ኑዉ ኡባባ ኦዳናዋ” ያጌዳ።

26 የሱሰ፡ “ሀ ኔናና ሃሳይያዌ ታን አ” ያጌዳ።

27 ሀዋ ኡንቱንቱ ሃሳይሽን፡ የሱሳ ካልያዋንቱ ቤዳሳፕ ሰሜድኖ። የሱሰ ሞሽራትና ሃሳይሽን ኡንቱንቱ በኢደ ዳርሰ ማላለቱድኖ፤ ሽን ሞሽራቶ፡ “አያ ኮያይ?” ዎይ የሱሳ፡ “አናና አያዉ ሃሳያይ?” ጌደ ኦቾዌ ኦንነ ባዋ።

28 ሄዋፕ ጉይያን፡ ሞሽራታ ባረ ሃላ ኦቱዋ አጋ ባሻ ጉየ ካታማ ባደ አሳዉ፡

29 “ታን ኦሌዳዋ ኡባ ታዉ ኦዴዳ ብታንያ በአናዉ ደንድተ፤ ሄዌ ክርሰቶሳ ግዳንዴሻ?” ያጌዳ።

30 አሳይ ካታማፕ ከሲደ፡ የሱሳኮ ቤዳ።

31 ሄዌ ሀንሽን፡ አ ካልያዋንቱ የሱሳ፡ “ጉላባ ማርኪ!” ያጌደ ዎሴድኖ።

32 ሽን አ፡ “ታዉ ሀንተንቱ ኤረና ቁማይ ታን ሞያዌ ደኤ” ያጌዳ።

33 ሄዋ ድራዉ፡ አ ካልያዋንቱ ባረንቱ ግደን፡ “አዉ ሞያባ አሄዳ አሳይ ደአንዴሻ?” ያጌድኖ።

* 4:20 ሀ ደርያን፡ ግያዌ ደርያ ጌርዛና ግዲደ ሴኬማ ጌተትያ ካታማ ማታን ደእያዋ።

34 የሱስ ኡንቱንቶ፡ “ታ ቁማይ ታና ኪቴዳዋ ሸንያ ኦሱሳነ ኦ ኦሱዋ ፖሉሳ።

35 ህንተንቱ፡ ሓይዲ አገናፕ ጉይያን፡ ካላይ ጫከታናዋ ጊክቱዬ? ታን ህንተንቶ ኦዲይ፤ ጎሻ ሎይሐ ጸልተ፤ ካላይ ጫካ በሴዳ።

36 ዘርያዌን ጫክያዌ እትፕ ሰሸታና ማላ፡ ጫክያዌ ድርጉዋ አኬነ ካላ መድና ደኦ ሸሺ።

37 ሀ ጋሱዋን፡ ሓቱ ዘሬ፤ ቃይ እቱ ጫኬ፣ ግያ ሃሳያይ ቱማ።

38 ህንተንቱ ዳቡርቤናዋ ጫካና ማላ፡ ታን ህንተንታ ኪታድ፤ ሀራቱ ኦሐ ዳቡሬድኖ፤ ህንተንቱ ሀራቱዋ ዳቡራን ገሌድታ” ያጌዳ።

39 ምሸራታ፡ “እ ታን ኦሌዳ ኡባባ ኦዴዳ” ጋደ ማርካቴዳ ድራዉ፡ ሄ ካታማን ደእያ ሳማርያ አሳፕ ጮራይ የሱሳ አማኔዳ።

40 ሳማርያ አሳይ የሱሳኮ ዬዳ ዋደ፡ ባረንቱ ማታን ጋምአና ማላ፡ የሱሳ ዋሰና እ ያን ላኡ ጋላሳ ኡቴዳ።

41 እ ኦድያ ቃላ ድራዉ፡ ካሰዋፕ ጮራ አሳይ አማኔዳ፤

42 ቃይ ኡንቱንቱ ምሸራቶ፡ “ኑን ኑ ሀጳዉ እ ግያዋ ሰሲደ አማኔዳዋፕ አትን፡ ኔን ማርካቴዳ ድራሳ ግደና፤ እ ቱሙ አላምያ አሳ አሸያዋ ግድያዋካ ኑን ኤሬዳ” ያጌድኖ።

የሱስ እት ካፑዋ ናኣ ፓሌዳ

43 ላኡ ጋላሳፕ ጉይያን፡ የሱስ ሳማርያፕ ከሲደ፡ ጋሊላ ጋድያ ቤዳ።

44 አያዉ ጎፕ፡ እ ባረ ሀጳዉ፡ “ናቢ ባረ ጋድያን ቦንቼተና” ያግ ኦዴዳ።

45 የሱስ ጋሊላ ጋኬዳ ዋደ፡ ጋሊላ አሳይ ኦ ሞኬዳ፤ ፓሰጋ ቦንቻያ ጋላሰ ኡንቱንቱ የሩሳላመን ደእያ ድራዉ፡ እ ኦሌዳ ኡባባ በኤድኖ።

46 የሱስ ሃላ ዋይንያ ኡሻ ከሴዳ፡ ጋሊላን ደእያ ቃና ካታማ ቤዳ። ቅፍርናሆማን ኦ ናኦይ ሳከትያ፡ ካትያ ጎሊን ኦሐያ እት ካፑ ደኤ።

47 የሱስ ይሁዳፕ ጋሊላ ዬዳዋ ሄ ካፑ ሰሲደ፡ አኮ ዬደ ሀይቃናዉ ማቴዳ ባረ ናኦ ቢደ ፓሳና ማላ፡ የሱሳ ዋሴዳ።

48 የሱስ ሄ ካፑዋ፡ “ጸሳይ ኦሐያ ማላታን ሄቾ ጊሰያባ በኤናን ደኤደ፡ ህንተንቱ አይነ አማንክታ” ያጌዳ።

49 ሄ ካፑ ዛሬደ፡ “ጎዳዉ፡ ታ ናኦይ ሀይቃናን ደእሸን፡ ታናና ባርኪ” ያጌዳ።

50 የሱስ፡ “ባ፤ ነ ናኦይ ፓጸ ደአናዋ!” ያጌዳ።

ሄ ካፑ የሱስ ጌዳዋ አማኒደ ቤዳ።

51 እ ባረ ጎለ ቢሸን፣ አ ቆማቱ አናና ኦግያን ጋከቲደ አ፣ “ኅ ናአይ ፓጻ ደኤ” ጌድኖ።

52 እ ባረ ቆማቱዋ ባረ ናአው አይ ሳትያን ኬኬደንቶ ኦቻና ኡንቱንቱ፣ “ዝኖ ላፑ ሳትያን ቆጶ አ አጌዳ” ያጌድኖ።

53 ናአ አው የሱስ ባረው፣ “ኅ ናአይ ፓጻ ደአናዋ” ጌዳዌ ሄ ሳትያና ግዴዳዋ ሀሳዬዳ። ሄዋ ድራው፣ እነ አ ሶይ አሳይ ኡባይ አማኔድኖ።

54 ሀዌ የሱስ ይሁዳፕ ጋለላ ዪደ ኦፊዳ ላኤንላ ማላታ።

5

የሱስ ጉንዳ ብታንያ ዳጋት ኡቴዳ ሃላ ማታን ፓፊዳ

1 ሄዋፕ ጉይያን፣ የሱስ አይሁዳቱ ቦንቻያ ባላው የሩሳላመ ቤዳ።

2 የሩሳላመን ደርሳ ፐንግያ ማታን እብራይስጻ ቃላን ቤተሳይዳ ጌተትያ ዳጋት ኡቴዳ ሃላይ ደኤ፤ ሄ ዳጋት ኡቴዳ ሃላ ዩይ አጭዳ እቸሹ ካሻይ ደኤ።

3 ሄዋን ጮራ ሀርጋንቻቱ፣ ቆቃቱ፣ ዋባቱነ ሰሌዳዋንቱ ግሴድኖ። [ሃላይ ቃጽያዋ ናጊኖ።

4 አያው ጎፕ፣ እት እት ገደ ጎዳ ኪታንቻይ ሄ ዳጋቱዳ ሃላኮ ገሊደ፣ ሃላ ቃፊ፣ ሃላይ ቃጾዳዋፕ ጉይያን፣ ኮይሮ ገሌዳ ኡራይ ባረና ኦይቄዳ አይ ሀርግያፕካ ፓጶ።]*

5 ሄዋን ሀታማነ ሆሰፑን ላይላ ሳከቱዳ እት ብታኒ ደኤ።

6 ሄ ብታኒ ሄዋን ግሴዳዋ የሱስ በኢደ፣ ዳሮ ዋድያ ሳከቱዳዋካ ኤሪደ ብታንያ፣ “ፓጻናው ኮያይ?” ያጌዳ።

7 ሳከትያ ብታኒ ዛሪደ፣ “ኅዳው፣ ሃላይ ቃጽያ ዋደ፣ ታና ሃላን የግያ አሳይ ቆይዳ፤ ታን ገላና ሀንያ ዋደ፣ ሀራ ኡራይ ታፕ ካስቲደ ገል አጌ” ያጌዳ።

8 የሱስ አ፣ “ደንዳ ኤቃ፤ ኔን ግሶዋ ቶካደ ባ” ያጌዳ።

9 ብታኒ ኤለካ ፓጽ አጌዳ፤ ባረ ግሶዋ ቶኪደ ቤዳ።

ሄዌ ሀኔዳዌ ሳምባታ ጋላሳና።

10 ሄዋ ድራው፣ አይሁዳቱ ፓጶዳ ብታንያ፣ “ሀቼ ሳአይ ሳምባታ፤ ኔን ነ ግሶዋ ቶካ ብያዌ ዋጋ ግደና” ያጌድኖ።

* 5:4 ሀ ፓይዳ እት በን ኮይሮቲደ ጻፈቱዳ ጌሻ ማጻፋቱዋን ባዋ። 5:10 ናህ. 13:19፣ ኤር. 17:21

11 ሸን ብታኒ፡ “ታና ፓሌዳዌ፡ ና ግሱዎ ቶካደ ባ፣ ያጌዳ” ጊደ ኡንቱንቶ ዛሪዳ።

12 ኡንቱንቶ ኦ፡ “ኔና፡ ና ግሱዎ ቶካደ ባ፣ ጌዳዌ እ ኦኔ?” ጊደ ኦቼድኖ።

13 ሸን ሄዋን ጮራ አሳይ ደእያ ድራዉነ፡ የሱሰካ ጌመቲዳ ድራዉ፡ ብታኒ ባረና ፓሌዳዌ ኦነንቶ ኤረና።

14 የሱሰ ጉየፕ ሄ ብታንያ ጌሻ ጎልያን ደሚደ፡ “በእ፡ ኔን ሀእ ፓጸዳ፤ ሀዋፕካ ኢታባይ ኔና ጋከና ማላ፡ ላኤን፦ ናጋራ ኦሉፓ” ያጌዳ።

15 ሄዋፕ ጉይያን፡ ብታኒ ቢደ፡ ባረና ፓሌዳዌ የሱሳ ግድያዎ አይሁዳ አሳ ካፓቶ ኦዴዳ።

16 የሱሰ ሀዋ ሳምባታን ኦሌዳ ድራዉ፡ ኡንቱንቶ የሱሳ የደሳን ዋይሱዋ ደሚድኖ።

17 የሱሰ ዛሪደ ኡንቱንቶ፡ “ታ አቡ ኡባ ዎደ ኦሌ፤ ታንካ ኦላናዉ በሴ” ያጌዳ።

18 ሄዋ ድራዉ፡ የሱሰ ሳምባታ ጋላሳ ቦንቼና ድራ ጸላላሳ ግደናን፡ ባረና ጸላና ቃራዪደ፡ “ጸላይ ታ አባ” ጌዳ ድራዉ፡ አይሁዳ አሳ ካፓቶ እ ዎዳናዉ ካሰዋፕ ምንሲደ ኮዪኖ።

ጸሳ ናአ ማታ

19 የሱሰ ዛሪደ ኡንቱንቶ፡ “ታን ህንተንቶ ቱሙዋ ኦዳይ፤ ናአይ ባረካ አይነ ኦ□ና። እ ባረ አቡ ኦላሸን በእያዎ ጸላላ ኦሌ፤ አዉ ኦላያዎ ናአይካ ኦሌ።

20 አያዉ ጎፕ፡ አዉ ባረ ናአ ሲቄ፤ ቃይ እ ኦላያ ኦሱዋ ኡባባ ባረ ናአ በሴ። ኡባ ህንተንቶ ማላለታና ጋካናዉ፡ እ ሀዋፕ አድያ ኦሱዋካ ባረ ናአ በሳናዋ።

21 ጋሱኔ፡ አዉ ሀይቄዳዋንታ ሀይቄዋፕ ደንሊደ ሸምፑዋና ዎላያዎዳን፡ ናአይካ ቃይ ባረ ኮዮዋንታ ሸምፑዋና ዎላ።

22-23 አሳይ ኡባይ አዉዎ ቦንቹያዎዳን፡ ናአካ ቦንቻና ማላ፡ አዉ ፕርዳ ኡባ ናአዉ እሜዳዋፕ አትን፡ እ ኦናነ ፕርደና፤ ናአ ቦንቼና ኡራይ፡ እ ኪቲዳ አዉዋካ ቦንቼና።

24 “ታን ህንተንቶ ቱሙዋ ኦዳይ፤ ታ ቃላ ሰሰያዎነ ታና ኪቲዳዋን አማንያዎ መድና ደኡ ደኤ። ሀይቄዋፕ ደኦ እ ፕኔዳዋፕ አትን፡ ፕርደተና።

25 ታን ህንተንቶ ቱሙዋ ኦዳይ፤ ሀይቄዳ አሳይ ጸሳ ናአ ኮሻ ሰሰያ ዎዲ ያናዋ፤ ሄዬኔካ ሀእ። ሄ ኮሻ ሰሰያዋንቱ ሸምፑዋና ደእና።

26 አያዉ ጎፕ፡ አዎ ደኡዋ እምያ ዎልቃይ ደእያዎዳን፡ ደኡዎ እምያ ሄ ዎልቃ ባረ ናአዉካ እሜዳ።

27 ጸሳ አዉ ባረ ናአዉ ፕርድያ ማታ እሜዳ፤ አያዉ ጎፕ፣ ናአይ አሳ ናአ።

28 “ሀዋን ማላለቶፕተ፤ አያዉ ጎፕ፣ ዱፋዋን ደእያዋንቱ ኦ ኮሻ ሰሰያ ዎዲ ዬ።

29 ሰሲደ እንቱንቱ ዱፋዋፕ ጋጸ ከሳና፤ ሎኦባ ኦፊዳዋንቱ ደኡዋን ደእናዉ ደንዳና፤ ቃይ ኢታባ ኦፊዳዋንቱ ፕርደታናዉ ደንዳናዋንታ።

የሱሳዉ ማርካቴዳ አሳቱዋ

30 “ታን ታፕ አይነ ኦላናዉ ዳንዳይከ፤ ጸሳይ ታዉ ኦዳዳዋዳን ፕርዳይ። ታ ፕርዳይ ቱማ፤ አያዉ ጎፕ፣ ታን ታና ኪቴዳዋ ሸንያ ፖልያዋፕ አትን፣ ታን ደሰያዋ ኦሐከ።

31 “ታን ታ ሁጸዉ ታባ ማርካቶፕ፣ ታ ማርካተላይ ቱማ ግደና።

32 ታባ ማርካትያዌ ሀራይ ደኤ፤ እ ታባ ማርካትያዌ ቱማ ግድያዋ ታን ኤራይ።

33 “ሀንተንቱ የሃንሳኮ አሳ ኪትና፣ እ እንቱንቶ ቱሙዋ ማርካቴዳ።

34 ታን ሄዋ ሀንተንታ አትኖ ጋደ ግያዋፕ አትን፣ አሳ ማርካተላይ ታዉ ኮሻና ግደና።

35 የሃንሰ ሙቃዳዳን፣ ኤጼዳነ ፖእሴዳ፤ ሀንተንቱካ አማራዳ ዎድያ እ ፖኡዋን ናሸታናዉ ኮዬድታ።

36 “ሸን ታዉ የሃንሳዋፕ እድያ ማርካተላይ ደኤ፤ አያዉ ጎፕ፣ ታን ዉርሳናዉ ታ አቡ ታዉ እሜዳ ኪታይ፣ ሀ ታን ኦሐያዌ፣ እ ታና ኪቴዳዋ ግድያዋ ማርካቴ።

37 “ቃይ ታና ኪቴዳ ታ አቡ ባረ ሁጸዉ ታባ ማርካቴ። ሀንተንቱ ኦ ኮሻ እይነ ሰሰበይክታ፤ እ ማላካ በእበይክታ።

38 እ ኪቴዳዋ አማነና ድራዉ፣ ኦ ቃላይ ሀንተንቱ ዎዛናን ባዎ።

39 “ጸሳ ማጸፋቱዋፕ መድና ደኡዋ ደምያዋ ሀንተዉ ማላትና፣ እንቱንታ ብዲታ፤ እንቱንቱካ ታባ ማርካትያዋንታ።

40 ሸን ደኡዋ ደማናዉ ታኮ ይያዋ ሀንተንቱ ኮይክታ።

41 “ታን አሳፕ ቦንቹዋ ኮይከ።

42 ሸን ታን ሀንተንቱ ዎዛናን ጸሳ ሲቁ ባይናዋ ኤራይ።

43 ታን ታ አቡ ሱንላን ያድ፤ ሸን ታና አክበይክታ። ሸን ሀራ አሳይ ባረ ሱንላን ይያ ዎድ፣ ኦ እኪታ።

44 ህንተንቱ እቱ እቱዎ ቦንቹታ፤ ሸን እት ጸሳጥ ይያ ቦንቹዎ ኮይክታ። ያትና፡ ዋኒደ አማናናው ዳንዳዩተ?

45 “ታን ታ አቡ ሰንፋን ህንተንታ ሞትያዎ ህንተው ማላቶፖ፤ ህንተንታ ሞትያዌ፡ ህንተ ህደታ ዎሐያ ሙሳ።

46 ህንተንቱ ሙሳ አማኔዳባ ግድንቶ፡ ታናካ አማናንታ፤ አያው ጎጥ፡ ታባ ጸፌዳዌ አ።

47 ሸን ህንተንቱ እ ጸፌዳዎ አማናናን እጸጥ፡ ታን ግያዎ ዎት አማናንቱ?” ያጌዳ።

6

የሱስ 5,000 አሳ ሞዜዳ

(ማቶሳ 14:13-21፤ ማር. 6:30-44፤ ሉቃሳ 9:10-17)

1 ሃዋጥ ጉይያን፡ የሱስ ጋሊላ አባጥ ዎይ ጽብርያደሳ አባጥ ሄፍንፋ ጥኔዳ።

2 እ ሀርጋንቻቱዎ ቦላ ኦፊዳ ዎልቃማ ማላታ በኤዳ ድራው፡ ጮራ አሳይ አ ካሌዳ።

3 የሱስ ደርያ ከሲደ፡ ያን ባረና ካልያዋንቱና እትጥ ኡቴዳ።

4 አይሁዳቱ ቦንቶያ ፓሰጋ ጋላሳይ ጋኬዳ።

5 የሱስ ሰንፋኮ ጸሊደ፡ ጮራ አሳይ ባረኮ ይያዎ በኢደ ፕልጸሳ፡ “ሀ አሳ ኡባ ሞዛናው ግድያ ቁማ ሀቃጥ ሻማኔ?” ያጌዳ።

6 እ ሃዎ ፕልጸሳ ፓጫናው ጌዳ፤ አያው ጎጥ፡ እ ባረ ሁጸው አያ ኦፋና በሰንቶ ኦፋናባ ኤሬ።

7 ፕልጸሰ ዛሪደ የሱሳ፡ “ሁጲያን ሁጲያን፡ ሀራይ አቶ እት እት ባርሱዎ ጋፋናው፡ ላኡ ጾቱ ድናርያን ሻሜዳ ኡክላይካ ግድና” ያጌዳ።

8 ቃይ የሱሳ ካልያዋንቱጥ እቱ፡ ሰሞን ጳጵርሳ እሻይ እንድራሰ።

9 “ባንጋ ኡክፋ እቼሹን ላኡ ሞሊ ደእያ እት ናአይ ሀዋን ደኤ፤ ሸን ሀ አሳ ኡባው ሃዌ ዎት ግዳኔ?” ያጌዳ።

10 የሱስ ባረና ካልያዋንታ፡ “አሳይ ኡታናዳን አሰተ” ያጌዳ። ሄ ሳእን ዳር ማታይ ደኤ። አሳይ ኡባይ ኡቴዳ፤ አቱማ አሳይ እቼሹ ሻኦ ግድያዎ።

11 የሱስ ኡክፋ አኬዳ፤ ጸሳ ጋላቲደ፡ ሃዋን ኡቴዳ አሳው ግሼዳ። ሞልያካ ሃዎዳን ኦፋና አሳይ ባረ ኮፎዳዎ ኬና ሜዳ።

12 ኡንቱንቱ ኡባይ ካሌዳዎጥ ጉይያን፡ የሱስ ባረና ካልያዋንታ “እትባይካ ጮ ባየና ማላ፡ አቴዳ ደካ ሺሸተ” ያጌዳ።

13 ሄዋ ድራው፡ ኡንቱንቱ ኡባካ ሺሺድኖ፤ አሳይ ካልና አቲዳ ባንጋ ኡክላ ዶካ ሺሺድ፡ ታማነ ላኡ ዛሞቤልያ ኩንጤድኖ።

14 አሳይ የሱስ ኦፊዳ ዋልቃማ ማላታ በኤዳ ዋደ፡ “ሀዌ ቱሙዋጥ ሀ ሳኦ ያና ጌዳ ናብያ” ያጌድኖ።

15 ኡንቱንቱ ዪደ ባረና ዋልቃን ኦይቂ ካትያ ኦፋናው ሀንያዋ የሱስ ኤሪድ፡ ባረካ ደርያ ቦላ ሸረቲደ ከሴዳ።

የሱስ አባ ቦላን ሀመቲደ ቤዳ
(ማቶሳ 14:22-33፤ ማር. 6:45-52)

16 ሳኦይ ኦማርሴዳ ዋደ፡ የሱሳ ካልያዋንቱ አባኮ ቤድኖ፤

17 ሳኦይ ቃሜዳ፤ ሸን የሱስ ኡንቱንቱኮ ሄ ሳቲ ጋካናው ይቤና፤ ሄዋ ኡንቱንቱ ዋንግርያን ገሊድ፡ አባ ፕን ሄፍንላ ቅፍርናሆማ ቤድኖ።

18 ዋልቃማ ጫርኩ ጫርኬዳ ድራው፡ አባይ ቃጾዳ፤

19 እት ሳትያ ኬና ኡንቱንቱ አባ ሻጎዋጥ ጉይያን፡ የሱስ አባ ቦላና ሀመቲደ ይያዋ በኢደ ያዬድኖ።

20 ሸን እ፡ “ያዮፕተ፤ ታናቲ!” ያጌዳ።

21 ኡንቱንቱ ዋንግርያን አ ገልሳናው ኮዬድኖ፤ ዋንግሪ ኡንቱንቱ ብያሳ አባ ጋጾ ኤለካ ጋክ አጌዳ።

የሱስ ደኡዋ ኡክላ

22 ዋንተላ ጋላስ፡ አባጥ ሄፍንላና አቲዳ ጮራ አሳይ አባ ቦላ እት ዋንግርያ ጸላላይ ደእያዋ በኤድኖ፤ የሱስ ባረና ካልያዋንቱና ዋንግርያን ገሊድ፡ ኡንቱንቱና ቤናን፡ ኡንቱንቱ ባረካ ቤዳዋ አኬኬድኖ።

23 ሸን ጽብርያደሳጥ ሀራ ዋንግራቱ የሱስ ጸሳ ጋላትና፡ አሳይ ኡክላ ሜዳሳ ማታ ዬድኖ።

24 አሳይ የሱስ ዋይ አ ካልያዋንቱ ሄዋን ባይናዋ በኢድ፡ የሱሳ ኮያናው ዋንግርያን ገሊድ፡ ቅፍርናሆማ ቤድኖ።

25 አሳይ የሱሳ አባጥ ሄፍንላን ደሜዳ ዋደ፡ “ታማርሰያዎ፡ ሀዋ አዉደ ያዲ?” ያጌድኖ።

26 የሱስ ዛሪድ፡ “ታን ሀንተንቶ ቱሙዋ ኦዳይ፤ ሀንተንቱ ታና ኮይያዌ ኡክላ ሜዳ ድራሳን ካሌዳ ድራሳ ግድያዋጥ አትን፡ ዋልቃማ ማላታ በኤዳ ድራሳ ግደና።

27 መድና ደኡዋ ቁማው፡ ታን አሳ ናኦይ ሀንተንቶ እማናዎ፡ ኦሐተጥ አትን፡ ሳምያ ቁማው ኦሐፕተ፤ አያው ሳፕ፡ አዉ ጸሳይ ሄዋ ጲሸሳናው ማታፋ አታሞ ዋፊዳ” ያጌዳ።

28 ሄዋጥ ጉይያን ኢንቱንቱ፣ “ኑን ጸሳ ኦሱዋ ኦላናዉ ኢያ ኦላናዉ በሲ?” ያጊደ የሱሳ ኦቹድኖ።

29 የሱሰ ዛሪደ፣ “ሀንተንቱ ኦላና ማላ፣ ጸሳይ ኮይያ ኪታይ ሀዋ፤ እ ኪቱዳዋን አማንተ” ያጊዳ።

30 ኢንቱንቱ ዛሪደ፣ “ኑን በኢደ፣ ኔናን አማናና ማላ፣ አይ ዋልቃማ ማላታ ኦላኒ? ኢያ ኪተታኒ?”

31 ጸሳ ማጸፋን፣ “ኢንቱንቱ ማና * ማላ ሳሉዋጥ ኡክላ እሜዳ፣ ያገት ጸፈቶዋዳን፣ ኑ አዎቱ መላ ቢታን ማና ሜድኖ” ያጊድኖ።

32 የሱሰ፣ “ታን ሀንተንቶ ቱሙዋ ኦዳይ፤ ሀንተንቶ ሳሉዋጥ ቱሙ ኡክላ እምያዌ ታ አባጥ አትን፣ ሀንተንቶ ሳሉዋጥ ኡክላ እሜዳዌ ሙሳ ግደና።

33 ኢያዉ ሳጥ፣ ቱማ ግዳዳ ጸሳ ኡክላይ፣ ሳሉዋጥ ዋድያዌ ሀ አላምያ አሳዉ ደኡዋ እሜ” ያጊዳ።

34 ኢንቱንቱ ዛሪደ፣ “ሳዳዉ፣ ኑካ ሄ ኡክላ ኡባ ዋደ እማ” ያጊድኖ።

35 የሱሰ፣ “ታን ደኡዋ ኡክላ፤ ታኮ ይያ ኡራይ ኡባካ ኮሻተና። ቃይ ታና አማንያ ኡራይ አይነ ሳመተና።

36 ሸን ታን ሀንተንቶ ኦዳዳዋዳን፣ ሀንተንቱ ታና በኤድታ፤ ሸን አማንክታ።

37 ታ አቡ ታዉ እምያ ኡባይ ታኮ ያናዋ፤ ቃይ ታኮ ይያ ኦናን ኡባካ ታን ካረ የድከ።

38 ኢያዉ ሳጥ፣ ታን ታና ኪቱዳዋ ሸንያ ፖላናዉ ሳሉዋጥ ያድጥ አትን፣ ታ ሸንያ ፖላናዉ ያበይከ።

39 ታና ኪቱዳዌ ኮይያዌ ሀዋ፤ ታን እ ታዉ እሜዳ ኡባቱዋካ ዉርሰላ ጋላስ ደንላናጥ አትን፣ እቱዋካ ባይዛና ማላ ኮየና።

40 ኢያዉ ሳጥ፣ ታ አቡ ኮይያዌ ሀዋ፤ ታና ናኦ በኢደ፣ አማንያ ኡባቱ መድና ደኡዋ አካናዋንታ፤ ታንካ ሄ ኡባቱዋ ዉርሰላ ጋላስ ደንላና” ያጊዳ።

41 የሱሰ፣ “ታን ሳሉዋጥ ዋድዳ ኡክላ” ጌዳ ድራዉ፣ አይሁዳቱ አ ቦላ ዙዙሜድኖ።

42 ኢንቱንቱ፣ “ሀዌ ኑን አ አዉዋን አ አቶ ኤርያ ዮሴፎ ናኦ የሱሳ ግደኔ? ያትና፣ እ ዋጊደ፣ ‘ታን ሳሉዋጥ ዋዳድ’ ጋናዉ ዳንዳዪ?” ያጊድኖ።

* **6:31 ማና**- እስራኤልያ አሳይ ግብጹ ጋድያጥ ከሰ ካናን ቢደ መላ ቢታን ሀመቲደ ብያ ዋደ፣ ኢንቱንቱ ማናዳን ጸሳይ እሜዳ ማልእያ ቁማ። ማና ጉሳይ እብራይስጽያ ቃላን “ሀዌ እዬ?” ግያዋ። **6:31** ከሳ 16:4፣ 15፤ ማዝ. 78:24

- 43 የሱስ ዛሪደ፣ “እቱ እቱዋና ዙዙምያዎ አግተ።
- 44 ታና ኪቱዳ ታ አቡ ታኮ እሄዳ አሳጥ አትን፣ ታኮ ያናዉ ዳንዳይያ አሳይ ባዋ፤ ታንካ ዉርሰላ ጋላስ አ ደንላና።
- 45 ናባቱ ‘ጸሳይ አሳ ኡባ ታማርሳና’ ያጊደ ጸፌድኖ፤ እዉ ግያዎ ሰሰያዌነ አዉዋጥ ታማርያዌ ኦንነ ታኮ ዬ።
- 46 ጸሳ ማታጥ ዬዳዋጥ አትን፣ ጸሳ በኤዳ አሳይ ባዋ፤ አ ጸላላይ ጸሳ በኤዳ።
- 47 “ታን ህንተንቶ ቱሙዋ ኦዳይ፤ ታና አማንያ ኡራዉ መጅና ደኡ ደኤ።
- 48 ታን ደኡዋ ኡክላ።
- 49 ህንተንቱ አዎቱ መላ ቢታን ማና ሚድኖ፤ ሸን ሀይቄድኖ።
- 50 አሳይ አጥ ሚደ ሀይቀና ኡክላይ ሳሉዋጥ ይያዌ ሀዋ።
- 51 ሳሉዋጥ ዎጄዳ ደኡዋ ኡክላይ ታና፤ ኦንነ ሀ ኡክላጥ ሞጥ፣ መጅናዉ ደአናዋ፤ ቃይ ሀ አላምያ አሳዉ ደኡ ግዳና ማላ፣ ታን አማና ኡክላይ ታ አሹዋ” ያጌዳ።
- 52 አይሁዳቱ፣ “ሀ ብታኒ ባረ አሹዋ ኦን ማና ማላ፣ ኑዉ ዎቲደ አማናዉ ዳንዳዬ?” ያጊደ ባረንቱ ግዴዋን ፓሉመቲድኖ።
- 53 ሄዎ ድራዉ፣ የሱስ ኡንቱንታ፣ “ታን ህንተንቶ ቱሙዋ ኦዳይ፤ ታ አሹዋ፣ አሳ ናኦ አሹዋ፣ ህንተንቱ ማና ጳዮጥ፣ ቃይ ታ ሱላካ ኡሻና ጳዮጥ፣ ህንተዉ ደኡ ባዋ።
- 54 ታ አሹዋ ምያ ኡራዉነ፣ ታ ሱላ ኡሸያ ኡራዉ መጅና ደኡ ደኤ። ታን ዉርሰላ ጋላስ ኡንቱንታ ደንላና።
- 55 አያዉ ጎጥ፣ ታ አሹ ቱሙ ቁማ፤ ታ ሱላይካ ቱሙ ኡሻ።
- 56 ታ አሹዋ ምያ ኡራይነ ታ ሱላ ኡሸያ ኡራይ ታናን ደኤ፤ ታንካ እናን ደአይ።
- 57 ደኡዋ እዉ ታና ኪትና፣ ታን አ ጋሱዋን ደእያዎዳን፣ ታና ምያ ኡራይካ ታ ጋሱዋን ደአና።
- 58 ሳሉዋጥ ዎጄዳ ኡክላይ ሀዋ፤ ህንተንቱ አዎቱ ሚደ ሀይቄዳ ማና ማላ ግደና፤ ሀ ኡክላ ምያ ኡራይ መጅናዉ ደአና” ያጌዳ።
- 59 የሱስ ቅፍርናሆማ ካታማን አይሁዳ ዎሳ ጎለን ታማርሲደ፣ ሀዋ ኦዴዳ።

መጅና ደኡዋ ቃላ

- 60 የሱሳ ካልያዋንቱጥ ዳርያ ባጋይ ሄዎ ሰሴዳ ዎደ፣ “ሀዌ ገለና ትምርትያ፤ ሀዋ ኦን አካናዌ?” ያጌድኖ።
- 61 ሸን የሱስ ባረና ካልያዋንቱ ሄዎ ዙዙሚዳዎ ኤሪደ፣ “ሀዌ ህንተንታ ጁቢ?”

62 ሰሞ ታን፣ አሳ ናአይ፣ ካሰ ደኢያሳ ጉደ ከሰሽን በአንቶ አያ ጋንቲ።

63 ጌሻ አያናይ ደኡዎ እሜ፤ አሳ ሞኖታይ አይነ ጎኤና። ታን ህንተንቶ ኦዴዳ ቃላይ አያናነ ደኡዎ።

64 ሸን ህንተንቲ ግዲዎን አማነናዎንቲ ደኢኖ” ያጌዳ፤ አያዉ ጎጥ፣ አማነናዎንቲ ሀቃዎንተንቶነ ባረና አላ እማናዌ እነንቶ የሱሰ ኮይሮፕ ዶሚደ ኤሬዳ።

65 ቃይካ የሱሰ፣ “ታ አቡፕ ግዳና ቆጥፕ ኦንነ ታኮ ያናዉ ዳንዳየና ያጋደ ታ ኦዴዳዌ ሄዎ ድራሳ” ያጌዳ።

66 ሄዎ ጋሱዎን፣ የሱሳ ካልያዎንቲፕ ጮራቱ አ አጊደ፣ ጉየ ሰሜድኖ፤ ላኤንጻ አ ካልበይክኖ።

67 የሱሰ ቃይ ታማነ ላኤ ባረና ካልያዎንታ “ህንተካ አጊደ ባናዉ ኮዩቲ?” ያጌዳ።

68 ሰሞን ጳጵሮስ ዛሬደ፣ “ጎዳዉ፣ ኦን ኦኮ ባኔ? ነዉ መጵና ደኡዎ ቃላይ ደኤ።

69 ኔን ጳሳ ጌሻ ግድያዎ ኦን አማኔቶነ ኤሬቶ” ያጌዳ።

70 የሱሰ ኡንቲንታ፣ “ታን ህንተንታ ታማነ ላአቱዎ ዶራበይክታ? ቃይ ህንተፕ እቲ ጳላህያ” ያጌዳ።

71 የሱሰ ሄዎ ሰሞና ናአ ይሁዳ አስቆሮታ † ጌ፤ አያዉ ጎጥ፣ ይሁዳይ የሱሳ ካልያ ታማነ ላአቱዎፕ እቲዎ፤ እ የሱሳ አላ እማናዎ።

7

የሱሰ ዳሰያ ባላዉ የሩሳላመ ቤዳ

1 ሄዎፕ ጉየ፣ የሱሰ ጋለላን ያ ሃ ዩዬዳ፤ አይሁዳቱ አ ዎቆናዉ ኮይያ ድራዉ፣ ይሁዳን ዩያና ኮይቤና።

2 አይሁዳቱ ቦንቶያ ዳሰያ ባላይ ጋክ ኡቴዳ።

3 ሄዎ ድራዉ፣ የሱሳ እሻቱ አ፣ “ኔና ካልያዎንቲ ኔን ኦላያዎ በአና ማላ፣ ሀዎፕ ደንዳደ ይሁዳ ጋድያ ባ።

4 አያዉ ጎጥ፣ ባረዉ ኤረታናዉ ኮይያ አሳይ ኦንነ ባረ ኦሱዎ ገንፍ። ኔን ሀዎንታ ኦላና፣ ነባ አላሞያ ኡባይ ኤሮ!” ያጌድኖ።

5 አያዉ ጎጥ፣ ሀራይ አቶ አ እሻቲካ አ አማንበይክኖ።

6 የሱሰ ኡንቲንታ፣ “ታዉ እንጀትያ ዎዲ ጋክቤና፤ ሸን ህንተንቶ አይ ዎደካ እንጀቲ።

† **6:71** አስቆሮታ፡- ሀ ቃላ ብለላይ፣ “ዎረትያ ብታንያ” ዎይ “ሀይቆ አላ አሞያ ብታንያ” ግያዎ። **7:2** ዎጋ 23:34፤ ዛረ. 16:13

7 አላሚ ህንተንታ እጻናው ዳንዳየና፤ ሽን ታን ሳኣ ኪታይ ኢታ ግድያዋ ማርካትያ ድራው፤ ታና እጾዳ።

8 ባላ ቦንቻያሳ ህንተንቱ ቢተ፤ ታው እንጀትያ ዎዲ ጋክቤና ድራው፤ ታን ባላ ቦንቻያሳ ባናዌ ብራ” ያጌዳ።

9 እ ሀዋ ጊደ፤ ጋሊላን አቱዳ።

የሱስ ዳስያ ባላሳን ቤቱዳ

10 ሽን እ እሻቱ ባላ ጋላሳ ቦንቻያሳ ቤዳዋጥ ጉይያን፤ እካ አሳይ በኤናን ጌማን ያ ቤዳ።

11 አይሁዳቱ ባላ ጋላሳ ቦንቻያሳን እ ኮዪና፤ “እ ሀቃን ደኢ?” ያጊደ፤ አ ላቢኖ።

12 አሳ ግዲዋን ዳር ዙዙንሳይ ደንዴዳ። አማራዳ አሳይ፤ “እ ሎኦ አሳ” ያጌ፤ ሀራቱ ቃይ፤ “አ፤ እ አሳ ባለጭ” ያጊኖ።

13 ሽን አይሁዳቱ ያዬዳ ድራው፤ ኦንነ አባ ቆንጭያን ሃሳየና።

14 ባላ ቦንቻያ ጋላሳ ባጋን፤ የሱስ ጌሻ ጎልያ ቢደ፤ ታማርሱዋ ደሜዳ።

15 አይሁዳቱ ማላለቲደ፤ “ሀ ብታኒ አይነ ታማረናን ሀዋ ኬና ዋን ኤራዴ?” ያጌድኖ።

16 ሄዋ ድራው፤ የሱስ ዛሪደ፤ “ታና ታማርሰያዌ ታና ኪቱዳ ጸሳ ማታጥ ይያዋጥ አትን፤ ታዋ ግደና።

17 ጸሳ ሽንያ ኦላናው ደሰያ ኦንነ ሀ ታን ታማርሰያዌ ጸሳ ማታጥ ይንቶ ዎይ ቃይ ታን ታጥ ሃሳያይታንቶ ኤራና።

18 ባረዋ ሃሳይያ ኡራይ ባረ ሁጲያው ቦንቸዋ ኮዬ፤ ሽን ባረና ኪቱዳዌ ቦንቸታና ማላ ኮይያ ኡራይ ቱማንቻ፤ እን ዎርዶባይ ባዋ።

19 ሙሴ ህንተንቶ ሀግያ እምቤኔ? ሽን ህንተጥ እቱነ ሀግያ ናገና። ታና አያው ዎቆናው ኮዪቱ?” ያጌዳ።

20 አሳይ ዛሪደ፤ “ኔናን ጸላሂ ደኤ፤ ኔና ዎቆናው ኦኔ ኮዬዳዌ?” ያጌዳ።

21 የሱስ፤ “ታን እት ዎልቃማባ ኦላና፤ ህንተንቱ ኡባይ ማላለቱድታ።

22 ህንተንቱ ናና ህንተንቱ ደካላና ማላ፤ ሙሴ ህንተንታ አዛዜዳ። ሽን ደካሉሳይ ህንተንቱ አዎቱዋና ዬዳዋጥ አትን፤ ሙሴና ይቤና፤ ሄዎ ህንተንቱ ሳምባታን አቱማ ናና ደካሊታ።

23 ሙሴ ህጊ አዛዜዳ ድራው፤ ህንተንቱ ሳምባታን ደካልያዋ ግደጥ፤ ያትና ታን እት አሳው ኩመንሳ ቦላ ፓጮዳ ድራው፤ ታና አያው ሀንቀቲቱ?

7:22 ደመላ 17:10፤ ዎጋ 12:3

24 ቱሙ ፕርዳ ፕርድተፕ አትን፣ አሳ ዳሙዋ ዴሊደ ፕርድፕተ” ያጌድ።

ሀዌ ክርሰቶሴ?

25 ሄዋ ድራወ፣ የሩሳላመ አሳፕ እቱ እቱ፣ “ኡንቱንቱ ዎቆናወ ኮይያ ብታኒ ሀዋ ግደኔ?

26 በእተ፣ ቆንጭያን እ ሃሳዬ፤ ኡንቱንቱ አ አይነ ጊክኖ። ሀዌ ክርሰቶሳ ግድያዋ ኑ ካፓቱ ቱሙ ኤሪኖሻ?

27 ሸን ኡን አ ሀቃፕ ዬደንቶ ኤርይተ፤ ክርሰቶሳ ይያ ዎደ፣ እ ሀቃፕ ይንቶነ ኡንነ ኤረና” ያጌድኖ።

28 ሄዋፕ ጉይያን፣ የሱሰ ጌሻ ጎልያን ታማርሲደ፣ ባረ ቃላ ቆቁ አሊደ፣ “ሀንተንቱ ታና ኤሪታ፤ ቃይ ታን ሀቃፕ ዬደንቶካ ኤሪታ። ታን ታ ሸንያን ያበይከ፤ ሸን ታና ኪቴዳዌ ቱማንቻ፤ ሀንተንቱ አ ኤርክታ።

29 ሸን ታን አ ኤራይ፤ አያወ ጎፕ፣ እ ታና ኪትና፣ ታን አ ማታፕ ያድ” ያጌድ።

30 ሄዋ ድራወ፣ ኡንቱንቱ አ አይቃናወ ኮዬድኖ፤ ሸን አ ዎዲ ብር ጋክቤና ድራወ፣ ኡንነ አ ቦላ ኩሸያ ዎላቤና።

31 ሸን ዳር አሳይ የሱሳ አማኒደ፣ “ክርሰቶሳ ይያ ዎደ፣ ሀ ብታኒ አሌዳ ማላታፕ ዳርያዋ አሳኔዬ?” ያጌድኖ።

የሱሳ አይቃናወ ዎታዳራቱ ከተቴድኖ

32 ፓርሳዎቱ ዳር አሳይ የሱሳባ ዙዙምያዎ ሰሴድኖ፤ ቄሳቱዎ ካፓቱነ ፓርሳዎቱ አ አይቁ ቃሸሳናወ አማሬዳ ዎታዳራቱዎ ከቴድኖ።

33 የሱሰ፣ “ታን ሀንተናና ላፋ ጋምአና፤ ሄዋፕ ጉይያን፣ ታና ኪቴዳዎኮ ባና።

34 ሀንተንቱ ታና ኮያና፤ ሸን ደምክታ፤ አያወ ጎፕ፣ ታን ደኢያ ሳአ ሀንተንቱ ባናወ ዳንዳይክታ” ያጌድ።

35 አይሁዳቱ እቱ እቱዎና፣ “ሀዌ ኡን አ ደመናሳ ሀቃ ባና ሀኒ? አይሁዳቱ ደኢያ ግሪከ ካታማ ቢደ፣ ግሪከ አሳቱዎ ታማርሳና ሀኒ?

36 እ፣ ‘ሀንተ ታና ኮያና፤ ሸን ደምክታ’ ቃይ፣ ‘ታን ደኢያሳ ሀንተንቱ ባናወ ዳንዳይክታ’ ያጌ፤ ሄዋ ግያዌ ዎግያዌ?” ያጌድኖ።

ደኡዎ እምያ ሃላ

37 ሄ ባላ ጋላሳ ቦንቶያ ጋላሳጥ ዋናትያ ወርሰላ ጋላሳን የሱስ ደንድ ኤቂደ፣ ባረ ቃላ ጶቁ ኦሊደ፣ “ሳመቴዳ ኡራይ ኦንነ ታኮ ዪደ ኡሾ።

38 ታናን አማንያዎ፣ ጸሳ ማጻፋይ ግያዋዳን፣ አ ኡሉዋጥ ደኡዋ እምያ ሃላ ፑልቱ ጎጋናዎ” ያጌዳ።

39 እ ሄዎ አ አማኔዳዋንቱ አካና ጌሻ አያናባ ሃሳዬዳ። የሱስ ብሮ ባረ ቦንቶዋኮ ከሰቤና * ድራወ፣ ሄ ዎደ ጌሻ አያናይ ኡንቱንቶ እመትቤና።

አሳ ግደን መጠጥቴዳ ጳልቀላ

40 ሄ አሳጥ ዳርያ ባጋይ እ ግያዋ ሰሲደ፣ “ቱሙ ሀዌ ናገትያ ናብያ” ያጌድኖ።

41 ሀራንቱ፣ “ሀዌ ክርሰቶሳ” ያጌድኖ።

ሽን ሀራንቱ ቃይ፣ “ክርሰቶሰ ጋሊላጥ ዬና።

42 ጸሳ ማጻፋይ፣ “ክርሰቶሰ ዳዊተ ዛርያጥ፣ ዳዊተ ደኤዳ ቤተሌመ ካታማጥ ያና ጌነዬ?” ያጌድኖ።

43 የሱሳ ጋሱዋን አሳይ ባረ ግዲዋን ሻከቱዳ።

44 ሄ አሳጥ እቱ እቱ አ ኦይቃናዉ ኮዬድኖ፤ ሽን ኩሽያንነ አ ቦቶብይክኖ።

45 ጌሻ ጎልያ ናግያዋንቱ ቄሳቱዋ ካገቱዋኮነ ፓርሳዋቱዋኮ ሰም ዬዳ ዎደ ኡንቱንቱ ናግያዋንታ፣ “አያዉ አ አሀበይክቱ?” ያጌደ ኦቹድኖ።

46 ጌሻ ጎልያ ናግያዋንቱ ኡንቱንቶ፣ “ሀ ብታኒ ሃሳዬዳዋዳን፣ ኡባካ ኦንነ ሃሳይቤና!” ያጌደ ዛሬድኖ።

47 ፓርሳዋቱ ዛሬደ፣ “እ ሀንተናካ ባለሉዋ?

48 ካገቱዋጥ ዎይ ፓርሳዋቱዋጥ አ አማኔዳ አሳይ ደኢ?

49 ሽን ሀግያ ኤረና ሀ አሳይ ሸቀቱዳዎ” ያጌድኖ።

50 ኡንቱንቱጥ እቱ ካሰና የሱሳኮ ቤዳ ንቆድሞሰ ኡንቱንታ፣

51 “አት ኡራይ ግያባ ሰሰናን ዎይ እ አያ ኦሌደንቶ ኤረናን ደኢደ፣ ካሰቲደ አ ቦላ ፕርድያዌ ኑ ሀግያን ደኢ?” ያጌዳ።

52 ኡንቱንቱ ዛሬደ እ፣ “ኔንካ ቃይ ጋሊላ ጋድያ አሴ? ጋሊላ ጋድያጥ ናቤ ቤተናዋ ጸሳ ማጻፋቱዋ ብዳደ ኤራ” ያጌድኖ።

7:37 ዎጋ 23:36 7:38 ሀዘ. 47:1፤ ዛካ. 14:8 * 7:39 የሱስ ብሮ ባረ ቦንቶዋኮ ከሰቤና- የሃገሳ ምሽራቸዋ ቃላን፣ የሱሳዉ ኩመንሳ ቦንቶ እመቴዳዌ፣ አ ማስቃልያ ቦላን ካቀቱዳ ዎደን ባረ አቡ ኡሽቻ ባጋን ኡታናዉ ሀይቁዋ ጸኒደ ደንዴዳ ዎድያና ግድያዎ ቆንጭሴ። 7:42 2 ሳሜላ 7:12፤ ሚክ. 5:2

ዎሹማደ ኦይቀቲዳ ምሽራቶ

53 አሳይ ኡባይ አጊደ፣ ባረ ሶይ ባረ ሶይ ቤዳ።

8

1 ሸን የሱሰ ምጋራ ምፋን ኤረቲዳ ደርያኮ ቤዳ።

2 ምንተላ ጋላስ ጉራን ጌሻ ጎልያ ሰሜዳ፤ ኡባ አሳይ አኮ ዪና፣ ኡቲደ ኡንቱንታ ታማርሱዋ ደሜዳ።

3 ሙሴ ህግያ ታማርሰያዋንቱነ ፓርሳዋቱ ዎሹምሸን ኦይቀቲዳ እት ምሽራቶ አኮ አሄድኖ። ኡንቱንቱ አሳ ኡባ ሰንፋን እዞ ኤሲደ የሱሳ፣

4 “ታማርሰያዎ፣ ሀ ምሽራታ ዎሹማደ ኦይቀታዲ።

5 ህግያ ቦላን ሙሴ ሀን ማላ ማጫ አሳ ሹቻን ጫዳና ማላ፣ ኑና አዛዜዳ። ያትና ኔን ዋጋይ?” ያጌድኖ።

6 ኡንቱንቱ ሄዋ ጌዳዌ የሱሳ ሞትያዋ ደሚደ አ ፓጫናሳ፤ ሸን የሱሰ ሆኪደ፣ ባረ ብራድያን ቢታ ቦላ ጸፊዳ።

7 ኡንቱንቱ አ ኦቺደ አገናን እጽና፣ ፑደ ጶቁ ጊደ፣ “ህንተንቱ ግዲዋን ናጋራ ኦሰቤና አሳይ ካሰቲደ፣ እዞ ሹቻን ጫደ” ያጌዳ።

8 ቃይካ ሆኪደ፣ ቢታ ቦላ ጸፊዳ።

9 ኡንቱንቱ ሄዋ ሰሴዳ ዎደ፣ ካሰቲደ ጭማቱ ከሰና፣ እቱ እቱ ከሲደ ወሬድኖ፤ አ ሰንፋን ምሽራታ ኤቃ ደእሸን፣ የሱሰ ባረ ጸላላ አቲዳ።

10 አ ፑደ ጶቁ ጊደ ምሽራቶ፣ “ምሽራቲ፣ አሳቱ ሀቃን ደኢኖ? ኦንነ ነ ቦላ ፕርድቤኔ?” ያጌዳ።

11 ምሽራታ፣ “ጎዳዉ፣ ኦንነ ታ ቦላ ፕርድቤና” ያጋዲ።

የሱሰ እዞ፣ “ታንካ ነ ቦላ ፕርድከ፤ ባ፤ ላኤንፋደ ናጋራ ኦላፓ” ያጌዳ። *

12 ቃይካ የሱሰ አሳዉ፣ “ታን አላመዉ ፖኡዋ፤ ታና ካልያ ኦንነ ደኡዋ እምያ ፖኡዋ ደማናፕ አትን፣ ጴማን ኡባካ ሀመተና” ያጊደ ሃሳዬዳ።

13 ሄዋፕ ጉየ ፓርሳዋቱ፣ “ኔን ነባ ማርካታሳ፤ ነ ማርካተላይ ቱማ ግደና” ያጌድኖ።

14 የሱሰ ዛሪደ፣ “ታን ታባ ማርካቶፕካ፣ ታ ማርካተላይ ቱማ፤ አያዉ ጎፕ፣ ታን ሀቃፕ ያድታንቶነ ቃይ ሀቃ ባይታንቶ ኤራይ፤ ሸን ህንተንቱ ኤርክታ።

8:5 ዋጋ 20:10፤ ዛረ. 22:22-24 * 8:11 7:53—8:11 እት እት ቦን ጸፈቴዳ ጌሻ ማጻፋቱዋን ሀ ፓይዲ ባዋ።

15 አሳይ ፕርድያ ኦግያን ህንተንቱ ፕርዲታ፤ ታን እት ኡራ ቦላካ ፕርድክ።

16 ሸን ታን ፕርድያዋ ግደገነ፡ ታ ፕርዲይ ቱማ፤ እያዉ ጎጥ፡ ታና ኪቱዳ ታ አቡ ታናና ደኤፕ አትን፡ ታን ታረካ ደእከ።

17 ላኡ አሳ ማርካተላይ ቱማ ግድያዌ ህንተንቱ ህግያን ጸፈት ኡቱዳ።

18 ታን ታባ ታ ሁጳዉ ማርካታድ፤ ቃይ ታና ኪቱዳ ታ አቡካ ታባ ማርካቱ” ያጌዳ።

19 ኡንቱንቱ፡ “ሳ አቡ ሀቃን ደኢ?” ያጌደ የሱሳ ኦቼድኖ።

የሱሰ ዛሪደ፡ “ህንተንቱ ታናካ ዋይ ታ አባካ ኤርክታ፤ ታና ኤራዳዋ ግድንቶ፡ ታ አባካ ኤራንታ” ያጌዳ።

20 የሱሰ ጌሻ ጎልያ ታማርሲደ፡ እሞታ ሚሻይ ኡትያ ሳጽንያ ማታን ሄዋ ሃሳዬዳ። አ ኦን ኦይቂቤና፤ እያዉ ጎጥ፡ አ ዋዲ ብር ጋክበና።

አማናን እጹዳዋንቶ እመቲዳ ምኖ እኬክሱዋ

21 ቃይካ የሱሰ ኡንቱንታ፡ “ታን ባና ህንተንቱ ታና ኮያና፤ ሸን ህንተንቱ፡ ህንተንቱ ናጋራን ሀይቃንታ። ታን ብያሳካ ባናዉ ህንተንቱ ዳንዳይክታ” ያጌዳ።

22 እይሁዳቱ፡ “እ፡ ታን ብያሳ ህንተንቱ ባናዉ ዳንዳይክታ” ያጌ፤ አ ባረና ባረካ ዋቆይ?” ያጌድኖ።

23 የሱሰ ዛሪደ፡ “ህንተንቱ ጋርሳ አሳ፤ ታን ቦላ አሳ። ህንተንቱ ሀ አላሞያ አሳ፤ ታን ሀ አላሞያ አሳ ግድክ።

24 ህንተንቱ፡ ህንተንቱ ናጋራን ሀይቃናዋ ታን ህንተንቶ ኦዴዳዌ ሀዋሳ፤ ታን ታና ተ ግድያዋ ህንተንቱ አማናና ቆጥ፡ ህንተንቱ፡ ህንተንቱ ናጋራን ሀያንታ” ያጌዳ።

25 ኡንቱንቱ፡ “ኔን ኦኔ?” ያጌደ ኦቼድኖ።

የሱሰ ዛሪደ፡ “ታን ታና።

26 ታን ህንተባ ሃሳይያባይነ ፕርድያባይ ዳርባይ ደኤ። ሸን ታና ኪቱዳዌ ቱማንቻ፤ ቃይ ታን አፕ ሰሴዳዋ አላሞያ አሳዉ ኦዳይ” ያጌዳ።

27 እ ባረ አዉዋባ ሃሳይያዋ ኡንቱንቱ እኬክበይክና።

28 ሄዋ ድራዉ፡ የሱሰ ኡንቱንታ፡ “ታና አሳ ናኦ ህንተንቱ ማሰቃልያ ቦላ ፑደ ደንሰያ ዋደ፡ ታን ታና ግድያዋን ቃይ ታን

8:17 ዛር. 19:15 † **8:24** ታን ታና- እይሁደ አሳዉ ዋልቃማን ጌሻ ግዴዳ ጸሳ ሱንላይ “ያህዌህ” ግዲደ፡ ሀዋ ብለላይካ ታን ታና ግያዋ።

ታ ክቡ ታና ታማርሴዳዎዳን ሃሳይያዎጥ አትን፣ ታ ሸንያን አይነ ከ□ናዎ ህንተንቱ ኤራንታ።

29 ቃይ ታና ኪቴዳዌ ታናና ደኤ፤ ታን ኡባ ዎደ አ ናሸቶያዎ አልያ ድራዉ፣ እ ታ ጸላላ አግቤና” ያጌዳ።

30 የሱሰ ሄዎ ሃሳይሸን ሰሴዳ ዳር አሳይ አ አማኔድኖ።

ናጋራ አይለተላጥ ላአ ከሳ

31 የሱሰ ባረና አማኔዳ አይሁዳቱዎ፣ “ህንተንቱ ታን ታማርሴያዎ አዛዘቶጥ፣ ቱሙ ታና ካልያዎንታ።

32 ህንተንቱ ቱማተላካ ኤራንታ፤ ቃይ ቱማተላይ ህንተንታ አይለተላጥ ከሳናዎ” ያጌዳ።

33 ኡንቱንቱ ዛሪደ፣ “ኑን አብራሃዎ ዛረ፤ ኑን ኦሰነካ አይለትብይኮ። ያትና ኔን ዎጋደ፣ ‘አይለተላጥ ህንተንቱ ከሳንታ’ ጋይ?” ያጌድኖ።

34 የሱሰ፣ “ታን ህንተንቶ ቱሙዎ ኦዳይ፤ ናጋራ አልያ ኦንነ ናጋራ አይልያ።

35 አይሊ ኡባ ዎደ ሶይን ደኤና፤ ሸን ናአይ መጽናዉ ጎለን ደኤ።

36 ናአይ ህንተንታ አይለተላጥ ከሶጥ፣ ህንተንቱ አይለተላጥ ቱሙ ከሳንታ።

37 ህንተንቱ አብራሃዎ ዛረ ግድያዎ ታን ኤራይ፤ ሸን ታ ታማርሴያዎ ህንተንቱ አከና ድራዉ፣ ታና ዎቆናዉ ኮዪታ።

38 ታን ታ ክቡ ታና በሴዳዎ ሃሳይይ፤ ቃይ ህንተንቱካ ህንተንቱ አዉዎጥ ሰሴዳዎ ኦሊታ” ያጌዳ።

39 ኡንቱንቱ ዛሪደ፣ “ኑ አቡ አብራሃማ” ያጌድኖ።

የሱሰ ኡንቱንታ፣ “ህንተንቱ አብራሃዎ ናና ግዴደንቶ፣ እ ኦሌዳ አሱዎ ማላ ኦላንታ።

40 ሸን ጸሳጥ ሰሴዳ ቱሙዎ ኦዴዳ ታና ህንተንቱ ዎቆናዉ ኮዪታ፤ አብራሃሙ ሄዎዳን አልቤና።

41 ህንተንቱ፣ ህንተንቱ አዉ ኦሌዳዎ ኦሊታ” ያጌዳ።

ኡንቱንቱ ዛሪደ፣ “ኑን ዎሹማን ድቃላተላ የለትብይኮ፤ ኑዉ እት አዉ፣ ጸሳ ጸላላይ ደኤ” ያጌድኖ።

42 የሱሰ ኡንቱንታ፣ “ህንተንቱ ጸሳ ናና ቱሙ ግዴደንቶ፣ ታና ሲቃና፤ አያዉ ጎጥ፣ ታን ጸሳ ማታጥ ያደ ሀዋን ደአይ። ታና እ ኪቴዳዎጥ አትን፣ ታን ታ ሸንያን ያበይከ።

43 ታን ታማርሴያዎ ህንተንቱ አከናዎ አያሴ? ታን ታማርሴያዎ ህንተንቱ አከና ድራሳ።

44 ህንተንቱ፣ ህንተንቱ አወዋ ኢታ አያና ናና፤ ቃይ ህንተንቱ፣ ህንተንቱ አወ አሞትያዋ ኦላናወ ኮዪታ። እ ካሰፕ ደሚደ፣ ሸሞፑዋ ዋዴዳዋ፤ ቱማተላይ አን ባይና ድራወ፣ ቱማተላኮ ሸቅ ኤረና። እ ዋርዲዋ ሃሳይያ ዋደ፣ ባረፕ ሃሳዬ፤ አያወ ጎፕ፣ እ ዋርዲንቻን ቃይ ዋርዲካ አወዋ።

45 ሸን ታን ቱሙዋ ሃሳይያ ድራወ፣ ህንተንቱ ታና አማንክታ።

46 ህንተፕ ታና ናጋራ ኦላሸን በኦድ ጋናወ ዳንዳይያዌ ኦኔ? ታን ቱሙዋ ሃሳይያዋ ግደፕ፣ ታና አያወ አማንክቱ?

47 ጸሳ አሳ ግዴዳ ኡራይ ጸሳይ ግያዋ ሰሴ፤ ህንተንቱ ጸሳ አሳ ግደና ድራወ፣ ጸሳይ ግያዋ ሰሰክታ” ያጌዳ።

የሱሰ አብራሃሞፕ ካሰናካ ደኤ

48 አይሁዳቱ ዛሪደ፣ “ኑን ኔና፣ ኔን ሳማርያ አሳ፤ ኔናን ኢታ አያናይ ደኤ’ ጌደ ባይዜዳ?” ያጌድኖ።

49 የሱሰ ኡንቱንታ፣ “ታ ቦላ ኢታ አያናይ ባዋ። ታን ታ አባ ቦንቻይ፤ ሸን ህንተንቱ ታና ካወሺታ።

50 ታን ታ ሁጲያወ ቦንቸዋ ኮይከ፤ ሄዋ ታወ ኮይያዌን ፕርድያዌ ደኤ።

51 ታን ህንተንቶ ቱሙዋ ኦዳይ፤ ታን ታማርሰያዋ ናግያ ኦንን ኡባካ ሀይቀና” ያጌዳ።

52 አይሁዳቱ ዛሪደ፣ “ኅ ቦላ ኢታ አያናይ ደእያዋ ኑን ሀእ ኤራደ። አብራሃሙ ሀይቄዳ፤ ናባቱ ሀይቄድኖ፤ ሸን ኔን፣ ‘ታ ቃላ ናግያ ኦንን ኡባካ ሀይቀና’ ያጋ።

53 ኔን ሀይቄዳ ኑ አወዋ አብራሃሞፕ ዳራይ? ናባቱ ቃይ ሀይቄድኖ። ኔን ኔና ኦና ጋደ ቆፓይ?” ያጌድኖ።

54 የሱሰ፣ “ታን ታና ቦንቸፕ፣ ታ ቦንቸ ሙላ፤ ህንተንቱ ኑ ጸሳ ግያ ታ አቡ ታና ቦንቸ።

55 ህንተንቱ አ ኤራና ጳየፕካ፣ ታን አ ኤራይ። ታን አ ኤርከ ጎፕ፣ ህንተንቱዋዳን ዋርደ ግዳይ፤ ሸን ታን አ ኤራይ፤ ቃይ አ ቃላካ ናጋይ።

56 ህንተንቱ አወ አብራሃሙ፣ ታ ዩሳ ዋድያ በአናወ ላሞቲዳ፤ በኢደካ ናሸቲዳ” ያጌዳ።

57 አይሁዳቱ ዛሪደ አ፣ “ኅወ ሀራይ አቶ እሻታሙ ላይላ ኩሞቤናዌ አብራሃማ በአዲ?” ያጌድኖ።

58 የሱሰ ኡንቱንታ፣ “ታን ህንተንቶ ቱሙዋ ኦዳይ፤ አብራሃሞ የለታናፕካ ካሰ ታን ታና” ያጌዳ።

59 ሄዋ ድራወ፣ ኡንቱንቱ የሱሳ ጫዳናወ ሹቻ አኬድኖ፤ ሸን የሱሰ ኡንቱንቱፕ ጌሙቲደ፣ ጌሻ ጎልያፕ ቤዳ።

9

የሱስ ቆቃ ግዲደ የለቲዳ ብታንያ ፓሌዳ

1 የሱስ ቢደ፣ የለቲደፍ ቆቃ ግዲደ ደእያ እት ብታንያ በኤዳ።

2 የሱሳ ካልያዋንቱ የሱሳ፣ “ታማርሰያዎ፣ ሀ ብታኒ ቆቃ ግዲደ የለታናዳን፣ ናጋራ ኦሌዳዌ ኦኔ? እ ኦሌዳየ? ዋይ እ የሌዳዋንቱ ኦሌድኖ?” ያጊደ ኦቼድኖ።

3 የሱስ፣ “ጸሳ ከታይ አ ቦላን ቆንጫና ማላ ቆቆዳፕ አትን፣ እ ዋይ እ ዳያነ አ አቡ ናጋራ ኦለበይክኖ።

4 ኦን ሳአይ ቃመናን ደእሸን፣ ታና ከቲዳዋ ኦሱዋ ኦላናዉ በሴ። ኦን ኦላናዉ ዳንዳየና ቃማይ ዬ።

5 ታን አላምያን ደአደ አላመዉ ፖኦ” ያጊደ።

6 የሱስ ሄዋ ጊደ፣ ሳአን ጨቹዳ፤ ባረ ጨቻን ጉላ ኡርቃ ሹግሲደ፣ ሄ ኡርቃን ቆቃ ብታንያ አይፍያ ኦኪደ፣

7 “ባደ ሳልሆማ ግያ ዳጋቲዳ ሃላን ነ አይፍያ ሜጫ” ያጊደ። “ሳልሆማ” ግያዌ “ከተቲዳዋ” ጉሳ። ሄዋ ድራዉ፣ ብታኒ ቢደ፣ ባረ አይፍያ ሜጫቲደ፣ ጸሊደ ሰሜዳ።

8 ብታንያ ሾራቱነ ብታኒ ካስ ዋሰሸን በኤዳ አሳይ፣ “ሀዌ ኡቲደ ዋሰያ ብታንያ ግደኔዬ?” ያጊድኖ።

9 ቃይ አማራዳዋንቱ፣ “ሀዌ አተኔ” ያጊድኖ።

ሀራንቱ ቃይ፣ “ቱይት፣ ሀዌ አ ማላትያዋፕ አትን፣ አ ግደና” ያጊድኖ።

ሸን ብታኒ፣ “ታን አቲ” ያጊደ።

10 ኡንቱንቱ ብታንያ፣ “ያትና፣ ነ አይፊ ዋን ጸሌዳ?” ያጊደ ኦቼድኖ።

11 እ ዛሪደ፣ “የሱሳ ጌተትያ ብታኒ ጉላ ኡርቃ ሹግሲደ፣ ታ አይፍያ ኦኪደ፣ ሳልሆማ ጌተትያ ዳጋቲዳ ሃላን ባደ ነ አይፍያ ሜጫታ” ያጊደ። ታን ባደ ሜጫታደ ጸላድ” ያጊደ።

12 ኡንቱንቱ አ፣ “እ ሀቃን ደአ?” ያጊደ ኦቼድኖ።

ብታኒ፣ “ታን ኡርከ” ያጊደ።

13 ኡንቱንቱ ካስ ቆቂደ ጸሌዳ ብታንያ ፓርሳዋቱዋኮ አፊድኖ።

14 የሱስ ኡርቃ ሹግሲደ፣ ብታንያ አይፍያ ፓሌዳ ጋላሳይ ሳምባታ ጋላሳ።

15 ሄዋ ድራዉ፣ ብታኒ ዋን ጸሌደንቶነ ፓርሳዋቱ አ ጉጂደ ኦቼድኖ። ብታኒ ኡንቱንቶ፣ “እ ታ አይፍያን ጉላ ኡርቃ ዋሌዳ። ታ አይፍያ ሜጫታደ ሀእ ጸላድ” ያጊደ።

16 ፓርሳዋቱዋፕ አቲ እቲ፣ “ሀዋ ኦሌዳ ብታኒ ሳምባታ ሀግያ ናገና ድራዉ፣ ጸሳ ማታፕ ይቤና” ያጊድኖ።

ሽን ሀራንቱ፡ “ናጋራንቻ አሳይ ሀዋ ማላ ዋልቃማ ማላታ ዋን ኦላናዉ ዳንዳዩ?” ያጊደ ኡንቱንቱ ባረንቱ ግዲዋን ሻከቱድኖ።

17 ሄዋ ድራዉ፡ ፓርሳዋቱ ብታንያ እት ካላ ጉጂደ፡ “እ ነ አይፍያ ዶዬዳ ድራዉ፡ አባ ዋጋይ?” ያጊድኖ።

ብታኒ፡ “እ ናብያ” ያጊድኖ።

18 አይሁዳቱ ሄ ዶሌዳ ብታንያ አቶነ አዉዋ ዶሲደ ኦቻና ጋካናዉ፡ ብታኒ ቆቃ ግዴዳዋን ሀእ እ ዶልያዋ አማንበይክኖ።

19 አይሁዳቱ አ አቶነ አዉዋ፡ “ሀንተንቱ፡ ቆቃ ግዲደ የለቱዳ? ግያ ሀንተንቱ ናአይ ሀዌ? ያትና፡ ሀእ ዋኒደ ዶሌዳ?” ያጊደ ኦቹድኖ።

20 ብታንያ ዳያን አዉ፡ “ሀዌ ኑ ናአ ግዴዳዋን ቆቃ ግዲደ የለቱዳዋ ኩን ኤሬቶ።

21 ሽን ሀእ እ ዋን ዶሌደንቶ፡ ኩን ኤርኮ፤ ዋይ አ አይፍያ ኦን ፓሌደንቶ፡ ኩን ኤርኮ። አ ኦቹተ፤ እ ደንዛ አሳ፤ ባረባ ሃሳያናዉ ዳንዳዬ!” ያጊድኖ።

22 ብታንያ ዳያን አዉ አይሁዳቶ ያዬዳ ድራዉ፡ ሄዋ ጌድኖ፤ አያዉ ጎፕ፡ አይሁዳቱ የሱሰ ክርሰቶሳ ያጊደ ማርካትያ ኡራይ ደኦፕ፡ ሄ ኡራ አይሁዳ ዋሳ ጎልያፕ ከሳናዉ ካሰት ቆፋ ቃቶ ዋሌድኖ።

23 አ ዳያን አዉ፡ “እ ደንዛ አሳ፤ አ ኦቹተ!” ጌዳዌ ሀዋሳ።

24 ሄዋ ድራዉ፡ ቆቃ ግዲደ የለቱዳ ብታንያ ኡንቱንቱ ላኤንሱዋ ዶሲደ፡ “ጳሳ ጋላታ፤ ሀ ብታኒ ናጋራንቻ ግድያዋ ኩን ኤሬቶ” ያጊድኖ።

25 ብታኒ፡ “እ ናጋራንቻ ግድያዋን፡ ግደናዋ ኤርኮ፤ ታን ቆቃ ግድያዋን ሀእ ዶልያዋ ሄ እትባ ኤራይ” ያጊድኖ።

26 ኡንቱንቱ ዛሪደ ብታንያ፡ “እ ነዉ አያ ኦሌዳ? እ ነ አይፍያ ዋት ፓሌዳ?” ያጊድኖ።

27 እ ኡንቱንታ፡ “ታን ሀንተንቶ ኦዳድ፤ ሰሰበይክታ። አያዉ ላኤንሱዋ ሰሳናዉ ኮዪቱ? ሀንተካ የሱሳ ካልያዋንታ ግዳናዉ ኮዪቱ?” ያጊድኖ።

28 ኡንቱንቱ አ ቦሪደ፡ “ኔን ሄ ብታንያ ካልያዋ፤ ኩን ሙሳ ካልያዋንታ።

29 ጳሳይ ሙሴዉ ሃሳዬዳዋ ኩን ኤሬቶ፤ ሽን ሀ ብታንያ ግደፕ፡ እ ሀቃፕ ዬደንቶን ኩን ኤርኮ” ያጊድኖ።

30 ብታኒ፡ “እ ሀቃፕ ዬደንቶን ሀንተንቱ ኤረናዌ ማላልሰያዋ፤ ሽን እ ታ አይፍያ ፓሌዳ!

31 ጳሳዉ ያይያ ኡራይን ጳሳይ ኮይያዋ ኦላያ ኡራይ ደኦፕ፡ ሄ ኡራባ ጳሳይ ሰሰያዋፕ አትን፡ ናጋራንቻቱዋባ ሰሰና።

32 ቆቃ ግዲደ የለቴዳ አሳ አይፍያ ኦንነ ፓለና፡ ሳአይ መቶደፕ ደምና፡ ሰሰት ኤረና።

33 ሀ ብታኒ ጸሳፕ ይቤናዋ ግድንቶ፡ እትባነ ኦላናወካ ዲንዳየና” ያጌዳ።

34 ኡንቱንቱ ዛሪደ አወ፡ “ኔን ናጋራን የለታደ ድጩዳዌ ኑና ታማርሳናወ ኮያይ?” ያጌድኖ፤ አይሁዳ ዋሳ ጎልያፕ ካረ አ ከሴድኖ።

ዋዛና ቆቃተሳ

35 ኡንቱንቱ ብታንያ ካረ ከሴዳዋ የሱሰ ሰሴዳ፤ የሱሰ ብታንያ ደሚደ፡ “አሳ ናአ አማናይ?” ያጌዳ።

36 ብታኒ የሱሳ፡ “ጎዳወ፡ ታን አ አማናናዳን እ ኦኔ? ታወ ኦዳርከ!” ያጌዳ።

37 የሱሰ ብታንያ፡ “ኔን አ በኦዳ፤ ሀ ኔናና ሃሳይያዌካ አ” ያጌዳ።

38 ብታኒ ዛሪደ፡ “ጎዳወ፡ አማናይ” ያጌደ የሱሳወ ጎይኔዳ።

39 የሱሰ፡ “ቆቃቱ ጸላና ማላነ ጸልያዋንቱ ቆቃና ማላ፡ ታን ፕርዳናወ ሀ ሳአ ያድ” ያጌዳ።

40 አናና ደእያ አማራዳ ፓርሳዋቱ ሄዋ ሰሲደ፡ “ኑንካ ቆቆዬ?” ያጌደ ኦቼድኖ።

41 የሱሰ፡ “ሀንተንቱ ቆቃ ግዴደንቶ፡ ሀንተንቶ ናጋራ ግደና፤ ሸን ሀእ ሀንተንቱ፡ ኑን ጸሌቶ” ያጌታ፤ ሀንተንቱ ናጋራና ደኢታ” ያጌዳ።

10

የሱሰ ሎኦ ሃንጻንቻ

1 የሱሰ፡ “ታን ሀንተንቶ ቱሙዋ ኦዳይ፤ ደርሳ ሰኩዋ ፕንግያና ገለናን ሀራሳና ገልያ ኦንነ ካይሱዋነ ፓኑዋ።

2 ሸን ፕንግያና ገልያዌ ደርሳ ሄምያ አሳ።

3 ፕንግያ ናግያዌ አወ ፕንግያ ደዬ፤ ደርሳቱካ አ ኮሻ ሰሳና፤ እ ባረ ደርሳቱዋ ኡንቱንቱ ሱንጻን ሱንጻን ጸሲደ፡ ካረ ካለጻና።

4 እ ባረዋንታ ካረ ከሴዳዋፕ ጉይያን፡ ኡንቱንቱፕ ሰንጻና ሀመቱ፤ ኡንቱንቱካ አ ኮሻ ኤርያ ድራወ፡ አ ካለኖ።

5 ሀራ ኡራ ኮሻ ኡንቱንቱ ኤረና ድራወ፡ አፕ ባቃታናፕ አትን፡ አ ጌዱዋ ካልክኖ” ያጌዳ።

6 የሱሰ ኡንቱንቶ ሀ ሌምሱዋ ኦዳዳ፤ ሸን አ ኡንቱንቶ አይ ኦድንቶካ ኡንቱንቱ አኬክባይክኖ።

7 የሱስ ቃይካ ኡንቱንቶ፡ “ታን ሀንተንቶ ቱሙዋ ኦዳይ፤ ታን ደርሳቶ ገልጾ ጥንግጽ።

8 ታጥ ካስ ዬዳ ኡባይ ካይሱዋን ፓኑዋ፤ ሸን ደርሳቱ ኡንቱንቱ ግያዋ ሰሰበይክኖ።

9 ጥንገ ታና፤ ታናን ገልጾ ኦንነ ኦታናዋ። እ ገላና ከሳና፤ ቃይ ሎኦ ማታይ ደእያ ሳካ ደማናዋ።

10 ካይሱ ወእናወ፡ ዋዳናወን ዳይሳናወ ይያዋጥ እትን፤ ሀራባወ ዬና፤ ታን ኡንቱንቶ ደኡ ደእና ማላን ኩሚደ ፓላሀና ማላ ያድ።

11 “ታን ደርሳ ሎይላ ሄምያዋ፤ ደርሳ ሎይላ ሄምያዋ ሄ ደርሳቱዋ ድራወ ሀይቁ።

12 ሚሻ እኪደ ሄምያ ኡራይ ዋልያ ይያ ዋደ በኢደ፡ ደርሳቱዋ የግ ባሽደ ባቃቱ። እያወ ጎጥ፡ ደርሳቱ አዋንታ ግድክኖ፤ ቃይ እካ ደርሳቱዋ ሄምያዋ ግደና። ሄዋ ድራወ፡ ደርሳቱዋ ኦይቄን ሳሌ።

13 ሻሉዋ እኪደ ሄምያዋ ባረ ሻሉ ሄምያ ድራወን ደርሳባይ አ ቆፈ፣ና ድራወ፡ ደርሳቱዋ እገደ ባቃቱ።

14-15 “ታን ደርሳ ሎይላ ሄምያዋ፤ ታ አቡ ታና ኤርያዋዳን፤ ታንካ ቃይ ታ አባ ኤራይ። ሄዋዳንካ፡ ታን ታ ደርሳቱዋ ኤራይ፤ ታ ደርሳቱካ ታና ኤሪኖ። ቃይ ታን ታ ደርሳቱዋ ድራወ፡ ሀይቃናወ ኮያድ።

16 ሀ ሰኩዋን ባይና ሀራ ደርሳቱካ ታወ ደእኖ። ታን ኡንቱንታካ አሀናወ በሴ። ቃይ ኡንቱንቱ ታ ኮሻ ሰሳና፤ እት ወዲ ደእና፤ ሄምያዋካ እቱዋ ግዳናዋ።

17 “ታን ታ ሸምጥዋ ዛራደ አካና ማላ፡ አላደ እማናወ ኮይያ ድራወ፡ ታ አቡ ታና ሲቁ።

18 ታን ደሳደ ታ ሸምጥዋ አላ እምያዋጥ እትን፤ ታጥ ኦንነ አከና። ታወ ታ ሸምጥዋ አላ እምያ ማታይ ደኤ፤ ቃይ ዛራደ አካናወካ ማታይ ደኤ። ታን ሀ እዛዙዋ ታ አወዋጥ አካድ” ያጌዳ።

19 ሄ ሃሳያ ድራወ፡ አይሁዳቱዋ ግዲዋን ቃይካ ሻኩ መፍጥ።

20 ኡንቱንቱጥ ዳርያ ባጋይ፡ “አን ጻላሂ ደኤ! እ ጎይ! አ ሃሳያ አያወ ሰሲቱ?” ያጌድኖ።

21 ሀራቱ ቃይ “ጻላሂ ኦይቁዳ አሳይ ሀዋዳን ሃሳየና፤ ጻላሂ ቆቃ አሳ አይፍያ ዴልሳናወ ዳንዳዪዬ?” ያጌድኖ።

የሱስ እጻቴዳ

22 የሩሳላመን ጌሻ ጎልያ አንጅሴዳ ጋላሳ ሀሳይሰያ ባላይ ጋኬዳ፤ ሳኦይ ሄ ዋደ ባልጉዋ።

23 የሱሰ ጌሻ ጎልያን ሶሎሞና ባራንዳን፣ ያነ ሃነ ሀመቱ።

24 አይሁዳቱ የሱሳ ማታን ዩይ አጲደ፣ “ኔን ኑና አዉደ ጋካናዉ ሰድሳደ ዋላኒ? ኔን ክርሰቶሳ ግደጉ፣ ኑዉ ጌሻደ ኦዳ” ያጌድኖ።

25 የሱሰ ኡንቱንቶ ዛሪደ፣ “ታን ሀንተንቶ ኦዳድ፤ ሸን ታና አማንክታ፤ ታን ታ አቡ ሱንፋን ኦልያ ኪታይ ታባ ማርካቱ።

26 ሸን ሀንተንቱ ታ ደርሳ ግደና ድራዉ አማንክታ።

27 ታ ደርሳቱ ታ ኮሻ ሰሲኖ፤ ታን ኡንቱንታ ኤራይ፤ ኡንቱንቱካ ታና ካሊኖ።

28 ታን ኡንቱንቶ መድና ደኡዋ እማይ፤ ቃይ ኡንቱንቱ ኡባካ ሀይቁክኖ። ኦንነ ታ ኩሸያፕ ኡንቱንታ ዋል አካናዉ ዳንዳየና።

29 ኡንቱንታ ታዉ እማዳ ታ አቡ ኦፐን * እጴ፤ ኦንነ ታ አቡ ኩሸያፕ ኡንቱንታ ዋል አካናዉ ዳንዳየና።

30 ታነ ታ አቡ እቱዋ” ያጌዳ።

31 አይሁዳቱ የሱሳ ጫዳናዉ ቃይካ ሹቻ ደንሌድኖ።

32 የሱሰ ኡንቱንታ፣ “ታን ኦላናዉ ታ አቡ ታዉ እማዳ ዳር ሎኦ ኦሱዋ ሀንተንታ በሳድ፤ ሄዋንቱፕ ሀቃዋንቱ ድራዉ፣ ታና ሹቻን ጫዳናዉ ኮዩቱ?” ያጌዳ።

33 አይሁዳቱ ዛሪደ፣ “ኑን ኔና ሎኦ ኦሱዋ ድራዉ፣ ሹቻን ጫዳናዉ ኮዩኮ፤ ሸን ኔን ጸሳ ቦላ ቦርያ ቃላ ሃሳይያ ድራዉነ ቃይ አሳ ግዳደ ነ ሁጲያ ጸሳ ኦሌዳ ድራዉ፣ ጫዳናዉ ኮዩቶ!” ያጌድኖ።

34 የሱሰ ዛሪደ፣ “ሀንተንቱ ሀግያን ጸሳይ፣ ‘ሀንተ ጸሳቱዋ’ ጌዳዌ ጸፈትቤኔ?

35 ጸሳ ማጸፋቱዋ ላማናዉ ዳንዳየተና፤ ጸሳይ ባረ ቃላይ ዬዳ አሳቱ፣ ‘ጸሳቱዋ’ ጊደ ጴሴዳዋ ግደጉ።

36 ታን፣ ‘ታን ጸሳ ናኦ’ ጌዳ ድራዉ፣ ታ አቡ አንጂደ፣ ሳኦ ኪቱዳ ታና፣ ‘ጸሳ ቦላ ቦርያ ቃላ ሃሳያ’ ያጌቱ?

37 ታን ታ አቡ ኦልያዋ ኦላና ጳዮፕ፣ ታና አማኖፕተ።

38 ሸን ታን ኦልያዋ ግደጉ፣ ሀራይ አቶ ሀንተንቱ ታና አማናና ጳዮፕካ፣ ታ አቡ ታናን ደእያዋነ ታንካ ታ አቡን ደእያዋ ኤራናዳንነ አኬካናዳን፣ ታ ኦሱዋ አማንተ” ያጌዳ።

* 10:29 ኦፐን- ኡባፕ ጉሳ። 10:33 ዋጋ 24:16 10:34 ማዘ. 82:6

39 ቃይካ ኡንቱንቱ ኦ ኦይቃናዉ ኮዬድኖ፤ ሸን እ ኡንቱንቱፕ ከሰ እኪደ ቤዳ።

40 ዮሃንሰ ካሰ ጸማቅያሳ ዮርዳኖሳ ሻፋፕ ሄፍንላ የሱሰ ፕኒደ፡ ያን ደኤዳ።

41 ዳሮ አሳይ የሱሳኮ ዪደ፡ “ዮሃንሰ ዋልቃማ ማላታ ኦሰቤና፤ ሸን እ ሀ ብታንያባ ሃሳዬዳባይ ኡባይ ቱማ” ያጌድኖ።

42 ያን ዳሮ አሳይ የሱሳ አማኔዳ።

11

አልአዛራ ሀይቁዋ

1 ቢታንያ ግያ ቁር ካታማን አልአዛራ ግያ እት ብታኒ ሀርጌዳ፤ ሄ ካታማይ ማይራማን እዝ ሞቻታ ማርታ ደኤዳ ካታማ።

2 ጎዳ ገድያ ሸቱዋ ኦካደ፡ ባረ ብናናን ኦ ገድያ ቁጩዳዉና ሄ ማይራሞ፤ ሀርጌዳዌ ቃይ እዝ እሻ አልአዛራ።

3 ሄዋ ድራዉ፡ ሞቻቱ፡ “ጎዳዉ፡ ኔን ሲቅያዌ ሀርጌዳ” ጊደ የሱሳዉ ኪቱድኖ።

4 የሱሰ ሄዋ ሰሴዳ ዋደ፡ “ታን ጸሳ ናኦይ ሀርግያ ጋሱዋን ቦንቹታና ማላ፡ ጸሳ ቦንቾ ሀ ሀርጊ አልአዛራ ኦይቁዳፕ አትን፡ ዋድያ ሀርግያ ግደና” ያጌዳ።

5 የሱሰ ማርቶ፡ እዝ ሞቻቶን አልአዛራ ሲቁ፤

6 አልአዛር ሀርጌዳዋ የሱሰ ሰሴዳ ዋደ፡ ባረ ደእያ ሳኦን ላኡ ጋላሳ ፔሼዳ።

7 ሄዋፕ ጉይያን፡ የሱሰ ባረና ካልያዋንታ “ላኤንሉዋ ይሁዳ ጋድያ ቦይተ” ያጌዳ።

8 የሱሳ ካልያዋንቱ ዛሪደ፡ “ታማርሰያዎ፡ ጉላ ዋድያፕ ካሰ አይሁዳቱ ኔና ሹቻን ጫዳናዉ ኮዬድኖ፤ ቃይካ ያ ባኒ?” ያጌድኖ።

9 የሱሰ፡ “እት ጋላሳን ታማን ላኡ ሳቲ ደኤኔየ? ጋላሰ ሀመትያ አሳይ ቆብተና፤ አያዉ ጎፕ፡ እ ሀ ሳኦ ፖኡዋ ቦኤ።

10 ሸን ቃማ ሀመትያ ኡራይ ደኦፕ፡ ፖኡ ኦን ባይና ድራዉ፡ ቆብቱ” ያጌዳ።

11 የሱሰ ሄዋ ጌዳዋፕ ጉይያን፡ ቃይካ ኡንቱንቶ፡ “ኑ ዳቡ አልአዛር ገሞእሹዳ፤ ሸን ገሞእሹዋፕ ኦ ደንላናዉ ታን ባይ” ያጌዳ።

12 የሱሳ ካልያዋንቱ ዛሪደ፡ “ጎዳዉ፡ እ ገሞእሹዳዋ ግደፕ፡ አዉ ሎኦናዋ” ያጌድኖ።

13 አልአዛር ሀይቁዳዋ የሱስ ኦዴዳ፤ ሽን አልአዛር ገሞአሺደ ግሴዳዋ ኦዴዳ ጊደ፡ ኡንቱንቱ ቆፔድኖ።

14 ሄዋ ድራሬ፡ የሱስ ጌሺደ ኡንቱንታ፡ “አልአዛር ሀይቁዳ።

15 ሀንተንቱ አማና ማላ፡ ታን ሄ ሳኣን ደኤናዎ፡ ሀንተንቱ ድራሬ ናሽታይ። ሽን ደንድተ፤ አኮ ቦይተ” ያጌዳ።

16 ሄዋጥ ጉይያን፡ ማንትያ ጌተትያ ቶማሰ ባረ ላገላቱዋ የሱሳ ካልያዋንታ፡ “የሱሳ ሀይቃናጢ ኮንካ ቃይ ቦይተ!” ያጌዳ።

የሱስ፡ ደንዲዋን ደኤዋ

17 የሱስ ጋክያ ዎደ፡ አልአዛራጢ ሞገቶደጥ ኦይዱ ጋላሳ ግዴዳዋ ደሜዳ።

18 ቢታንያ ካታማይ የሩሳላመጥ ሄዙ ኪሎ ሚትርያ ኬና ሃኬ።

19 ዳር አይሁዳቱ ማርቶን ማይራሞ ኡንቱንቱ እሻይ ሀይቁዳዋ መንግሥቱ ዬድኖ።

20 ማርታ የሱስ ዬዳዋ ሰሳደ፡ አ ሞካናጢ ከሳዱ፤ ሽን ማይራማ ጎላን አታዱ።

21 ማርታ የሱሳ፡ “ሳዳጢ፡ ኔን ሀዋን ደኤዳዋ ግድንቶ፡ ታ እሻይ ሀይቀና።

22 ሽን ኔን ዎሰያዋ አይ ግደጥነ፡ ጸሳይ ነጢ ሀራይ አቶ ሀእካ አማናዋ ታን ኤራይ” ያጋዱ።

23 የሱስ፡ “ነ እሻይ ሀይቁዋጥ ደንዳና” ያጌዳ።

24 ማርታ፡ “ዎድያ ጢርሰላን* ደንዲዋ ጋላሳ፡ እ ሀይቁዋጥ ደንዳናዋ ታን ኤራይ” ያጋዱ።

25 የሱስ እዝጢ፡ “ታን ደንዲዋን ደኤዋ፤ ታና አማንያ ኡራይ ሀራይ አቶ፡ ሀይቆጥካ ደኤዋን ደእናዋ።

26 ቃይ ደኤዋን ደእያ ኡራይነ ታና አማንያ ኡራይ ኡባይ ኡባካ ሀይቀና፤ ሄዋ ኔን አማናይ?” ያጌዳ።

27 ማርታ ዛራደ፡ “ሳዳጢ፡ ኤ ታን አማናይ፤ ኔን ጸሳ ናኣ፡ ሳኣ ያናጢ ደእያ ክርሰቶሳ ግድያዋ ታን አማናይ” ያጋዱ።

28 ማርታ ሄዋ ጌዳዋጥ ጉይያን፡ ባደ ባረ ሞቻትጢ ጌማን ጸሳደ፡ “ታማርሰያዌ ዪደ፡ ኔና ኮዬ” ያጋዱ።

29 ማይራማ ሄዋ ሰሴዳ ዎደ፡ ኤሌላ ደንዳ ኤቃደ የሱሳኮ ባዱ።

30 የሱስ ማርታ አ ሞኬዳ ሳኣን ደኤጥ አትን፡ ብር ቁር ካታማ ጋክቤና።

* 11:24 ዎድያ ጢርሰላን፡- ጸሳይ እሳ ዘረላ ኡባ ፕርዳጢ ሺሽያ ዎደ ጉሳ።

31 ማይራሞ መንጃ። ሳለን እዝና ደእያ አይሁዳቱ፤ እዛ ኤሊካ ደንዳ ኤቃደ ካረ ከሰያዋ በኢደ፤ አልእዛር ሞገቲዳ ዲፋዋ ባደ ያን ዩካናዉ ሀናዉ ያጊደ፤ እዞ ካሊደ ከሴድኖ።

32 ማይራማ የሱሰ ደኢያሳ ባደ የሱሳ በኤዳ ዋደ፤ አ ገድያ ቦላን ኩንዳዲ፤ “ጎዳዉ፤ ኔን ሀዋን ደኤዳዋ ግድንቶ፤ ታ እሻይ ሀይቀና ሸን!” ያጋዲ።

33 የሱሰ እዛ ዩክያዋን ቃይ እዝና ዩዳ አይሁዳቱካ ዩክያዋ በኢደ፤ ባረ ዋዛናን ዳሮ ሴለቲዳ፤ ቃይ ቶክ ሸምፔዳ።

34 ኡንቱንታ፡ “ሀቃን ሞጌድቲ?” ያጊደ ኦቶና፡ “ጎዳዉ፤ ያደ በእ” ያጊደ ዛሬድኖ።

35 የሱሰ አፎጾዳ።

36 ሄዋ ድራዉ፤ አይሁዳቱ፡ “አልእዛራ እ አይ ኬና ሲቅንቶ በእተ!” ያጌድኖ።

37 ሸን ኡንቱንቲ፣ እቱ እቱ፡ “ሀዌ ቆቃ ብታንያ ጸልሴዳዌ ሀ ብታኒ ሀይቀናዳን ኡዳናዉ ዳንዳየኔ?” ያጌድኖ።

የሱሰ አልእዛራ ሀይቁዋፕ ደንፊዳ

38 የሱሰ ቃይካ ዋዛናፕ ቃረቲደ፤ አልእዛር ሞገቲዳ ዲፋዋኮ ቤዳ፤ ሄ ዲፋ ጎንጎሉዋ ግዲደ ሹቻን ቁምኤት ኡቲዳ።

39 የሱሰ፡ “ሹቻ ድግተ!” ያጊደ አዛዜዳ።

ሀይቁዳ ብታንያ ምቻታ ማርታ፡ “ጎዳዉ፤ እ ሀይቆደፕ ኦይዲ ጋላሳ ግዴዳ ድራዉ፤ ሀእ ጽንቃናዋ!” ያጋዲ።

40 የሱሰ ማርቶ፡ “አማንያዋ ግደፕ፤ ኔን ጸሳ ቦንቸዋ በአናዋ ታን ነዉ ኡዳበይክታ?” ያጌዳ።

41 ኡንቱንቲ ሹቻ ደንፊድኖ፤ የሱሰ ሳሉዋ ፑደ ጸሊደ፡ “አዎ፤ ታን ግያዋ ኔን ሰሴዳ ድራዉ፤ ኔና ጋላታይ።

42 ኔን ኡባ ዋደ ሰሰያዋ ታን ኤራይ፤ ሸን ሀዋን ዩይ አዲደ ኤቆዳ አሳይ ኔን ታና ከቲዳዋ አማናና ማላ፤ ሀዋ ታን ኡንቱንቲ ድራዉ ጋይ” ያጌዳ።

43 የሱሰ ሄዋ ጌዳዋፕ ጉይያን፤ ባረ ቃላ ቶቁ ኦሊደ፤ “አልእዛራ፤ ሃ ከሳ!” ያጌዳ።

44 ሀይቁዳ አልእዛራ ኩሺን ገዲ ሻሉዋን ቃሸት ኡቲደ አ ዲሙካ አፍላን ካመት ኡቲዳዌ ከሰና የሱሰ ኡንቱንታ፡ “ብል አግተ! ቦ!” ያጌዳ።

ክርሰቶሳ ቦላ ማቀቲድኖ
(ማቶሳ 26:1-5፤ ማር. 14:1-2፤ ሉቃሳ 22:1-2)

45 ሄዋ ድራው፡ ማይራምኮ ዬዳ አይሁዳቱዋ፡፡ ጮራቱ የሱሰ ኦሌዳዋ በኢደ፡ አ አማኔድኖ፡፡

46 ሸን ኡንቱንቱ፡፡ እቱ እቱ ፓርሳዋቱዋኮ ቢደ፡ የሱሰ ኦሌዳዋ ኡንቱንቶ ኦዴድኖ፡፡

47 ሄዋ፡ ገይያን፡ ቁሳቱዋ ካፓቱን ፓርሳዋቱ ሸቁዋ ሺሺደ፡ “ሀ ብታኒ ዳሮ ዋልቃማ ማላታ አልያ ድራው፡ እያ ኦሳኔ?

48 ኡን አ ጮኡ ጊደ፡ አጎ፡ አሳይ ኡባይ አ አማናናዋ፤ ቃይ ሮመ ጋድያ አሳቱ ዪደ፡ ኑ ጌሻ ጎልያን ኑ አሳ ሳይሳና” ያጌድኖ፡፡

49 ኡንቱንቱ፡፡ እቱ ቃያ፡ ግያ፡ ሄ ላይል ቁሳቱዋ ኡባቱዋ ካፖ ግዴዳዌ፡ “ሀንተንቱ አይነ ኤርክታ!

50 አሳይ ኡባይ ሳይያዋ፡ አሳ ኡባ ድራው፡ እት አሳይ ሀይቁያዌ ሎአ ግድያዋ ሀንተንቱ አኬክተ?” ያጌዳ፡፡

51 እ ሄዋ ባረ፡ ግቤና፤ ሸን ሄ ላይል ቁሳቱዋ ኡባቱዋ ካፖ ግድያ ድራው፡ የሱሰ አይሁዳ አሳ ድራው ሀይቃናው በሰያዋ ናቢ ኦዴዳ፡፡

52 ቃይ የሱሰ አይሁዳ አሳ ጸላላው ሀይቃና፤ ሸን ላለት ደእያ ጸሳ ናና እቱዋ ኦል ሺሻናው ሀይቃናዋ፡፡

53 ሄ ጋላሳ፡ ደሚደ፡ ኡንቱንቱ አ ዎሳናው ማቀቱድኖ፡፡

54 ሄዋ ድራው፡ የሱሰ አይሁዳቱ ግዴዋን ቆንጮያን ያ ሃ ሀመትቤና፤ ሸን መላ ቢታ ጋጸን ደእያ ጋድያ፡ ኤፍሬማ ጌተትያ ካታማ ቤዳ፡፡ ባረና ካልያዋንቱና ሄዋን ታኬዳ፡፡

55 አይሁዳቱ ፓሰጋ ቦንቶያ ጋላሳይ ማቱዳ፤ ቃይ ዳሮ አሳይ ባረና ጌሻናው፡ ፓሰጋ ቦንቶያ ጋላሳይ ጋካና፡ ካሰ ዲማ ዲማ ሳፕ የሩሳላመ ቤዳ፡፡

56 ኡንቱንቱ የሱሳ ኮዩኖ፤ ጌሻ ጎልያን ኤቂደ፡ “አያ ቆፒቱ? ፓሰጋ ቦንቶያሳ የሱሰ ዬኔ?” ያጊደ እቱ እቱዋ ኦቼድኖ፡፡

57 ቃይ ቁሳቱዋ ካፓቱን ፓርሳዋቱ የሱሳ ቃቻናው፡ እ ደኢያሳ ኤርያዌ ኦንነ ባረንቶ ኦዳና ማላ አዛዜድኖ፡፡

12

የሱሳ ሸቱዋ ኦኬዳ ሞሽራቶ
(ማቶሳ 26:6-13፤ ማር. 14:3-9)

1 ፓሰጋ ቦንቶያ ጋላሳ፡ ኡሱቱን ጋላሳ ካሰቲደ፡ የሱሰ እ ሀይቁዋ፡ ደንሌዳ አልአዛር ደእያ ቢታንያ ግያ ካታማ ቤዳ፡፡

2 ሄ ሳኦን ኡንቱንቱ እው ካወዋ ካሌድኖ፤ አልአዛር አናና ኡቲደ እት፡ ሞያዋንቱ ግድን ኡት ደእሸን፡ ማርታ ካወዋ ግሻ ሞዛዳ፡፡

3 ማይራማ ዳር ሻሉዋን ዛልኤትያ እት ጸራሙሰያ ግድያ ናርደሳ ጌተትያ ጌሻ ሸቱዋ አሃደ፣ የሱሳ ገድያ ኦካደ ባረ ብናናን ኦ ገድያ ቁጫዱ፤ ጎልያ ኡባይ ሸቱዋ ሳወዋን ቶሽኩ ጌ።

4 ሸን የሱሳ ካልያዋንቱፕ እቱ፣ የሱሳ አለ እማናዌ፣ ይሁዳ አሰቆርቱ።

5 “ሀ ሸቱ ሄዙ ጾቱ ዲናርያን ዛልኤትና፣ አያወ ሄዌ ህዬሳወ እመተኔ?” ያጌዳ።

6 እ ካይሱዋ ግዴዳ ድራወ፣ ሄዋ ጌዳፕ አትን፣ ህዬሳወ ቃረቲደ ግቤና፤ እ ሚሻ ቃርጨትያ ኦይቂያዋ ግድያ ድራወ፣ ኡባ ዎደ አፕ ባረወ አኬዳ።

7 የሱሰ፣ “ሀ ሸቱዋ ታን ሞገትያ ጋላሳይ ጋካናወ እዛ አያወ ሞንጆኔ? እዘ አግተ።

8 ህዬሳቱ ኡባ ዎደ ህንተናና ደአና፤ ሸን ታን ኡባ ዎደ ህንተናና ደእከ” ያጌዳ።

9 አይሁዳቱዋፕ ዳር አሳይ የሱሰ ቢታንያን ደእያዋ ሰሲደ፣ ያ ቤዳ፤ ኡንቱንቱ የሱሳ በአና ግሻ ጸላላወ ግደናን፣ እ ሀይቁዋፕ ደንሌዳ አልኣዛራካ በአናወ ቤድኖ።

10 ሄዋ ድራወ፣ ቄሳቱዋ ካፓቱ አልኣዛራካ ቃይ ዎቆናወ ማቀቱድኖ።

11 አያወ ጎፕ፣ አልኣዛራ ጋሱዋን ዳር አይሁዳቱ ባረና ካለልያዋንታ አጊደ፣ የሱሳ አማኒኖ።

የሱሰ ቦንቹዋን የሩሳላመ ገሌዳ
(ማቶሳ 21:1-11፤ ማር. 11:1-11፤ ሉቃሳ 19:28-40)

12 ዋንተላ ጋላሰ ፓሰጋ ቦንቹያሳ ዬዳ ዳር አሳይ የሱሰ የሩሳላመ ብያዋ ሰሴዳ።

13 ያቲደ ዛምባ ሀይላ ኦይቂደ፣ * እ ሞካናወ ከሴድኖ። ባረንቱ ኮሻ ጶቁ ኦሊደ።

“ጸሳይ ጋላተቶ!

ጸሳ ሱንላን ይያ እሰራኤልያ ካቲ አንጀቱዳዋ!”

ያጌድኖ።

14-15 ጸሳ ማጸፋይ፣

“ጽዮን ካታማወ፣ ያዮፓ!

በእ፣ ነ ካቲ ሀረ ማራ ቦላ ኡቲደ ዬ”

ግያዋዳን፣ የሱሰ ሀረ ማራ ደሚደ፣ እ ቶጌዳ።

12:8 ዛረ. 15:11 * 12:13 ዛምባ ሀይላ ኦይቂደ፡- ሀዌ አይሁዳ አሳይ ኤረቱዳ አሳ ሞካያ ዎጋ። 12:13 ማዘ. 118:25

16 የሱሳ ካልያዋንቱ ሄዋ ካስ አኬክበይክኖ፤ ሸን የሱስ ለንቸቲዳዋጥ ጉይያን፣ ጸሳ ማጻፋይ ሄዋ ኡባ ጌዳዋን ቃይ ኡንቸንቱካ ሄዋ ኡባ የሱሳው ኦፊዳዋ ሀሳዬድኖ።

17 አልአዛር ሞገቲዳ ጎንጎሉዋጥ የሱስ አ ጼሲድ፣ ሀይቁዋጥ ደንጮዳ ዎድ፣ የሱሳና ደእያ ዳሮ አሳይ የሱሳው ማርካቲዳ።

18 ዳሮ አሳይ አ ሞካናው ከሴዳዌ፣ እ ሄ ዎልቃማ ማላልያዎ ኦፊዳ ድራሳ።

19 ሄዎ ድራው፣ ፓርሳዋቱ እቱ እቱዋ፣ “ሀንተንቱ እይነ ኦላናው ዳንዳየናዎ በአቲ! በአተ፣ ጋደ ኡባይ አ ጌዱዋ ካሌዳ” ያጌድኖ።

20 ፓሰጋ ለንቸያ ጋላስ ጎይናናው የሩሳላመ ቤዳዋንቱ ግደን እት እት ግሪከ አሳቱ ደኢኖ።

21 ኡንቸንቱ ጋሊላ ጋድያን ቤተሳይዳ ጌተትያ ካታማጥ ዬዳ ፕልጸሳኮ ቢድ፣ “ጎዳው፣ ኑን የሱሳ በአናው ኮዬቶ” ያጌደ ዎሴድኖ።

22 ፕልጸስ ቢድ፣ እንድራሳው ኦድና ላአቱካ ቢድ፣ የሱሳው ኦዴድኖ።

23 የሱስ ኡንቸንቶ ሀዋዳን ያጌዳ፤ “ታን፣ አሳ ናአይ፣ ለንቸትያ ሳቲ ጋኬዳ።

24 ታን ሀንተንቶ ቱሙዋ ኦዳይ፤ እት ዛርጋ አይፋታ ቢታን ዎቆእደ ዎቃና ቆየጥ፣ ባረካ አታው። ሸን ሄ ዛርጋ አይፋታ ዎቆጥ፣ ዳሮ አይፍያ አይፋው።

25 ባረ ሸሞጥዋ ሲቅያ ኦንነ ባይዜ፤ ቃይ ባረ ሸሞጥዋ ሀ ሳአን እጽያ ኦንነ መድና ደኦ አሼ።

26 ኦንነ ታው ኦሶጥ፣ ታና ካላናው በሴ፤ ቃይ ታን ደእያ ሳአን ታው ኦሶያዌካ ደአናዎ። ታው ኦሶያ ኦናነ፣ ታ አቡካ አ ለንቸናዎ።

27 “ሀእ ታ ሸሞጥ ዳሮ ኡንኤቲዳ፤ ያትና ዋጎ? ታን፣ ታ አቦ፣ ታና ሀ ሳታትጥ አሻርክ’ ያጎ? ቱይት፣ ታን ሀ ሳትያን ዬዳዌ ሀዎ ድራሳ።

28 ታ አቦ፣ ነ ሱንላ ለንቸ” ያጌዳ።

ሄ ዎደ ሳሉዋጥ፣ “ታን ታ ሱንላ ለንቸድ፤ ቃይካ ጉጃደ ለንቸና” ያግያ ቃላይ ዬዳ።

29 ሄ ሳአን ኤቄዳ ጮራ አሳይ ሄ ቃላ ሰሲድ፣ “ሄዌ ጉጉንላ” ያጌዳ።

ሀራንቱ ቃይ፣ “ኪታንቻይ አው ሃሳዬዳ” ያጌድኖ።

30 የሱስ ዛሪደ ኡንቸንታ፣ “ሀ ቃላይ ሀንተንቱ ድራው ዬዳዋጥ አትን፣ ታ ድራሳ ግደና።

31 ሀ ሳኦይ ፕርደትያ ዎዲ ሀኦ፤ ሀ ሳኦ ተ ሞድያዌ ሀኦ ካረ ኦላታናዎ።

32 ቃይ ታን ማስቃልያ ቦላ ካቀትያ ዎደ፣ ኦሳ ኡባ ታኮ ሳቻና” ያጌዳ።

33 እ ሄዎ ጌዳዌ ኦይ ማላ ሀይቁዎ እ ሀይቃነንቶነ ኡንቱንታ ኤርሳናሳ።

34 ዳር ኦሳይ ዛሪደ የሱሳ፣ “ኑ ህጊ ክርሰቶሰ መድናዉ ደእያዎ ኦይ። ያትና፣ ኔን ዋጋደ፣ ‘ኦሳ ናኦይ ማስቃልያ ቦላ ካቀታና’ ጋይ? ሄ ኦሳ ናኦይ ኦኔ?” ያጌድኖ።

35 የሱሰ፣ “ፖኡ ህንተናና ጉላ ዎድያ ጋሞኦናዎ። ህንተንቶ ጴመና ማላ፣ ፖኡ ደእሸን፣ ፖኡዋን ሀመትተ። ጴማን ሀመትያ ኡራይ ሀቃ ብንቶነ ኤርና።

36 ፖኡዎ ኦሳ ግዳና ማላ፣ ህንተንቶ ፖኡ ደእሸን፣ ፖኡዎ ኦማንተ” ያጌዳ። የሱሰ ሄዎ ሃሳዬዳዎፕ ጉይያን፣ ቢደ ኡንቱንቱፕ ጌመቱዳ።

ኦይሁዳቱ ኦማናን እጼዳ ሀኖታ

37-38 እ ሄዎ ኬና ዎልቃማ ማላታ ኡንቱንቱ ሰንሳን ኦሞፕካ፣ ናብያ እሳያሰ።

“ሳዳዉ፣ ኑ ማርካተላ ኡን ኦማኔዳ?

ጎዳይ ባረ ዎልቃ ኦና በሴዳ?”

ጌዳዌ ቱማ ግዳና ማላ፣ ኡንቱንቱ ኦ ኦማንበይክኖ።

39-40 እሳያሰ ቃይካ፣

“ኡንቱንቱ ኦይፊ ጼለና ማላ፣

ኡንቱንቱ ዎዛናይካ ኦኤከና ማላ፣

ኡንቱንቱ ጸሳኮ ሰሞና፣ እ ኡንቱንታ ፓና ማላ፣

ጸሳይ ኡንቱንቱ ኦይፍያ ቆቅሴዳ።

ኡንቱንቱ ዎዛና ዳሞሴዳ”

ጌዳ ድራዉ፣ ኡንቱንቱ ኦማናናዉ ዳንዳይበይክኖ።

41 እሳያሰ የሱሳ ቦንቹዎ በኤዳ ድራዉነ ቃይ ኦሳ ሃሳዬዳ ድራዉ፣ ተ ሄዎ ጌዳ።

† 12:31 ሀ ሳኦ- ጉሳይ ሀ ኦላሞያ ግዳደ ሀ ዮሃን ሞሽራቹዋን ደእያ ሀ ሳኦ ግያዌ ሀ ሳኦ ቦላ ደእያ ኦሳን ኡንቱንቱ ካሃ ባረሳ ኦላደ ሞድያ ኡታ ኦያና ዎልቃ በሴ።

12:34 ማዝ. 110:4፤ ኦሳ. 9:7፤ ህዝ. 37:25፤ ዳኔላ 7:14 12:37-38 ኦሳ. 53:1 12:39-40 ኦሳ. 6:10 † 12:41 ኦሳያሰ የሱሳ ቦንቹዎ በኤዳ ድራዉነ ቃይ ኦሳ ሃሳዬዳ ድራዉ፣ ዎይ ኦሳያሰ ጸሳ ቦንቹዎ በኤዳ ድራዉነ ቃይ የሱሳ ሃሳዬዳ ድራዉ።

42 ሄዋ ግድናካ፣ ሀራይ አቶ አይሁዳቱ ካፓቱዋጥካ ጮራቱ የሱሳ አማኔድኖ። ሽን ፓርሳዋቱ ባረና አይሁዳቱ ዋሳ ጎልያፕ ከሲኖ ጊደ ያዬዳ ድራው፣ አማኔዳ ጊደ ማርካትበይክኖ።

43 አያው ጎፕ፣ ኡንቱንቱ ጸሳ ሳባፕ አሊደ፣ አሳ ሳባ ሲቁድኖ።

44 የሱሰ ባረ ቃላ ቶቁ አሊደ ያጌዳ፤ “ታና አማንያ ኦንነ ታና ኪቱዳዋካ አማንያዋፕ አትን፣ ታ ጸላላ አማነና።

45 ታና በእያ ኦንነ ታና ኪቱዳዋካ በኤ።

46 ታና አማንያ ኡባይ ቆማን ደኤና ማላ፣ ታን ፖኡዋ ግዳደ ሳኣ ያድ።

47 ታ ቃላ ሰሲደ አዛዘተና ኡራ ኦናን ታን ፕርድክ፤ አያው ጎፕ፣ ታን አላምያ አሻናው ዬዳዋፕ አትን፣ ፕርዳናው ያበይክ።

48 ታና እጽያ ኦናን ቃይ ታ ቃላ አከና ኦናን ፕርድያዌ ደኤ። ታን ኦዴዳ ቃላይ ዉርሰሳ ጋላሰ ሄ ኡራ ፕርዳና።

49 አያው ጎፕ፣ ታን ሀዋ ታፕ ሃሳያበይክ፤ ሽን ታና ኪቱዳ ታ አቡ ታን ጋናዋን ሃሳያናዋ ታና አዛዜዳ።

50 ቃይ አ አዛዙ መድና ደኡዋ አህያዋ ታን ኤራይ፤ ሄዋ ድራው፣ ታን ኦድያዌ ታ አቡ ታና ኦዳ ጊደ ኦዴዳዋ” ያጌዳ።

13

የሱሰ ባረ ካልያዋንቱ ገድያ ሜጬዳ

1 ፓሰጋ ቦንቶያ ጋላሳይ ጋካናፕ ካሰቲደ፣ ሀ ሳኣፕ ሻከቲደ፣ አዉዋኮ ብያ ዋዲ ጋኬዳዋ የሱሰ ኤሬዳ፤ ሀ ሳኣን ደእያ ባረዋንታ ኡባ ዋደ ሲቁዳ፤ ዉርሰሳይ ጋካናዉ ኡንቱንታ ሲቁዳ።

2 የሱሰን ካልያዋንቱ ካዉዋ ሚሽን፣ ሰሞና ናኣ ይሁዳ አሰቆሮቱ የሱሳ አላ እማናዳን፣ ጸላሂ አ ቆፍሰ ዋሴዳ።

3 የሱሰ ባረ አዉ ኡባባ አ ኩሽያን ዋሴዳዋ፣ ቃይ ጸሳ ማታፕ አ ዬዳዋን፣ ሰሚደ አኮ ባናዋ ኤሬዳ።

4 የሱሰ ምያሳፕ ደንድ ኤቁደ፣ ቦላ ባጋ ማዬዋ ቃር ዋሴደ፣ ፖጸ ባረ ዴሳን ዳንጬዳ።

5 ሄዋፕ ጉይያን፣ ሃሳ ሜቻ ሚሻን ትጊደ፣ ባረና ካልያዋንቱ ገድያ ሜቻን ባረ ዴሳን ዳንጬዳ ፖጸን ቁጬሳ ደሜዳ።

6 የሱሰ ሰሞን ጸጽሮሳኮ ዪና ጸጽሮሰ፣ “ጎዳዉ፣ ኔን ታ ገድያ ሜጬናዉ ሀናይዬ?” ያጌዳ።

7 የሱሰ ዛሬደ አ፣ “ታን ኦላያዋ ኔን ሀእ ኤራካ፤ ሽን ጉየፕ ኤራናሳ” ያጌዳ።

8 ጸጽሮሰ፣ “ኔን ታ ገድያ ኡባካ ሜጬካ!” ያጌዳ።

የሱስ አ፡ “ታን ነ ገድያ ሜጫና ጳዮፕ፡ ነወነ ታወነ እትፕተላይ ባዋ” ያጊደ ዛሪዳ።

9 ሰሞና ጳጳርስ የሱሳ፡ “ጎዳወ፡ ያቶፕ፡ ታ ገድያ ጸላላ ሜጫፕ፤ ታ ኩሽያካ ታ ሁጲያካ ሜጫ!” ያጊደ።

10 የሱስ ዛሪደ፡ “ቦላ ሜጫት ድጌዳ ኡሪይ እንነ ገድያፕ ሀራባ ሜጫታናዉ ኮሽና፤ አዉ ኡባሳይካ ጌሻ። ቃይ ሀንተንቲካ ጌሻ፤ ሸን ኡባይ ጌሻ ግድክታ” ያጊደ።

11 አያዉ ጎፕ፡ የሱስ ባረና አላ እማና ኡሪይ እንንቶነ ኤሪዳ፤ እ፡ “ሀንተንቲ ኡባይ ጌሻ ግድክታ” ጌዳዌ ሀዋሳ።

12 ኡንቲንቲ ገድያ ሜጫዳዋፕ ጉይያን፡ የሱስ ባረ ማዩዋ ማዩደ፡ ባረሳ ጉዮ ሰም ብ ኡቲደ ኡንቲንታ ያጊደ፤ “ታን ሀንተንቶ ኦሴዳዋ እኬኪቲ?

13 ሀንተንቲ ታና፡ ታማርሰያዋን ጎዳዉ ጊታ፤ ታን ሄ ሀንተንቲ ግያዋ ግድያ ድራዉ፡ ሎይሴድታ።

14 ታን ሀንተንቶ ጎዳነ ሀንተንታ ታማርሰያዋ ግዳደ፡ ሀንተንቲ ገድያ ሜጫያዋ ግደፕ፡ ሀንተንቲካ እቲ እቲዋ ገድያ ሜጫናዉ በሴ።

15 አያዉ ጎፕ፡ ታን ሀንተንቶ ኦሴዳዋዳን፡ ሀንተንቲካ ኦላና ማላ፡ ሀንተንቶ ሌምሱዋ ግዳድ።

16 ታን ሀንተንቶ ቱሙዋ ኦዳይ፤ ቆማይ ባረ ጎዳፕ አ□ና። ቃይ ኪተቲዳ ኡሪይካ ባረና ኪቲዳዋፕ አ□ና።

17 ሀንተንቲ ሄዋ ኤሪደ አላያዋ ግደፕ እንጀቲዳዋንታ።

18 “ታን ሀንተንቶ ኡባባ ሃሳይከ። ታን ደራዳዋንታ ኡሪይ፤ ሸን ጸሳ ማጻፋይ፡ ታን ባርሴዳዌ ታ ኩሽያ ሳኤዳ፡ ጌዳዌ ቱማ ግዳናዉ በሴ።

19 ሄዌ ሀንያ ዎደ ታን ታና * ግድያዋ ሀንተንቲ አማናና ማላ፡ ሄዌ ሀናናፕ ካሰታደ ሀንተንቶ ሀናናዋ ኦዳይ።

20 ታን ሀንተንቶ ቱሙዋ ኦዳይ፤ ታን ኪትያ ኦናን ሞክያ ኡሪይ ታናካ ሞኬ፤ ቃይ ታና ሞክያ እንነ ታና ኪቲዳዋ ሞኬ” ያጊደ።

የሱስ ባረና አላ እማናዌ እንንቶ ካሰቲደ ኦዳዳ
(ማቶሳ 26:20-25፤ ማር. 14:17-21፤ ሉቃሳ 22:21-23)

21 የሱስ ሄዋ ሃሳዬዳዋፕ ጉይያን፡ ባረ ዎዛናን ዳር ሙቶቲደ፡ “ታን ሀንተንቶ ቱሙዋ ኦዳይ፤ ታና ሀንተፕ እቲ አላ እማናዋ” ጊደ ቆንጭያን ኦዳዳ።

13:18 ማዘ. 41:9 * 13:19 ታን ታና፡ የሀ። 8:24 ጸልተ።

22 እ ኦና ሃሳይንቶን፣ ካልያዋንቶ ኡባካ ኤሪተናን እጽና፣ እቱ እቱዋ ጸሌድና።

23 የሱሳ ካልያዋንቱ፣ እቱ፣ የሱስ ሲቅያዌ፣ የሱሳ ማታን ኡቴዳ።

24 ሄዋ ድራዉ፣ ሰሞና ጳጵሮስ ሄ ካልያዋ ሰሞኢድ፣ “እ ኦና ግንቶ፣ አነ እ ኦቻ” ያጌዳ።

25 ሄዋ ድራዉ፣ ሄ ካልያዌ የሱሳ ሀይላኮ ሺቂድ፣ “ኅዳዉ፣ እ ኦኔ?” ያጌዳ።

26 የሱስ ዛሪድ፣ “ታን ኡክላን ጫባ ቱሻደ እምያዌ እ” ያጌዳ። ቃይ ኡክላ መንሐ አኪድ፣ ጫባ ቱሺድ፣ ሰሞና ናኣ፣ ይሁዳ አስቆርታዉ እጫዳ።

27 ይሁዳይ ኡክላ መንሐዋ አኮዋ፣ ጉይያን፣ ሴጻናይ ኤለካ ይሁዳን ገሌዳ። የሱስ አ፣ “ኔን አላናዋ ኤሌላ አላ!” ያጌዳ።

28 ሸን ሄ ሳኣን ኡቴዳዋንቱ፣ ኦንነ የሱስ ሄዋ አ አያዉ ጌደንቶን ኤርቤና።

29 ይሁዳይ ሚሻ ቃርጨትያ ኦይቂያ ድራዉ፣ ካልያዋንቱ፣ እቱ እቱ የሱስ ይሁዳ፣ “ፓሰጋ ቦንቶያ ጋላሳዉ ባረና ኮሽያዋ ባደ ሻማ ዋይ ሀዬሳዉ ሞጶዋታ እማ ጌዳ” ያጌደ ቆፔድና።

30 ይሁዳይ ኡክላ መንሐዋ አኪድ፣ ኤለካ ካረ ከሴዳ፤ ሄ ዋደ ሳኣይ ቃማ።

ኦራሳ አዛዙዋ

31 ይሁዳይ ካረ ከሴዳዋ፣ ጉይያን፣ የሱስ ያጌዳ፤ “ሀእ ታን አሳ ናኣይ ቦንቱታድ፣ ጸሳይካ ታ ባጋና ቦንቱቱዳ።

32 ጸሳይ ታ ባጋና፣ አሳ ናኣ ባጋና ቦንቱቶ፣ እ ባረ ሁጸዉ ታና አሳ ናኣ ቦንቻናዋ፤ ቃይ እ ታና ኤለካ ቦንቻናዋ።

33 ታ ናቶ፣ ታን ሀንተናና ዳር ዋድያ ጋምእከ። ሀንተንቱ ታና ኮያና፤ ሸን ታን አይሁዳቱዋ፣ ታን ብያሳ ሀንተንቱ ባናዉ ዳንዳይክታ፣ ጌዳዋዳን፣ ሀንተዉካ ሀእ ኦዳይ።

34 ታን ሀንተንታ ኦራሳ አዛዙዋ አዛዛይ፤ እቱ እቱዋ ሲቅተ። ታን ሀንተንታ ሲቆዳዋዳንካ፣ ሀንተንቱ እቱ እቱዋ ሲቃና ቦሴ።

35 ሀንተንቱ እቱ እቱዋና ሲቅቶ፣ ታና ካልያዋንታ ግድያዋ አሳይ ኡባይ ኤራና” ያጌዳ።

ጳጵሮስ ካዳናዋ የሱስ ካስቲደ ኦዴዳ
(ማቶሳ 26:31-35፤ ማር. 14:27-31፤ ሉቃሳ 22:31-34)

36 ሰሞን ጳጵሮስ የሱሳ፣ “ኅዳዉ፣ ኔን ሀቃ ባይ?” ያጌዳ።

የሱስ ዛሪደ፡ “ታን ብያሳ ኔን ሀእ ታና ካላናው ዳንዳያካ፤ ሸን ጉየፕ ካላና” ያጌዳ።

37 ጳጳሮስ፡ “ጎዳው፡ ታን ኔና ሀእ ካላናው እያው ዳንዳይክታ? ታን ነ ድራው፡ ሀይቃናውካ ጊጋ ኡታድ!” ያጌዳ።

38 የሱስ ዛሪደ፡ “ታ ድራው ሀይቃናው ሀእ ቱሙ ጊጋ ኡታዲ? ታን ነው ቱሙዋ ኦዳይ፤ ኩቱ ዋሳናፕ ካስ፡ ኔን ታና ሄዙ ገደ ካዳናሳ” ያጌዳ።

14

የሱስ አወዋኮ አፍያ ኦግያ

1 የሱስ ካልያዋንታ “ሀንተንቱ ዋዛናይ ሀርጎፖ፤ ጸሳን አማንተ፤ ታናንካ አማንተ። *

2 ታ አቡ ጎለን ዳሮ ሳአይ ደኤ። ሄዋ ግደነንቶ፡ ታን ሀንተንቶ ሄዋ ኦድከ፤ ታን ሀንተንቶ ሳአ ጊግሳናው ባይ።

3 ታን ባደ ሳአ ጊግሴዳዋፕ ጉይያን፡ ታን ደእያ ሳአን ሀንተንቱካ ደእና ማላ፡ ሰማ ያደ ሀንተንታ ታኮ አፋና።

4 ቃይ ሀንተንቱ ታን ብያ ኦግያ ኤሪታ” ያጌዳ።

5 ቶማስ፡ “ጎዳው፡ ኔን ብያሳ ኔን ኤርኮ፤ ኦግያ ዋኒደ ኤራናው ዳንዳይቶ?” ያጌዳ።

6 የሱስ ዛሪደ፡ “ኦጊ፡ ቱሙካ ደኡ ታና፤ ታ ባጋናፕ አትን፡ ኦንጎ ታ አቡኮ ባናው ዳንዳየና።

7 ሀንተንቱ ታና ኤርያዋ ግድንቶ፡ ታ አባካ ኤራና፤ ሀእፕ ደሚደ፡ ሀንተንቱ አ ኤሪታኑ ቃይ አ በኤድታ” ያጌዳ።

8 ፕልጶስ የሱሳ፡ “ጎዳው፡ አወዋ ኦና በሳ፤ ሄዌ ኦው ግዳናዋ” ያጌዳ።

9 የሱስ ዛሪደ ያጌዳ፤ “ፕልጶሳ፡ ታን ሀዋ ኬና ዎድያ ሀንተናና ደእናካ ታና ኤርከ? ታና በኤዳ ኤራይ አወዋካ በኤዳ፤ ያትና፡ ኔን ዋጋደ፡ ‘አወዋ ኦና በሳ’ ጋይ?”

10 ታን አወዋ ግድን ደእያዋ ቃይ አወካ ታ ግድን ደእያዋ ኔን አማንከ? ታን ሀንተንቶ ኦድያ ቃላ ታን ታፕ ኦድከ፤ ሸን ታ ግድን ደእያ አው ባረ ኦሱዋ ኦሌ።

11 ታን አወዋ ግድን ደእያዋን ቃይ አወካ ታ ግድን ደእያዋ ታና አማንተ፤ ሄዌ ጳዮፕ፡ ታ ኦሱዋባው ታና አማንተ።

* 14:1 ጸሳን አማንተ፤ ታናንካ አማንተ፡ ጸሳን አማኑ ሀንተው ደኤ ጉሳይ፡ ታናንካ አማኑ ደኤ ጉሳ።

12 “ታን ህንተንቶ ቱሙዋ ኦዳይ፤ ታና አማንያ ኡራይ ታን ኦልያ ኦሱዋ ኦላና። ታን አወዋኮ ብያ ድራወ። ሄ ኡራይ ሀዋጥ አድያ ኦሱዋ ኦላና።

13 አወ ናእ ጋሱዋን፣ ታ ባጋና ቦንቼታና ማላ፣ ታ ሱንላን ህንተንቱ ዋሰያ ኡባባ ታን ህንተንቶ ፖላና።

14 ህንተንቱ ታ ሱንላን ታና አያነ ኦቾፕካ፣ ታን ፖላና።

የሱሰ አያና ጌሻ ኪታናዉ እሜዳ ህደታ

15 “ህንተንቱ ታና ሲቅያዋ ግደፕ፣ ታ አዛዙዋ ናጋና።

16-17 ታን አወዋ ዋሳና፤ ህንተናና መድናዉ ደአና ማላ፣ ቱማተላ አያና፣ ሀራ መንጃልያዋ ህንተንቶ እ እማና። ሀ ሳአይ ሄ ቱማተላ አያና በኤናዋነ ኤረናዋ ግድያ ድራወ። እ አካናዉ ዳንዳየና፤ ሽን እ ህንተናና ደአያ ድራወነ ህንተንቱ ግደን ደአና ድራወ። ህንተንቱ እ ኤሪታ።

18 “ታን ህንተንታ አዉነ አታ ባይና ዪኦ ናናዳን ህንተረካ አጋባሽከ፤ ታን ሰማደ ህንተንቱኮ ያና።

19 ጉላ ዋድያፕ ጉይያን፣ አላሚ ታና ላኤንሉዋ በኤና፤ ሽን ህንተንቱ ታና በአና፤ ታን ደኡዋን ደአያ ድራወ። ህንተንቱካ ቃይ ደኡዋን ደአና።

20 ታን ታ አወዋ ግደን ደአያዋነ ህንተንቱ ታ ግደን ደአያዋ፣ ቃይ ታን ህንተንቱ ግደን ደአያዋነ ህንተንቱ ሄ ጋላሰ ኤራና።

21 “ታ አዛዙ አ ማታን ደአያ አሳይ፣ ቃይ ሄ አዛዙዋ ናግያዋ፣ እ ታና ሲቅያ አሳ። ታና ሲቅያ አሳ ታ አቡካ ሲቄ፤ ታንካ አ ሲቃይ። ታን አወ ቆንጫና” ያጌዳ።

22 ይሁዳ አሰቆርታ ግደና ይሁዳይ የሱሳ፣ “ጎዳወ፣ ኔን ነ ሁጺያ አላምያ በሰናን፣ ኑና በሳና ግያዋ ዋጋደ ጋይ?” ያጌዳ።

23 የሱሰ፣ “ታና ሲቅያ ኦንነ ታ ቃላ ናጌ፤ ታ አቡ አ ሲቃናዋ፤ ቃይ ታ አቡነ ታንነ አኮ ዪደ፣ አናና ደአና።

24 ታና ሲቃና ኡራይ ኦንነ ታ ቃላዉ አዛዘተና፤ ህንተንቱ ሰሰያ ቃላይ ታና ኪቱዳ አወዋፕ አትን፣ ታዋ ግደና።

25 “ታን ህንተናና እትፕ ደአደ ሀዋ ህንተንቶ ኦዳድ፤

26 ሽን ጌሻ አያናይ፣ መንጃልያዋ፣ አወ ታ ሱንላን ኪታናዋ፣ ህንተንታ ኡባባ ታማርሳናዋ። ታን ህንተንቶ ኦዳዳ ኡባባካ ህንተንታ ሀሳይሳናዋ።

27 “ታን ሳርተላ ህንተናና ዋላይ፤ ታ ሳርተላ ህንተንቶ እማይ። ታን አላሚ እምያ ሳርተላ ማላ እምከ። ህንተንቱ ሀርጎፕተነ ያዮፕተ።

28 ታን ህንተንቶ፣ ታን ባይ፤ ሸን ሰማይ ህንተንቱኮ ያና፣ ጌዳዋ ሰሴድታ፤ ህንተንቱ ታና ሲቁዳዋ ግድንቶ፣ ታፕ ኣወ ዳርያ ድራወ፣ ታን ኣወዋኮ ብያዋን ህንተንቱ ናሸታንታ።

29 ሄዌ ሀንያ ዎደ ህንተንቱ ኣማናና ማላ፣ ሄዌ ሀነናን ደእሸን፣ ሃናና ካሰታደ ታን ህንተንቶ ኣዳድ።

30 “ሀ ኣላዎያ ሞድያዌ ይያ ድራወ፣ ታን ሀዋፕ ሰንላን ህንተናና ሎይላ ሃሳይከ። ታና እ ኣይነ ኣላናዉ ዳንዳየና።

31 ሸን ታን ኣወዋ ሲቅያዋ ኣላሚ ኤራናዉ በሴ፤ ቃይ ታንካ ኣወ ታና ኣዛዜዳዋዳን ኣላይ። ደንድ ኤቂተ፤ ሀዋፕ ቦይተ።

15

ዎይንያ ግያ ቱራዉ ቱሙ ኣኑ የሱሳ

1 “ታን ዎይንያ ጌተትያ ቱራዉ ቱሙ ኣኖ፤ ጎሻንቻይ ታ ኣባ።

2 ታ ግደን ደእያ ኣይፍያ ኣይፈና ቱራ ማራ ኡባ እ ካሬ፤ ኣይፍያ ቱራ ማራ ኡባይ ካሰዋፕ ሎይላ ኣይፋናዳን፣ ሄ ማራ ዪራ እ ጭጊደ ጌሻና።

3 ታን ህንተንቶ ሀእ ኣዳዳ ቃላ ጋሱዋን፣ ህንተንቱ ጌሻ።

4 ታ ግደን ደእተ፤ ታንካ ህንተንቱ ግደን ደእና። ዎይንያ ቱራ ማራይ ኣኑዋና እትፕ ደኤናን ቆየፕ፣ ሄ ማራይ ባረካ ኣይፍያ ኣይፋናዉ ዳንዳየናዎዳን፣ ህንተንቱካ ታ ግደን ደኤናን ቆየፕ፣ ኣይፍያ ኣይፋናዉ ዳንዳይክታ።

5 “ታን ዎይንያ ቱራዉ ኣኖ፤ ህንተንቱ ሄ ቱራ ማራቱዋ። ታ ግደን ደእያ ኡራይ፣ ታንካ ኣ ግደን ደእያ ኡራይ፣ ዳር ኣይፍያ ኣይፋና፤ ኣያዉ ጎፕ፣ ታን ባይናን ህንተረካ ኣይነ ኣላናዉ ዳንዳይክታ።

6 ታ ግደን ደኤና ኡራይ ቱራ ማራዳን፣ ካረን የግና መሌዳዋ ሸሸደ ታማን ዎላና፣ እ ኤጻናዋ።

7 ህንተንቱ ታ ግደን ደእፕ፣ ቃይ ታ ቃላይካ ህንተንቱ ግደን ደእፕ፣ ህንተንቱ ኮዬዳዋ ኣያ ግድናካ ዎሰተ፤ ህንተንቱ ኣካንታ።

8 ህንተንቱ ዳር ኣይፍያ ኣይፎፕነ ቃይ ታና ካልያዋንታ ግደፕ፣ ሄዋን ታ ኣቡ ቦንቹታናዋ።

9 ኣወ ታና ሲቁዳዋዳን፣ ታንካ ህንተንታ ሲቃድ፤ ታ ሲቁዋን ደእተ።

10 ታን ታ ኣቡ ኣዛዙዋ ናጋደ እ ሲቁዋን ደኤዳዋዳን፣ ህንተንቱካ ታ ኣዛዙዋ ናጎፕ፣ ታ ሲቁዋን ደእነታ።

11 “ታ ናሸቻይ ህንተናና ደእና ማላን፣ ህንተንቱ ናሸቻይ ኩመንላ ግዳና ማላ፣ ታን ሀዋ ህንተንቶ ኣዳድ።

12 ታ አዛዙ ሀዋ፤ ታን ህንተንታ ሲቅያዋዳን፣ ህንተንቱካ እቱ እቱዋና ሲቀትተ።

13 ባረ ሸምቸዋ ባረ ላገዉ አሌደ እምያዋጥ አድያ ሲቁ ኦስነካ ባዋ።

14 ታን ህንተንታ አዛዜዳዋ ኡባ አጾጥ፣ ህንተንቱ ታ ላገቱዋ።

15 “አይሊ ባረ ጎዳይ ኦሳያዋ ኤረና ድራዉ፣ ታን ህንተንታ ሀዋጥ ሰንጻዉ አይላቱዋ ጊከ፤ ሸን ታን ህንተንታ ታ ላገቱዋ ጋድ። አያዉ ጎጥ፣ ታ አዉዋጥ ሰሴዳ ኡባባ ታን ህንተንቶ ኦዲድ።

16 ታን ህንተንታ ደሬዳዋጥ አትን፣ ህንተንቱ ታና ደርበይክታ። ህንተንቱ ቢደ አይፍያ አይፋና ማላነ ደአና ማላ፣ ታን ህንተንታ ሱንጻድ። ቃይ አዉካ ህንተንቱ ታ ሱንጻን* ዋሴዳዋ ኡባ እማና።

17 ታን ህንተንታ አዛዝያዌ ሀዋ፤ እቱ እቱዋና ሲቀትተ።

የሱሰ ሀ አላሚ እጽያዋ ኦዴዳ

18 “አላሚ ህንተንታ እጸጥ፣ ካሰቲደ ታና እጹዳዋ አኬክተ።

19 ህንተንቱ አላምያሳ ግዴደንቶ፣ አላሚ ባረዋዳን ህንተንታ ሲቀና፤ ሸን ታን ህንተንታ አላምያጥ ደሬዳዋጥ አትን፣ ህንተንቱ አላምያሳ ግድክታ፤ አላሚ ህንተንታ እጽያዌ ሀዋሳ።

20 “አይሊ ባረ ጎዳጥ ዳረና’ ጋደ ታን ህንተንቶ ኦዴዳዋ ሀሳይተ። ኡንቱንቱ ታና የደርሴዳዋ ግደጥ፣ ህንተናካ የደርሳና። ኡንቱንቱ ታ ቃላ ናጌዳዋ ግደጥ፣ ህንተንቱ ቃላካ ናጋናዋንታ።

21 ሸን ኡንቱንቱ ታና ኪቲዳዋ ኤረና ድራዉ፣ ሀ ኡባ ታ ጋሱዋን ኡንቱንቱ ህንተንቱ ቦላ አፋናዋንታ።

22 ታን ያደ ኡንቱንቶ ኦደናዋ ግድንቶ፣ ኡንቱንቶ ናጋራ ግደና፤ ሸን ሀእ ኡንቱንቱ ኦሳያ ናጋራ ጋሶይያዌ ባዋ።

23-24 ታና እጽያዌ ታ አዉዋካ እጹዳ። ኦንነ አላቤና ኦሱዋ ኡንቱንቱ ግድን ታን ኦላቤናባ ግድንቶ፣ ኡንቱንቶ ናጋራ ግደናን አታናዋ፤ ሸን ሀእ ኡንቱንቱ ታን ኦሴዳ ኦሱዋ በኪደ፣ ታናካ ታ አዉዋካ እጹድኖ።

25 ሸን ኡንቱንቱ ህግያን፣ ‘ታና ጮ እጹድኖ’ ጌተቲደ ጸፈቲዳዌ ፖለታና ማላ፣ ሀዌ ሀኔዳ።

26 “ሸን አዉዋጥ ይያ ቱማተላ አያናይ መንግሥያዌ ያናዋ። ታን አዉዋጥ ህንተንቶ አ የዳና፤ ቃይ እ ታባ ማርካታናዋ።

27 ህንተካ ቃይ ካሰጥ ዶሚደ፣ ታናና ደእያ ድራዉ፣ ታባ ማርካታና።

* 15:16 ታ ሱንጻን- ዋይ “ታና ካልያዋንታ ግድያ ድራዉ” 15:25 ማዝ. 35:19፤ 69:4

16

- 1 “ታን ሀዋ ህንተንቱ ቆበተና ማላ፡ ህንተንቶ ኦዲድ።
- 2 ኢንቱንቱ ህንተንታ ባረንቱ አይሁዳ ዎሳ ጎልያፕ ከሰ የዳናዋንታ። ሄዋ ቦላ ቃይ ህንተንታ ዎድያ ኡራይ ጸሳዉ ኦልያዋ አዉ ማላትያ ዎዲ ያናዋ።
- 3 ኢንቱንቱ ሄዋ ህንተንቱ ቦላ ኦልያዌ ታናነ አዉዋ ኤረና ድራሳ።
- 4 ሸን ኢንቱንቱ ሄዋ ህንተንቱ ቦላ ኦልያ ዎዲ ጋክያ ዎደ፡ ታን ህንተንቶ ኦዴዳዋ ህንተንቱ ሀሳያና ማላ፡ ታን ህንተንቶ ሀዋ ኦዲድ።

ጌሻ አያና ኦሱዋ

- “ታን ህንተናና ደእያ ድራዉ፡ ኮይሮ ሄዋ ህንተንቶ ኦዳበይከ።
- 5 ሸን ሀእ ታን ታና ከቴዳዋኮ ባይ፤ ሸን ህንተፕ ኦንነ፡ ‘ሀቃ ባይ?’ ጌደ ታና ኦቶያዌ ባዋ።
- 6 ሸን ታን ሀዋ ኦዴዳ ድራዉ፡ ህንተንቱ ዎዛናን ዳሮ ካዩ ደኤ።
- 7 ሸን ታን ህንተንቶ ቱሙዋ ኦዳይ፤ ታን ብያዌ ህንተንቶ ሎእ። አያዉ ጎፕ፡ ታን ባና ቆየፕ፡ መን፻ልያዌ ህንተንቱኮ ዬና፤ ሸን ታን ቦፕ፡ እ ህንተንቱኮ የዳና።
- 8 ቃይ መን፻ልያዌ ዪደ፡ ኢንቱንቱ ናጋራባ፡ ጸሳ ጽሎተላባነ ፕሮዳባ ሀ ሳእ አሳይ ባይዜዳዋ በሳናዋ።
- 9 ናጋራባይ አሳይ ታና አማነና ድራሳ።
- 10 ጽሎተላባይ ቃይ ታን አዉዋኮ ብያ ድራዉ፡ ህንተንቱ ታና ላኤንሉዋ በእክታ።
- 11 ጸሳ ፕሮዳባይ ቃይ አላምያ ሞድያዌ ፕሮደቴዳ ድራሳ።
- 12 “ታን ህንተንቶ ኦድያባይ ዳሮባይ ደኤ፤ ሸን ሀእ ህንተንቶ ገለና።
- 13 ቱማተላ አያናይ ይያ ዎደ፡ ህንተንታ ቱማተላ ኡባኮ ካለላናዋ። አያዉ ጎፕ፡ እ ባረ ሰሴዳዋ ኦዳናፕ አትን፡ ባረፕ አይነ ኦድና። ቃይ ሰንላፕ ያናባ ህንተንቶ እ ኦዳናዋ።
- 14 እ ታና ቦንቻናዋ፤ አያዉ ጎፕ፡ እ ታዉ ደእያዋፕ አኪደ፡ ህንተንቶ ኦዳናዋ።
- 15 አዎ ደእያባይ ኡባይ ታዋ፤ መን፻ልያዌ ታዉ ደእያባፕ አኪደ፡ ህንተንቶ ኦዳናዋ ታን ጌዳዌ ሀዋሳ።

የሱሳ ካልያዋንቱ ካዩ ናሽቻዉ ላመታና

16 “ጉላ ዋድያፕ ጉይያን፣ ህንተንቱ ታና በእክታ፤ ቃይ ጉላ ዋድያፕ ጉይያን፣ ህንተንቱ ታና በእና” ያጌዳ።

17 የሱሳ ካልያዋንቱፕ እቱ እቱ ባረንቱ ግድን፣ “ ጉላ ዋድያፕ ጉይያን፣ ህንተንቱ ታና በእክታ፤ ቃይ ጉላ ዋድያፕ ጉይያን፣ ህንተንቱ ታና በእንታ፤ እያው ሳፕ፣ ታን እውዋኮ ባይ፣ ግያዌ ሄዌ ዋግያዌ?” ያጌድ።

18 “ ጉላ ዋድያፕ ጉይያን፣ ግያዌ ዋግያዌ? እ እያው ሃሳይንቶነ ኑው ኤረተና” ያጌድ።

19 ኡንቱንቱ ባረና ኦቻናው ኮይያዋ የሱሰ ኤሪደ፣ ኡንቱንታ ያጌዳ፤ “ታን፣ ጉላ ዋድያፕ ጉይያን፣ ህንተንቱ ታና በእክታ፤ ቃይ ጉላ ዋድያፕ ጉይያን፣ ህንተንቱ ታና በእና፣ ጌዳዎ ህንተንቱ እቱ እቱዋ ኦቻቴ?

20 ታን ህንተንቶ ቱሙዋ ኦዳይ። ህንተንቱ ዬካናነ ካዮታና፤ ሽን ሀ አላሚ ናሽታና። ቃይ ህንተንቱ ካዮታና፤ ሽን ህንተንቱ ካዮቶዌ ናሽቻ ግዳናዋ።

21 እት ሞሽራታ ናኣ የላና ሀንያ ዎደ፣ ባረ የልያ ዎዲ ጋኬዳ ድራው፣ ኦይቀታው፤ ሽን ናኣይ የለቱዳዋፕ ጉይያን፣ ናኣይ ሀ ሳኣን የለቱዳ ናሽቻ ድራው፣ ባረ ኦይላ ሀሳዩኩ።

22 ሄዋ ድራው፣ ህንተንቱካ ህንተንቱ ዎዛናን ካዮቲታ፤ ሽን ታን ላኤንሱዋ ህንተንታ በእና፤ ቃይ ህንተንቱ ዎዛናይ ሎይላ ናሽታና፤ ህንተንቱ ናሽቻ ኦንነ ህንተፕ እከና።

23 “ሄ ጋላሰ ህንተንቱ ታና እይነ ዎሰክታ። ታን ህንተንቶ ቱሙዋ ኦዳይ፤ ህንተንቱ ታ ሱንላን ዎሰያዋ ኡባ አው ህንተንቶ እማናዋ።

24 ሀእ ጋካናው ታ ሱንላን እይነ ዎሰበይክታ፤ ህንተንቱ ናሽቻይ ፖሊታና ማላ፣ ጸሳ ዎሰተ፤ ህንተንቱ አካና።

25 “ሀዋ ታን ህንተንቶ ሌምሱዋን ኦዳድ፤ ሽን ታን ሌምሱዋን ኦደና ዎዲ ያናዋ፤ ሽን አውዋባ ታን ህንተንቶ ቆንጭያን ኦዳና።

26 ታን ሄ ጋላሰ፣ ህንተንቱ ታ ሱንላን አውዋ ዎሳና፤ ቃይ ህንተንቱ ድራው፣ ታን አውዋ ዎሳና ጊከ።

27 እያው ሳፕ፣ አው ባረ ሁጳው ህንተንታ ሲቄ፤ ህንተንቱ ታና ሲቅያ ድራውነ ታን አውዋ ማታፕ ዬዳዋ አማኖ ድራው፣ እ ህንተንታ ሲቄ።

28 ታን አውዋ ማታፕ ሀ አላምያ ያድ፤ ቃይ ሀ አላምያ አጋደ አውዋኮ ባና” ያጌዳ።

29 የሱሳ ካልያዋንቱ ዛሪደ የሱሳ፣ “በእ፣ ሀእ ኔን ቆንጭያን ሃሳያሳ፤ ሌምሱዋን እይነ ሃሳያካ።

30 ኔን ኡባባ ኤርያዋ ኑን ሀእ ኤሬቶ፤ ቃይ ኔና ኦንነ ኦቻና ማላ፡ ኔን ኮየናዋ ኤሬቶ። ሄዌ ኑና ኔን ጸሳፕ ዬዳዋ አማንፊ” ያጌድኖ።

31 የሱሰ ዛሪደ ኡንቱንታ፡ “ሀእ አማኒቱ?

32 በእተ፡ ሀንተንቱ ሀንተንቱ ጎለ ጎለ ላለትያ ዋዲነ ታ ጸላላ የግ ባሽያ ዋዲ ያናዋ፤ ሀእካ ይ ድጌዳ። ሸን አዉ ታናና ደእያ ድራዉ፡ ታ ጸላላ ግድከ።

33 ሀንተንቱ ታ ግደን ደኢደ፡ ሳሮ ደእና ማላ፡ ታን ሀዋ ሀንተንቶ ኦዳድ። አላምያን ሀንተንቱ ዋየታና። ሸን ምንተ፤ ታን አላምያ ጸናድ” ያጌዳ።

17

የሱሳ ዋሳ

1 የሱሰ ሄዋ ሃሳዬዳዋፕ ጉይያን፡ ፑደ ሳሉዋ ጸሊደ፡ ሀዋዳን ያጌዳ፤ “ታ አቦ፡ ዋዲ ጋኬዳ፤ ነ ናአይ ኔና ቦንቻና ማላ፡ ኔንካ ነ ናአ ቦንቻ።

2 እያዉ ጎፕ፡ ኔን አዉ እሜዳ ኡባዉ መድና ደኡዋ እ እማና ማላ፡ አሳ ኡባ ቦላን አዉ ማታ እማዳ።

3 አሳይ ኔና እት ቱሙ ጸሳ ግዴዳዋ ኤራና ማላነ፡ ቃይ ኔን ከቲዳ የሱሰ ክርሰቶሳ ኤራና ማላ፡ ሀዌ መድና ደኡዋ።

4 ኔን ታዉ አላናዉ እሜዳ ኦሱዋ ፖላደ፡ ኔና ሳኣን ቦንቻድ።

5 ሀእካ ቃይ አዎ፡ አላሚ መታናፕ ካሰ ነ ማታን ታዉ ደእያ ቦንቹዋን ነ ሰንላን ታና ቦንቻ።

6 “አላምያ አሳፕ ኔን ታዉ እሜዳዋንቶ ነ ሱንላ ኤርሳድ፤ ኡንቱንቱ ነዋንታ፤ ቃይ ኔን ኡንቱንታ ታዉ እማዳ። ኡንቱንቱ ነ ቃላዉካ አዛዘቲድኖ።

7 ሀእ ኔን ታዉ እሜዳ ኡባባይ ኔፕ ዬዳዋ ኡንቱንቱ ኤሪኖ።

8 እያዉ ጎፕ፡ ኔን ታዉ እሜዳ ቃላ ታን ኡንቱንቶ እማድ፤ ኡንቱንቱካ ሄ ቃላ አኬድኖ። ታን ነ ማታፕ ዬዳዌ ቱማ ግድያዋ ኤሪደ ኔን ታና ከቲዳዋካ አማኔድኖ።

9 “ታን ኡንቱንቶ ዋሳይ፤ አላመዉ ኔና ዋሰከ። ሸን ኔን ታዉ እሜዳ አሳዉ ዋሳይ፤ እያዉ ጎፕ፡ ኡንቱንቱ ነዋንታ።

10 ታዉ ደእያ ኡባባይ ነባ፤ ቃይ ነዉ ደእያ ኡባባይካ ታባ። ታን ኡንቱንቱ ባጋና ቦንቹታድ።

11 ታን ሀዋፕ ጉይያን፡ አላምያን ደእከ፤ ኡንቱንቱ አላምያን ደእኖ፤ ታን ሀእ ኔኮ ባይ። ጌሻ አዎ፡ ሀ ኔን ታዉ እሜዳዋንቱ ኔንነ

ታን እቱዋ ግድያዋዳን፣ ኡንቱንቱ እቱዋ ግዳና ማላ፣ ኡንቱንታ ነ ሱንሳን ናጋ።

12 ታን ኡንቱንቱና አላምያን ደእደ፣ ኔን ታዉ እሜዳ ነ ሱንሳ ዋልቃን ኡንቱንታ ናጋድ። ታን ኡንቱንታ ናጋድ፤ ጸሳ ማጻፋይ ጌዳዌ ፖለታና ማላ፣ ባሻይ በሰያ ኡራፕ አትን፣ ኡንቱንቱፕ ሀራይ ኦንነ ባይቤና።

13 “ሀእ ታን ኔኮ ባይ፤ ኡንቱንቱ ዋዛናን ታ ናሽቻይ ፖለታና ማላ፣ ሀዋ ታን አላምያን ሃሳያይ።

14 ታን ኡንቱንቶ ነ ቃላ እማድ፤ ታን አላምያሳ ግደናዋዳን፣ ኡንቱንቱካ አላምያሳ ግደና ድራዉ፣ አላሚ ኡንቱንታ እጹዳ።

15 ኔን ጸላሀያፕ ኡንቱንታ ናጋና ማላ ዋሰያዋፕ አትን፣ አላምያፕ ከሳና ማላ ዋሰከ።

16 ታን አላምያሳ ግደናዋዳን፣ ኡንቱንቱካ አላምያሳ ግድክኖ።

17 ኔን ቱማተሳን ኡንቱንታ ነዋንታ ኦሳ፤ ነ ቃላይካ ቱማተሳ።

18 ኔን ታና አላምያ ኪቴዳዋዳን፣ ታንካ ኡንቱንታ አላምያ ኪታድ፤

19 ቃይ ኡንቱንቱ ቱማተሳን ነዉ ዲማታና ማላ፣ ኡንቱንቱ ድራዉ፣ ታን ታ ሁጲያ ነዉ ዲማያድ።

20 “ታን ኡንቱንቱ ጸላላዉ ዋሰከ፤ ሸን ኡንቱንቱ ቃላ ኦድና፣ ታና አማኔዳዋንቶካ ዋሳይ።

21 ኡንቱንቱ ኡባይ እቱዋ ግዳና ማላ፣ ታን ዋሳይ። አዎ፣ ኔን ታ ግደን ደእያዋዳን፣ ቃይ ታንካ ነ ግደን ደእያዋዳን፣ ኡንቱንቱ ኑ ግደን ደእኖ። ቃይ ኔን ታና ኪቴዳዋ አላሚ አማናና ማላ፣ ኡንቱንቱ እቱዋ ግድኖ።

22 ኔንነ ታን እቱዋ ግድያዋዳን፣ ኡንቱንቱ እቱዋ ግዳና ማላ፣ ኔን ታና ቦንቹዳዋዳን፣ ታንካ ኡንቱንታ ቦንቻድ።

23 ታን ኡንቱንቱ ግደን ደእና፣ ኔን ታ ግደን ደእና፣ ቃይ ኔን ታና ሲሰያዋዳን፣ ኡንቱንታካ ሲቆዋን ኔን ታና ሀ አላምያ ኪቴዳዋ አላሚ ኤራናዳን፣ ኡንቱንቱ ኡባ እቱዋ ግድኖ።

24 “አዎ፣ ሳአይ መ□ታናፕ ካሰ ኔን ታና ሲቄዳ ድራዉ፣ ታዉ እሜዳ ታ ቦንቹዋ ኡንቱንቱ በእና ማላ፣ ኔን ታዉ እሜዳዋንቱ ታን ደእያ ሳአን ታናና ደእና ማላ ኮያድ።

25 “ጽሎ አዎ፣ አላምያ አሳይ ኔና ኤረና፤ ሸን ታን ኔና ኤራይ። ቃይ ኔን ታና ኪቴዳዋ ሀዋንቱ ኤሪኖ።

26 ኔን ታና ሲቄዳ ሲቁ ኡንቱንቱ ግደን ደእና ማላ፣ ቃይ ታንካ ኡንቱንቱ ግደን ደእና ማላ፣ ታን ነ ሱንሳ ኡንቱንታ ኤርሳድ፤ ሰንሳዉካ ኤርሳና” ያጌዳ።

18

የሱስ ባረ ሞርከቱዎ ኩሽያን ኦይቀቴዳ
(ማቶሳ 26:47-56፤ ማር. 14:43-50፤ ሉቃሳ 22:47-53)

1 የሱስ ሄዎ ጊደ፣ ጸሳ ዎሴዳዋፕ ጉይያን፣ ባረና ካልያዋንቱና ቀድሮና ግያ ዛንጋራ ፕኔዳ። ሄ ሳኣን አትክልትያ ሳኣይ ደኤ፤ የሱስን የሱሳ ካልያዋንቱ ገሌድኖ።

2 የሱሳ አለ እሜዳ ይሁዳይ ሄ ሳኣ ኤሬዳ፤ አያዉ ሳፕ፣ የሱስ ኡባ ዎደ ባረና ካልያዋንቱና ሄዋን ሺቄ።

3 ሄዎ ድራዉ፣ ካለለያ ቄሳቱዎ ካፓቱን ፓርሳዋቱ ይሁዳና ባናዳን እሜዳ ሮማ ዎታዳራቱን ጌሻ ጎልያ ናግያዋንቱ ኩራዝያ፣ ያቢያን ቶራ ኦይቂደ ሄ ሳኣ ቤድኖ።

4 የሱስ ባረና ጋካናዉ ሀንያ ኡባባ ኤሪደ፣ ጋጸ ከሲደ፣ “ኦና ኮዩቱ?” ያጌዳ።

5 ኡንቱንቱ ዛሪደ፣ “ናዝሬትያ የሱሳ ኮዩቶ” ያጌድኖ።

የሱስ ዛሪደ፣ “ታን አ” ያጌዳ።

የሱሳ አለ እሜዳ ይሁዳይካ ሄዋን ኡንቱንቱና ኤቄዳ፤

6 የሱስ፣ “ታን አ” ጌዳ ዎደ፣ ኡንቱንቱ ጉዮኮ ሺቂደ፣ ሳኣን ኩንዴድኖ።

7 የሱስ ቃይካ፣ “ኦና ኮዩቱ?”

ያግ ኦቻና ኡንቱንቱ፣ “ናዝሬትያ የሱሳ” ያጌድኖ።

8 የሱስ ዛሪደ፣ “ታን አ ግድያዎ ህንተንቶ ኦዳድ፤ ሰሞ ህንተንቱ ታና ኮይያዎ ግደፕ፣ ሀዋንታ የድተ” ያጌዳ።

9 እ፣ “ታ አቦ፣ ኔን ታዉ እሜዳዋንቱፕ ሀራይ አቶ፣ እቱዋካ ባይዛቢይከ” ጌዳዌ ፖለታና ማላ፣ ሄዎ ጌዳ።

10 ሰሞን ጳጵሮሳዉ ማሻይ ደኤ፤ እ ሄ ማሻ ሾድን ቄሳቱዎ ኡባቱዎ ካፑዎ ቆማ ኡሽቻ ሀይላ ሾጪደ፣ ቃንጽ የጌዳ። ሄ ቆማ ሱንሳይ ማልኮሳ።

11 የሱስ ጳጵሮሳ፣ “ነ ማሻ ሾኩዋን ዛራደ ዎላ! ታ አቡ ታዉ እሜዳ መቱዎ ጸኣ ታን ኡሽክታ?” ያጌዳ።

የሱስ ቄሳቱዎ ካፑዎ ሃና ሰንሳ ሺቄዳ

12 ሻላቃይ፣ ዳሮ ዎታዳራቱን ቃይ ጌሻ ጎልያ ናግያዋንቱ የሱሳ ኦይቂደ ቃቹድኖ።

13 ኮይሮ የሱሳ ሃናኮ አፌድኖ፤ ሃን ሄ ላይላ ቄሳቱዎ ካፓቱዎ ግዴዳ ቃያፋ ቦሉዎ።

14 “አሳ ኡባ ድራዉ፣ እት አሳይ ሀይቂንቶ ሎአ” ጊደ አይሁዳቱዎ ዘራዳዌ ቃያፋ።

ጳጳሮስ የሱሳ ካዳዳ
(ማቶሳ 26:69-70፤ ማር. 14:66-68፤ ሉቃሳ 22:55-57)

15 ሰሞን ጳጳሮስን ሀራ እት ካልያዌ የሱሳ ካሊደ ቤድኖ። ሄ ሀራ ካልያዎ ቁሳቸው ካፑ ኤሬዳ፤ ሄዌ የሱሳና ቁሳቸው ካፑዎ ድርሳ ጋርሳ ገሌዳ።

16 ሸን ጳጳሮስ ካረና ድርሳ ፐንግያን ኤቄዳ። ቁሳቸው ኡባቸው ካፑ ኤርያ ሀራ ካልያዌ ካረ ከሲደ፤ ፐንግያ ናግያ ናትው ኦዲደ፤ ጳጳሮሳ ድርሳ ጋርሳ ገልሴዳ።

17 ፐንግያ ናግያ ናታ ጳጳሮሳ፡ “ኔን ሀ ብታንያ ካልያዎንቱፐ እቱዎ ግድኪዬ?” ያጋዱ።

እ፡ “ቱይት፡ ታን ግድከ” ያጌዳ።

18 ሳአይ ማግያ ድራሬ፡ አይላቱን ጌሻ ጎልያ ናግያዎንቱ ታማ ኤዲደ፤ ቦንቄዳዎ ዩይ አቋ ኤቄደ ካሺኖ፤ ጳጳሮስካ ኡንቱንቱና ኤቄደ፤ ሄ ታማ ካሺ።

ቁሳቸው ካፑ የሱሳ አቸ ኦሻ
(ማቶሳ 26:59-66፤ ማር. 14:55-64፤ ሉቃሳ 22:66-71)

19 ቁሳቸው ኡባቸው ካፑ፡ የሱሳ ካልያዎንቱባን አ ትምርትያባ ኦቸዳ።

20 የሱሰ አው ዛሪደ፡ “ታን አሳ ኡባው ቆንጭያን ኦዳድ። ታን አይሁዳ ኡባይ ሺቅያ አይሁዳ ዎሳ ጎለንን ጌሻ ጎልያን ኡባ ዎደ ታማርሳድ፤ ጌማን አይነ ሃሳያበይከ።

21 ያትና፡ ኔን ታና አያው ኦቻይ? ታን ኦዳዳዎ ሰሴዳ አሳ ኦቻ፤ ሄ አሳይ ታን ኦዳዳዎ ኤሬዳ” ያጌዳ።

22 የሱሰ ሄዎ ጌዳ ዎደ፡ ሄዎን ኤቄዳ ዎታዳራቱዎፐ እቱ የሱሳ ባቄደ፡ “ቁሳቸው ኡባቸው ካፑዎ ቦላ ሀዎዳን ዛራይ?” ያጌዳ።

23 የሱሰ ዛሪደ፡ “ታን ባላባ ሃሳዬዳዎ ግደፐ፡ ሀዎን ደእያ አሳ ኡባው ኦዳ፤ ሸን ታን ቱሙዎ ሃሳዬዳዎ ግደፐ፡ ታና አያው ባቃይ?” ያጌዳ።

24 ሄዎ ድራሬ፡ ሃን፡ ቃሸት ኡቱዳ የሱሳ፡ ቁሳቸው ኡባቸው ካፑዎ፡ ቃያፋኮ የዳዳ።

ጳጳሮስ የሱሳ ላኤንሉዎ ካዳዳ
(ማቶሳ 26:71-75፤ ማር. 14:69-72፤ ሉቃሳ 22:58-62)

25 ጳጳሮስ ሄዎን ኤቄደ፡ ታማ ካሺ፤ ሀራንቱ እ፡ “ኔን ሀ ብታንያ ካልያዎንቱፐ እቱዎ ግድኪዬ?” ያጌዳ።

ጳጳሮስ፡ “ቱይት፤ ታን ግድከ” ያጌደ ካዳዳ።

26 ቄሳቱዋ ኡባቱዋ ካፑዋ ቆማቱዋ፣ እቱዋ፣ ጳጳሮስ ሀይላ ቃንጾዳ ብታንያ ዳቡ ጳጳሮሳ፣ “ታን ነና እናና ዳሮ አታክልትያ ግድን በአበይክታዬ?” ያጊደ ኦቹዳ።

27 ጳጳሮስ ቃይካ ካዴዳ፤ ኤለካ ኩቱ ዋስ አጌዳ።

የሱስ ጵላጸሳ ሰንላ ሺቄዳ
(ማቶሳ 27:1-2፣ 11-14፤ ማር. 15:1-5፤ ሉቃሳ 23:1-5)

28 ኡንቱንቱ የሱሳ ቃያፋ ጎለፕ ሮመ አሳ አይሰያዋ ኦሶ ጎልያ አፊድኖ። ሳአይ ዋንታ ጉራ፤ አይሁዳቱ ፓሰጋ ቦንቶያ ጋላሳ ቁማ ማናዉ፣ ባረንቱ ሁጲያዉ ቱነና ማላ፣ ሮመ አሳ አይሰያዋ ኦሶ ጎልያ ገልበይክና።

29 ሄዋ ድራዉ፣ ጵላጸሰ ኡንቱንቱኮ ካረ ከሲደ፣ “ሀ ብታንያ ህንተንቱ አያን ሞቲቱ?” ያጌዳ።

30 ኡንቱንቱ፣ “እ ኢታባ አልቤናዋ ግድንቶ፣ ኑን አ ኔኮ አሆኮ” ያጌድኖ።

31 ጵላጸሰ ዛሪደ ኡንቱንቶ፣ “ህንተንቱ አ አፊደ፣ ህንተንቱ ህጊ ግያዋዳን፣ እ ቦላ ፕሮድተ” ያጌዳ።

አይሁዳቱ፣ “እናን ዋድያ ማታይ ኑዉ ባዋ” ያጌድኖ።

32 ሀዌ ህይዳዌ የሱስ አይ ማላ ሀይቁዋ ሀይቃንንቶ ኤርሳናዉ ሃሳዬዳዌ ፖለታናሳ።

33 ጵላጸሰ ባረ ኦሱዋ ጎለ ላኤንሉዋ ገሊደ፣ የሱሳ ዴሲደ፣ “ኔን አይሁዳ ካቱ?” ያጊደ አ ኦቹዳ።

34 የሱስ ጵላጸሳ፣ “ሀ ኦሻ ኔን ኔፕ ኦቻይዬ ዋይ ሀራ አሳይ ነዉ ታባ ኦዴዴ?” ያጌዳ።

35 ጵላጸሰ ዛሪደ፣ “ታና አይሁዳ አሳ ጋይ? ነ ዛራቱን ቄሳቱዋ ካፓቱ ኔና ታዉ አል እሜድኖ፤ ኔን አያ ኦሳዲ?” ያጌዳ።

36 የሱስ፣ “ታ ካዉተላይ ሀ አላምያና ግደና። ታ ካዉተላይ ሀ አላምያና ግዴደንቶ፣ ታና አይሁዳቶ አል እመናዳን፣ ታዉ አልያዋንቱ ታዉ አለታና፤ ሸን ታ ካዉተላይ ሀ አላምያና ግደና” ያጌዳ።

37 ሄዋ ድራዉ፣ ጵላጸሰ የሱሳ፣ “ያትና፣ ኔን ካቱየ?” ያጊደ ኦቹዳ።

የሱስ ዛሪደ፣ “ኔን ታና ካትያ ጋዳ። ታን ቱሙዋ ማርካታና ድራዉ የለታድ፤ ቃይ ሄዋ ድራዉ፣ ሀ አላምያ ያድ። ቱሙዋ ባጋ ገዴዳ ኦንን ታን ግያዋ ሰሴዳ” ያጌዳ።

38 ጵላጸሰ፣ “ቱሙ አዬ?” ያጌዳ።

ጵላጸሰ ሄዋ ጌዳዋ፣ ጉይያን፣ አይሁዳቱዋኮ ካረ ከሲደ፣ “ታን አን አይ ባላን ደማበይክ።

39 ሸን ፓስጋ ቦንቶያ ጋላስ፡ እት አሳ ታን ህንተንቶ ቃሹዋፕ ብልያ ደያይ ደኤ፤ ታን ህንተንቶ አይሁዳቱ ካትያ ብልያዋ ኮዪቱ?” ያጌዳ።

40 ኡንቱንቱ ዛሪድ፡ ባረንቱ ኮሻ ቶቄ ኦሊድ፡ “ባርባና ብላፕ አትን፡ አ ግደና!” ያጌድኖ። ሸን ባርባን ፓኑዋ።

19

ዎታዳራቱ የሱሳ ቦላ ቅሊጩድኖ
(ማቶሳ 27:27-32፤ ማር. 15:15-21)

- 1 ሄዋፕ ጉይያን፡ ጵላጸስ የሱሳ ኦይቂድ፡ ልሱዋን ሾጩዳ።
- 2 ዎታዳራቱ አጉንጻፕ ካላቻ ገግሲድ፡ አ ሁጲያን ዎሌድኖ፤ ቃይ ዞኦ ማዩዋካ አ ማይዜድኖ።
- 3 እኮ ሸቂድ፡ “አይሁዳ ካተዉ፡ ሸምቸዋ ጋምአ!” ያጌደ አ ሻይያ ባቂድኖ።
- 4 ጵላጸስ ቃይካ ካረ ከሲደ አይሁዳቱዋ፡ “በእተ፡ ታን እን አይ ባላነ ደማቤናዋ ህንተንቱ ኤራና ማላ፡ አ ህንተንቱኮ ካረ ከሳና” ያጌዳ።
- 5 ሄዋፕ ጉይያን፡ የሱስ አጉንጻ ካላቻ ባረ ሁጲያን ዎሊድ፡ ዞኦ ማዩዋ ማዪድ፡ ካረ ከሴዳ፤ ጵላጸስ አይሁዳቱዋ፡ “ብታንያ ሀዋ በእተ” ያጌዳ።
- 6 ቄሳቱዋ ካፓቱነ ዎታዳራቱ አ በኤዳ ዎድ፡ ባረንቱ ኮሻ ቶቄ ኦሊድ፡ “ማስቃልያ ቦላ ሞስማርያን ትሻደ አ ሱላ! ሱላ!” ያጌድኖ።
- ጵላጸስ ኡንቱንታ፡ “ህንተንቱ አ አፊድ፡ ማስቃልያ ቦላ ሞስማርያን ትሻደ ሱልተ፤ አያዉ ጎፕ፡ ታን አይ ባላነ ደማበይከ” ያጌዳ።
- 7 አይሁዳቱ ዛሪድ፡ “ኑዉ ህጊ ደኤ፤ ኑ ህጊ ግያዋዳን፡ እ ሀይቃናዉ በሴ፤ አያዉ ጎፕ፡ እ ባረና ጸሳ ናኦ ኦሌዳ” ያጌድኖ።
- 8 ጵላጸስ ሄዋ ሰሴዳ ዎድ፡ ካሰዋፕ ሎይሳ ያዬዳ።
- 9 ቃይካ ጵላጸስ ባረ ኦሱዋ ጎለ ሰም ገሊደ የሱሳ፡ “ኔን ሀቃፕ ያዲ?” ያጌደ ኦቹዳ፤ ሸን የሱስ እዉ አይነ ዛርቤና።
- 10 ሄዋ ድራዉ፡ ጵላጸስ አ፡ “ታዉ ኦድኪ? ኔና ብላናዉ ዎይ ማስቃልያ ቦላ ሞስማርያን ትሻደ ካቃናዉ ታዉ ማታይ ደአያዋ ኤርኪየ?” ያጌዳ።

11 የሱስ፡ “ጸሳይ ነው ቦላፕ ማታ እምቤናባ ግድንቶ፡ ነው ታ ቦላ ማታይ ደኤና ሽን። ሄዋ ድራው፡ ታና ነው አለ እሜዳዌ አድያ ናጋራ ኦሌዳ” ያጌዳ።

የሱሳ ሀይቆ ፕርዴድኖ
(ማቶሳ 27:15-31፤ ማር. 15:6-20፤ ሉቃሳ 23:13-25)

12 ጵላጸስ ሄዋ ሰሴዳ ዋደ፡ የሱሳ ብላናው ኦግያ ኮዬዳ፤ ሽን አይሁዳቱ ባረንቱ ኮሻ ቶቄ ኦሊደ፡ “ኔን አ ብልያዋ ግደፕ፡ ካትያ ቄሳረ ዳቦ ግዳካ! ባረና ካትያ ግያ ኦንነ ቄሳረ ሞርከ!” ያጌድኖ።

13 ጵላጸስ ሄዋ ሰሴደ፡ የሱሳ ካረ ከሴዳ፡ ያቲደ ሹቻ ባሱዋ ግያ ሳኣን ፕርዳ ኦይድያን ኡቴዳ፤ እብራይስጸ ቃላን ሄ ሳአይ ጋይታ ግያዋ።

14 ሄ ጋላሳይ ፓሰጋ ቦንቶያ ጋላሳው ገግሰያ ጋላሳ፤ ሳአይ ኡሱቸን ሳትያ ሄራ ግዳናዋ። ጵላጸስ አይሁዳቱዋ፡ “ህንተንቱ ካትያ ሀዋ በአተ!” ያጌዳ።

15 አይሁዳቱ ባረንቱ ኮሻ ቶቄ ኦሊደ፡ “ድጋ! ድጋ! ማሰቃልያ ቦላ ምሰማርያን ድሻደ ሱላ!” ያጌድኖ።

ጵላጸስ ዛሪደ፡ “ህንተንቱ ካትያ ታን ማሰቃልያ ቦላ ምሰማርያን ድሻደ ሱልያዋ ኮዬቴ?” ያጌደ ኦቹዳ።

ቄሳቱዋ ካፓቱ፡ “ቄሳረፕ ሀራ ካቲ ኦው ባዋ!” ያጌድኖ።

16 ሄዋፕ ጉይያን፡ ኡንቱንቱ ማሰቃልያ ቦላ ምሰማርያን ድሺደ፡ የሱሳ ካቃና ማላ፡ ጵላጸስ ኡንቱንቶ አለ እሜዳ።

የሱሳ ሱሌድኖ
(ማቶሳ 27:32-44፤ ማር. 15:21-32፤ ሉቃሳ 23:26-43)

ኡንቱንቱ የሱሳ ኦይቂደ፡ አፌድኖ።

17 የሱስ ባረ ማሰቃልያ ቶኪደ፡ ጉግያሳ ጌተትያሳ ቤዳ። “ጉግያሳ”* ግያዌ እብራይስጸ ቃላን “ጎልጎታ” ግያዋ።

18 ኡንቱንቱ ሄ ሳኣን ማሰቃልያ ቦላ ምሰማርያን ድሺደ፡ የሱሳ ካቂድኖ፤ ቃይ አናና ሀራ ላኡ አሳቱ፡ እቱዋ ያ ባጋና ቃይ እቱዋ ሀ ባጋና የሱሳ ግዱዋን ዋሊደ፡ ማሰቃልያ ቦላ ምሰማርያን ድሺደ ካቂድኖ።

19 ጵላጸስ ጽፋትያ ጸፊደ፡ ማሰቃልያ ቦላ ዋሌዳ። እ ጸፊዳዌ፡ “አይሁዳቱ ካትያ፡ ናዝሬትያ የሱሳ” ያጌ።

* 19:17 “ጉግያሳ” ሄዋን አሳ ጉግያ ማላት መጠቀሱ ዋጋ ሹቻይ ደአያ ድራው፡ “ጉግያሳ ጌተቴዳ”።

20 የሱስ ማስቃልያ ቦላ ሞስማርያን ድሸቲደ ሱለቲዳ ሳኦይ ካታማ ማታን ደኢያ ድራው፤ ዳሮ አይሁዳቱ ሄ ጽፋትያ ናባቤድኖ። ጽፋቲ እብራይስጢ ቃላን፤ ሮማይስጢ ቃላንን ግሪክ ቃላን ጸፈቲዳ።

21 ሄዋ ድራው፤ አይሁዳ ቁሳቱዋ ካፓቱ ጽላጸሳ፤ “ሀ ብታኒ ባረና አይሁዳ ካትያ ያጌዳ፣ ጋደ ጸፋፕ አትን፤ ‘አይሁዳ ካትያ’ ጋደ ጸፎፓ” ያጌድኖ።

22 ጽላጸስ፤ “ታን ጸፊዳዋ ጸፋ ድጋድ” ያጌደ ዛሬዳ።

23 ዋታዳራቱ ማስቃልያ ቦላ ሞስማርያን ድሸቲደ፤ የሱሳ ካቁዳዋፕ ጉይያን፤ አ ማዩዋ እኪደ፤ ኦይዱ ከስ ሻኬድኖ፤ እት እት ዋታዳራ እት ሻኩ ጋኬዳ። አ አዲሳ ማዩዋካ እኬድኖ፤ አዲሳ ማዩ ሀሽያፕ ደሚደ፤ ዱገ ጋካናው የድ ማየትያዋፕ አትን፤ ቃንጸቲደ ሰከትቤና።

24 ዋታዳራቱ እቱ እቱዋ፤ “ኦና ጋካነንቶ፤ ሳማ ዋይ ኤጸ የጋናፕ አትን፤ ማዩዋ ፔጶኮ” ያጌድኖ። ሄዌ ሀኔዳዌ ጸሳ ማጸፋይ፤ “ታ ማዩዋ ሻክ እኬድኖ፤ ታ አዲሳ ማዩዋን ሳማ የጌድኖ” ግያዌ ፖለታናሳ። ሄዋ ድራው፤ ዋታዳራቱ ሄዋ ኦፊድኖ።

25 ሸን የሱሳ ማስቃልያ ማታን አ ዳያ፤ አ አት ሞቻታ፤ ቃልዮጳ ማቻታ ማይራማነ ማግዳላ ጌተትያ ካታማፕ ዬዳ ማይራማ ኤቁድኖ።

26 የሱስ ባረ ዳያነ እ ሲቅያ ካልያዌ ሄዋን ኤቁዳዋንታ በኢደ፤ ባረ ዳዮ፤ “ሀ ሞሽራቱ፤ ነ ናኦ ሀዋ በአ!” ያጌዳ።

27 ሄዋፕ ጉይያን፤ ሄ ካልያዋ “ነ ዳዮ ሀኖ በአ!” ያጌዳ። ሄ ካልያዌ እዞ ሄ ሳትያፕ ደሚደ፤ ባረ ሶይ አፊዳ።

የሱሳ ሀይቁዋ
(ማቶሳ 27:45-56፤ ማር. 15:33-41፤ ሉቃሳ 23:44-49)

28 ሄዋፕ ጉይያን፤ የሱስ ኡባባይ ሀቅ ፖለቲዳዋ ኤሪደ፤ ጸሳ ማጸፋይ ጌዳዌ ፖለታና ማላ፤ “ታና ሳሜ” ያጌድኖ።

29 ሄ ሳኦን እት ጹጋ ኩሜዳ ጫላ ዋይንያ ኤሳይ ደኤ። ኡንቱንቱ እስፖንጅያ ሄ ዋይንያ ኤሳን የጌደ፤ ሀሶጵያ ጌተትያ ሞላ ዴራን ዋሊደ፤ የሱሳ ደናኮ ሺሺድኖ።

30 የሱስ ዋይንያ ኤሳ ጋንጽ በኤዳዋፕ ጉይያን፤ “ፖለቲዳ” ያጌዳ።

የሱሳ ሞይያ ቶራን ጫዴድኖ
ቃይ ሄዋፕ ጉይያን፤ ባረ ሁጲያ ቶቹደ፤ ባረ ሸሞፑዋ እሜዳ።

31 ሄ ጋላሳይ አይሁዳቶ ገቢትያ ጋላሳ † ግድያ ድራውነ ቃይ ሄ ሳምባታይ ዳር ቦንቾ ግድያ ድራው። ሳምባታን አሳቱዋ አሃይ ማስቃልያ ቦላ ፔሽና ማላ። ሱለቴዳ አሳቱዋ ሱይልያ መንገዲ።። ማስቃልያፕ ዋላና ማላ። አይሁዳቱ ጵላጸሳ ዋሴድኖ።

32 ሄዋ ድራው። ዋታዳራቱ ዪደ። የሱሳና ሱለቴዳ ኮይሮ ብታንያ ሱይልያ መንገዲኖ።፤ ቃይ አናና ሱለቴዳ ላኤንሶ ብታንያ ሱይልያካ መንገዲኖ።።

33 ሽን የሱሳኮ ዬዳ ዋደ እ ሀይቂ ድጌዳዋ በኢደ። አ ሱይልያ መንገደበይክኖ።።

34 ግደፕን። ዋታዳራቱዋፕ እቱ አ ሞይያ ቶራን ጫዴዳ። ኤለካ ሱሳይነ ሃላይ ጎግ አጌዳ።።

35 ሀንተንቱ አማናና ማላ። ሀዋ በኤዳዌ ማርካቴዳ፤ እ ማርካትያዌካ ቱሙዋ፤ ቃይ ባረ ሃሳያይ ቱማ ግድያዋ እ ኤሬዳ።።

36 ሄዌ ሀኔዳዌ ጸሳ ማጻፋይ። “አ መቀሳቱዋፕ እቱን መኤና” ጌዳዌ ፖለታናሳ።።

37 ቃይካ ጸሳ ማጻፋይ ሀራይ። “አሳይ ባረ ጫዴዳዋ በአና” ያጌ።።

የሱሳ ሞገቲዳ
(ማቶሳ 27:57-61፤ ማር. 15:42-47፤ ሉቃሳ 23:50-56)

38 ሄዋፕ ጉይያን። አርማትያሳ ጌተትያ ካታማፕ ዬዳ ዮሴፎ የሱሳ አሃ አኪደ አፋናዉ ጵላጸሳ ዋሴዳ፤ ዮሴፎ አይሁዳቶ ያዬዳ ድራው። አሳይ ኤረናን የሱሳ ካልያዋ።።

ዮሴፎ ዋሰና ጵላጸሰ። “አፋ” ያጌዳ። ሄዋ ድራው። ዮሴፎ ቢደ። የሱሳ አሃ አሬዳ።።

39 ቃይ ንቆድሞሰ ሄዋፕ ካሰ የሱሳኮ ቃማ ዬዳዌ። ካዋራናን ጎዳረ ኡላና ዋላከቴዳ ኦይታማነ እቼሹ ኪሎ ግራመ ግድያዋ ከና ሽቱዋ ኦይቂ አኪደ። ዮሴፎና ዬዳ።።

40 ሄ ላኡ አሳቱ የሱሳ አሃ አኪደ። አይሁዳቱ አሃ ጸጸያ ዋጋዳን። ሽቱዋና ጋሊደ። ሞጉዋ አፍላን ጸጸድኖ።።

† 19:31 አይሁዳቶ ገቢትያ ጋላሳ፡- ፓሰጋይ ሳምንታፕ እት ጋላሳ እዉደነ ግዳና ዳንዳዬ፤ ሽን ዮሃን ሞሽራቸ ታማርሰያዋዳን። ፓሰጋ ዋዳ ሀናናዉ በሰያዌ። ላይላ ላይላን የሱሳ ማስቃልያን ካቀት ሀይቂዳ ሳምባታና ግዳና ኮሼ። ፌ 19:31 ሱለቴዳ አሳቱዋ ሱይልያ መንገዲ፡- ሀ ዋጋይ ሮመ ካዉተላ ዋጋዳን። ማስቃልያን ሱለቴዳ አሳቱ ኤለካ ሀይቃና ማላ ኦልያ ኦግያ ጉሳ። 19:36 ከሳ 12:46፤ ፓይ. 9:12፤ ማዝ. 34:20 19:37 ዛካ. 12:10፤ ሳፃ 1:7

41 የሱስ ማስቃልያ ቦላ ሞሰማርያን ቋሽቲደ ሱለቴዳ ሳኣን ዳር አትክልትያ ሳኣይ ደኤ፤ ሄ አትክልትያ ሳኣ ግደን ሹቻ ዎጭ ከሴዳ ብር ኮንነ ሞገትቤና ኦራላ ዱፋ ደኤ።

42 ሄ ዱፋ ማታን ደእያ ድራውነ ቃይ አይሁዳቱ ሳሞባታው ገገትያ ጋላሳ ግድያ ድራው፡ የሱሳ ያን ዎጭድና።

20

የሱስ ሀይቁዋጥ ደንዴዳ

(ማቶሳ 28:1-8፤ ማር. 16:1-8፤ ሉቃሳ 24:1-12)

1 ዎጋ ጋላስ ጉራን፡ ብር ዳብዳብያዋን፡ ማግዳላ ጌተትያ ካታማጥ ዬዳ ማይራማ የሱስ ሞገቲዳ ዱፋዎኮ ባደ ሹቻይ ሄ ጎንጎሉዋ ደናጥ ደንድክቼዳዋ በኣዱ።

2 ሰሞን ጳጳርሳኮነ የሱስ ሰቅያ የኮ ካልያዋኮ፡ እዛ ዎጻደ ባደ፡ “ዱፋዋጥ ጎዳ አፍ ድጌድና፤ ሀቃን አ ዎጭድናንቶነ ኑን ኤርኮ” ያጋዱ።

3 ሄዎ ድራው፡ ጳጳርሰነ የኮ ካልያዎ አጊደ፡ ዱፋዎኮ ቤድና።

4 ላኡካ እትጥ ዎጾድና፤ ሸን የኮ ካልያዎ ጳጳርሳጥ አቋ ካሰቲደ፡ ሄ ዱፋዎኮ ጋኬዳ።

5 ሄ ካልያዎ ሆኪደ፡ ሞጉዎ አፍላ በኤዳ፤ ሸን ግደ ገልቤና።

6 ሰሞን ጳጳርሰ አ ካል ዬደ፡ ዱፋዎ ግደ ገሌዳ። ያቲደ ሞጉዎ አፍላይ ሄዎን ደእያዎ በኤዳ፤

7 ቃይ የሱሳ ሁጲያን ጳጳት ኡቴዳ አፍላይ ሄ ጳጳቲዳዎዳንካ ዱማ እት ሳኣን ደእያዎ በኤዳ፤ ሄ አፍላይ ዱማ ደኤጥ አትን፡ ሞጉዎ አፍላና እትጥ ደኤና።

8 ሄ ዎደ፡ ካሰቲደ ጎንጎሉዋኮ ጋኬዳ የኮ ካልያዎ ገል በኢደ አማኔዳ።

9 የሱስ ሀይቁዋጥ ደንዳናው በሰያዎ ኦድያ ጸሳ ማጻፋ ኤንቱንቱ ብር አኬክበይክና።

10 ሄዋጥ ጉይያን፡ ካልያዋንቱ ባረንቱ ጎላ ሰሚደ ቤድና።

የሱስ ማግዳላ ማይራምዉ ቤቴዳ

(ማቶሳ 28:9-10፤ ማር. 16:9-11)

11 ሸን ማይራማ ሄ ዱፋዎ ደናን ኤቃደ ዬካደ ሆካደ ዱፋዎ ግደ ጾላዱ።

12 ቦላ ማዩዎ ማዬዳ ላኡ ኪታንቻቱ የሱሳ አሃይ ግሴዳ ሳኣን እቱ ሁጲሳና እቱ ገድሳና ኡቴዳዎንታ በኣዱ።

13 ኤንቱንቱ እዞ፡ “ሞሽራቴ፡ አያው ዬካይ?” ያጊደ ኦጅድና።

እዛ፡ “አሳቱ ታ ጎዳ አፍ ድጌድኖ፤ ኡንቱንቱ ሀቃን ሞጭድናንቶን ታን ኤርከ” ያጋዲ።

14 ሄዋ ጌዳዋጥ ጉይያን፡ ጉየ ሰማ ጸላደ፡ የሱስ ኤቄዳዋ በአዲ። ሸን እ የሱሳ ግዴዳዋ አኬካበይኩ።

15 የሱስ እዞ፡ “ሞሽራቱ፡ አያዉ ዬካይ? ኦና ኮያይ?” ያጊደ ኦቹዳ።

ማይራማ አትክልትያ ናግያዋ ጋደ፡ “ጎዳዉ፡ ኔን አኬዳዋ ግድገ፡ አ ሀቃን ሞጭድንቶ፡ ታዉ ኦዳርኪ፤ ታን አ አካና” ያጋዲ።

16 የሱስ እዞ፡ “ማይራማ” ያጌዳ።

አ አኮ ሰማደ፡ እብራይስጺ ቃላን “ራቡኒ” ያጋዲ፤ ሄዋ ብለላይ “ታማርሰያዎ” ግያዋ።

17 የሱስ እዞ፡ “ታን ብር ታ አዉዋኮ ባቤና ድራዉ፡ ታና ቦቾፓ፤ ሸን ታ እሻቱዋኮ ባደ፡ ታን ታ አዉዋኮን ሀንተንቱ አዉዋኮ፡ ታ ጸሳኮን ሀንተንቱ ጸሳኮ፡ ፑደ ባይ ጌዳ፡ ጋደ ኡንቱንቶ ኦዳ” ያጌዳ።

18 ማግዳላ ጌተትያ ካታማጥ ዬዳ ማይራማ ጎዳ በኤዳዋን እዝዉ እ ሄዋ ኦዳዋዋ ባደ ካልያዋንቶ ኦዳዲ።

የሱስ ባረ ካልያዋንቶ ቤቴዳ

(ማቶሳ 28:16-20፤ ማር. 16:14-18፤ ሉቃሳ 24:36-49)

19 ሄ ዋጋ ጋላስ እማርሰ፡ ካልያዋንቱ አይሁዳቶ ያዬዳ ድራዉ፡ ጥንግያ ጎርዲደ፡ ሺቅ ኡት ደእሸን፡ የሱስ ዪደ፡ ኡንቱንቱ ግዲዋን ኤቄደ፡ “ሳርተላይ ሀንተንቶ ግደ” ያጌዳ።

20 ሄዋ ጌዳዋጥ ጉይያን፡ ባረ ኩሽያን ባረ ሞይያ ኡንቱንታ በሴዳ፤ ካልያዋንቱ ጎዳ በኤዳ ዋደ ሎይሳ ናሸቴድኖ።

21 የሱስ ላኤንጭዋ ኡንቱንቶ፡ “ሳርተላይ ሀንተንቶ ግደ፤ ታ አቡ ታና ከቴዳዋዳን፡ ታንካ ሀንተንታ ከታይ” ያጌዳ።

22 ሄዋ ጌዳዋጥ ጉይያን፡ ኡንቱንቱ ቦላ ኡፋ ጊደ ሸምፔዳ፤ ቃይ፡ “ጌሻ አያና አክተ።

23 ሀንተንቱ አቶ ጌዳ አሳ ናጋራይ አቶ ጌተታናዋ፤ ሀንተንቱ አቶ ጌናዋንቱ ናጋራይ አቶ ጌተተና” ያጌዳ።

የሱሳን ቶማሳ

24 ሸን ታማን ላኤ ካልያዋንቱጥ እቱ፡ ማንትያ ግያ ቶማስ፡ የሱስ ዬዳ ዋደ ኡንቱንቱና ባዋ።

25 ሄዋ ድራዉ፡ የኮ ካልያዋንቱ ቶማሳዉ፡ “ኑን ጎዳ በኤደ!” ያጌድኖ።

ሽን ቶማስ ኡንቱንቶ፡ “ሞሰማርያን እ ጫደቱዳ እ ኩሽያን ደእያ ማላ በኤናንነ ሄ ማላ ታ ብራድያን ቦቼናን፡ ቃይ ታ ኩሽያ እ ሞይያን ዬዳ በኤናን ታን አማንከ” ያጌዳ።

26 ሳሞንታፕ ጉይያን፡ የሱሳ ካልያዋንቱ ቃይካ ጎለን ሺቅ ኡቴድኖ፤ ቶማስካ ኡንቱንቱና ደኤ። ፐንጊ ቃሽት ኡት ደእሸን፡ የሱስ ዪደ፡ ኡንቱንቱ ግዲዋን ኤቂደ፡ “ሳርተላይ ህንተንቶ ግደ” ያጌዳ።

27 ሄዋፕ ጉይያን፡ የሱስ ቶማሳ፡ “ነ ኩሽያ ሃ አሃደ፡ ታ ኩሽያ በአ፡ ቃይ ነ ኩሽያ ሃ አሃደ፡ ታ ሞይያን ዬዳ በአ፡ ኔን አማንያዋ ግዳፕ አትን፡ አማነናዋ ግደፕ!” ያጌዳ።

28 ቶማስ ዛሪደ፡ “ታ ጎዳዉ፡ ታ ጸሳዉ!” ያጌዳ።

29 የሱስ፡ “ኔን ታና በኤዳ ድራዉ አማናዳ፤ በኤናን አማኔዳዋንቱ አንጀቱዳዋንታ” ያጌዳ።

ሀ ማጻፋ ቆፋ

30 የሱስ ሀ ማጻፋን ጸፈትቤና ሀራ ዳር ማላታቱዋ ባረና ካልያዋንቱ ሰንላን ኦሴዳ።

31 ሽን የሱስ፡ እ ክርሰቶሳ፡ ጸሳ ናአ ግድያዋ ህንተንቱ አማናና ማላነ፡ ቃይ አ አማኒደ አ ሱንላን ደኤዋ ህንተንቱ ደማና ማላ፡ ሀዋ ጸፈቱዳ።

21

የሱስ ላፑ ካልያዋንቶ ቤቴዳ

1 ሄዋፕ ጉይያን፡ የሱስ ጽብርያደሳ ጌተትያ አባ ጋጸን ባረ ካልያዋንቶ ላኤንሉዋ ቤቴዳ። እ ኡንቱንቶ ሀዋዳን ቤቴዳ።

2 ሰሞን ጸጽሮሰነ ማንትያ ጌተትያ ቶማስ፡ ቃና ጋለላፕ ዬዳ ናትናኤል፡ ዛብድኖሳ ናናይነ * የሱሳ ካልያዋንቱፕ ሀራ ላአቱ እትፕ ደኢኖ።

3 ሰሞን ጸጽሮሰ ኡንቱንቶ፡ “ታን ሞልያ ኦይቃናዉ ባይ” ያጌዳ።

ኡንቱንቱ፡ “ኡንካ ኔናና ባና” ያጌደ፡ ከሲደ ዋንግርያ ግደ ገሌድኖ፤ ሽን ኡንቱንቱ ሄ ጋላስ ቃማ ሞልያ አይነ ኦይቁበይክኖ።

4 ዋንትያ ዋደ አዋይ ከሳናፕ ካሰ፡ የሱስ አባ ጋጸን ኤቂዳ፤ ሽን አ ካልያዋንቱ የሱሳ ግዴዳዋ ኤርበይክኖ።

5 የሱስ ኡንቱንታ፡ “ናቶ፡ ሞልያ ኦይቁበይክቴየ?” ያጌዳ።

* 21:2 ዛብድኖሳ ናና- እሻቱዋ ግዴዳ ያቆባነ የሃንሳ።

ኢንቱንቱ ዛሪደ፡ “አይነ ኦይቁበይኮ” ያጌድኖ።

6 እ ዛሪደ፡ “ሀንተንቱ ዳባ ዋንግርያፕ ኡሸቻ ባጋኮ የግተ፤ አማራዳዋ ሀንተንቱ ኦይቃና” ያጌዳ። ሄዋ ድራው፡ ዳባ ኡሸቻ ባጋኮ የግና፡ ሞሊ ዳራዳ ድራው፡ ጎቾ ከሳናዌ ኢንቱንታ ጸኔዳ።

7 የሱሰ ሰቅያ እ ካልያዌ ጳጳርሳ፡ “ሀዌ ጎዳተኔ!” ያጌዳ። ሰሞን ጳጳርሰ ጎዳ እ ግዴዳዋ ሰሴዳ ዋደ፡ ካሎ ደእያ ድራው፡ ባረ ማዩዋ ማዩደ፡ አባ ግዶ ጉፕ ገሌዳ።

8 ሸን የኮ ካልያዋንቱ ሞሊ ኩም ኡቲዳ ዳባ ጎቹደ፡ ዋንግርያን አባፕ ጋጸ ከሴድኖ፤ ኢንቱንቱ አባፕ ላኡ ጾቱ ዋቆ ኬና ሃኪደ ደእኖፕ አትን፡ ሎይሳ ሃኪደ ደእክኖ።

9 ኢንቱንቱ አባፕ ጋጸ ከሴዳ ዋደ፡ ጸጸንሳ ቦንቁዋን ሞሊ ደእያዋን ኡክሳ በኤድኖ።

10 የሱሰ ኢንቱንታ፡ “ሀእ ሀንተንቱ ኦይቁዳ ሞልያፕ አማራዳዋ ሃምተ” ያጌዳ።

11 ሰሞን ጳጳርሰ ዋንግርያን ገሊደ፡ ጾታን እሻታማነ ሄዙ ዋጋ ሞለቱ ኩም ኡቲዳ ዳባ ጎቹደ፡ አባፕ ጋጸ ከሴዳ፤ ሞሊ ሄዋ ኬና ዳሮ ግድናካ ዳባይ ዳከትቤና።

12 የሱሰ ኢንቱንታ፡ “ሀ ዪደ፡ ቃንእያ ቃንእተ” ያጌዳ። የሱሳ ካልያዋንቱፕ እቱነ፡ “ኔን ኦኔ?” ጊደ እ ኦቻናዉ ጸልቤና፤ አያዉ ጎፕ፡ ጎዳ እ ግዴዳዋ ኢንቱንቱ ኤሪድኖ።

13 የሱሰ ዪደ፡ ኡክሳ አኪደ፡ ኢንቱንቶ እማዳ፤ ሞልያካ ሄዋዳን እማዳ።

14 የሱሰ ሀይቁዋፕ ደንዴዳዋፕ ጉይያን፡ ባረ ካልያዋንቶ ቤትሸን ሀዌ ሄዘንሉዋ።

የሱሳን ጳጳርሳ

15 ኢንቱንቱ ቁማ ማዳዋፕ ጉይያን፡ የሱሰ ሰሞን ጳጳርሳ፡ “ዮሃንሳ ናኦ ሰሞና፡ ታና ሀዋንቱፕ እላደ ሲቃይ?”† ያጌዳ።

ሰሞን ጳጳርሰ፡ “ኤ ጎዳዉ፡ ታን ኔና ደሰያዋ ኔን ኤራሳ” ያጌዳ።

የሱሰ አ፡ “ታ ደርሳ ማራቱዋ ሄማ” ያጌዳ።

16 የሱሰ ቃይካ፡ “ዮሃንሳ ናኦ ሰሞና፡ ታና ሲቃይ?” ያጌዳ። ሰሞን ጳጳርሰ፡ “ኤ ጎዳዉ፡ ታን ኔና ደሰያዋ ኔን ኤራሳ” ያጌዳ።

የሱሰ፡ “ታ ደርሳቱዋ ሄማ” ያጌዳ።

† 21:15 “ታና ሀዋንቱፕ እላደ ሲቃይ?” ሀዋ ጉሳይ፡ “ታና ሀ የዋቱዋ ሲቅያዋፕ እላደ ሲቃይ?” ጉሳ።

17 የሱስ ሄዘንሉዋ፡ “ዮሃንሳ ናኣ ሰሞና፡ ታና ደሳይ?” ያጌዳ።

የሱስ ሄዘንሉዋ ሰሞን ጳጳሮሳ፡ “ታና ደሳይ?” ያጌደ ኦቼዳ ድራዉ፡ ጳጳሮስ ካዮቲደ፡ “ጎዳዉ፡ ኔን ኡባባ ኤራሳ፤ ታን ኔና ደሰያዋ ኔን ኤራሳ” ያጌዳ።

የሱስ፡ “ታ ደርሳቱዋ ሄማ።

18 ታን ነዉ ቱሙዋ ኦዳይ፤ ኔን ዎዳላተላን ደእያ ዎደ፡ ነ ጸሓጎ ሳቂያ ኔረካ ዳንጫደ፡ ኔን ኮዬዳሳ ባሳ። ሽን ጭሜዳዋፕ ጉይያን፡ ነ ኩሽያ ምጫ በሳሳ። ኔና ሀራ ኡራይ ዳንጭሳናዋ፤ ኔን ደሰናሳካ አፌ” ያጌዳ።

19 የሱስ ሄዋ ጳጳሮስ አይ ማላ ሀይቁዋ ሀይቁደ፡ ጸሳ ቦንቶሳንቶን ኤርሳናዉ ጌዳ፤ ቃይ ሄዋ ጌዳዋፕ ጉይያን፡ የሱስ ጳጳሮሳ፡ “ታና ካላ” ያጌዳ።

የሱሳን የኮ ካልያዋ

20 ጳጳሮስ ጉየ ሰሚደ፡ የሱስ ሲቅያ ካልያዌ ባረፕ ጉየና ይያዋ በኤዳ፤ ሄ ካልያዌ ካዉዋ ምያ ሳኣን የሱሳኮ ሺቂደ አ፡ “ጎዳዉ፡ ኔና አላ እማናዌ ኦኔ?” ያጌዳዋ።

21 ጳጳሮስ ሄ ካልያዋ በኢደ የሱሳ፡ “ጎዳዉ፡ ሀ ብታኒ ቃይ ዋናኔ?” ያጌዳ።

22 የሱስ አ፡ “ታን ያና ጋካናዉ እ ደአና ማላ ታን ኮዮፕ፡ ሄዌ ኔና እያ ሙቲ? ኔን ታና ካላ” ያጌዳ።

23 ሄዋ ድራዉ፡ ሄ ካልያዌ ሀይቀና ግያ ሃሳያይ እሻቱዋ ኡባኮ ጋኬዳ፤ ሽን የሱስ፡ “ታን ያና ጋካናዉ፡ እ ደአና ማላ፡ ታን ኮዮፕ፡ ኔና እያ ሙቲ?” ጌዳዋፕ እትን፡ “ሀይቀና” ግቤና።

24 ሄ የዉዋባ ማርካቲዳዌን ቃይ ሄዋ ጸፊዳዌ ሄ ካልያዋ አ ማርካተሳይ ቱማ ግድያዋ ኑን ኤሬቶ።

25 የሱስ ኦሌዳ ሀራ ዳርባይካ ደኤ፤ ኡባባይ ሁጲያን ሁጲያን ጸፈትንቶ፡ ጸፈትያ ማጻፋቶ ሀ ሙለ አላሚ ግዳናዋ ታዉ ማላተና።

ጌሻ ማጻፋ

The Holy Bible in the Dawro language of Ethiopia

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011-2024, Wycliffe Bible Translators, Inc. and The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c